

# WANTOK

NIUSPEPA BILONG YUMI OL PAPUA NIUGINI STRET!

32 pes

Namba 1,395

Wik stat long Fonde Mas 22, 2001

70t

**Winim  
K200 long  
Panim Bal  
Resis  
- pes 27**

**Lo na  
oda hevi  
long  
Sandaun  
- pes 2**

**Nogat  
sas  
long ol  
ami  
- pes 3**

**Ol helt  
na  
edukesen  
ripot  
- pes 12**

**Ol nius  
long  
ovasis  
- pes 16-17**

## Ol PNG soldia i no laikim ol edvaisa bilong Australia long fos

**WINIS MAP i raitim**

WANPELA long ol samting we ol PNG Difens Fos i putim long petisen bilong ol i go long Nesenel Gavman em long rausim ol militeri opisa bilong Australia husat i wok wantaim fos long dispela taim.

Ol soldia i laikim bai ol i rausim kwiktaim ol militeri edvaisa bilong Australia bikos ol i tok dispela lain ya i no givim gutpela militeri edvais.

Wanpela mausman bilong ol soldia i bin tokim dispela niuspepa olsem sapos ol edvaisa bilong Australia i bin givim gutpela edvais, dispela hevi we i kamap long Difens Fos i no inap long kamap.

Opisa ya i tok i nogat nid long ol ami bilong Australia i stap long hia taim ol i surik long givim edvais.

Wanpela soldia bilong Taurama Bareks i kros na tok em i les long ol ami bilong Australia i feil long trenim na givim gutpela edvais i go long PNG Difens Fos.

Em i bilip olsem ol soldia bilong Australia i wok long

spai tasol na olsem ol i no wok bung wantaim PNG ami long kamapim ol gutpela samting long fos.

Ol soldia i bin plenim long givim petisen bilong ol i go long gavman long Tunde tasol dispela i no kamap na sampela soldia i kros na ol i tok petisen i mas go long Praim Minista Sir Mekere Morauta, na i no long Difens Minista Kilroy Genia.

Long wanpela pres stemen long Tunde, Sir Mekere i bin tok Kabinet long Mande i bin holim wanpela ejen bung na ol i bin tok orait olsem Difens Minista bai makim gavman na kisim petisen.

Long Tunde apinun ol bin askim ol soldia long go bek long ol wan wan bareks na bung wantaim long Mari Bareks long 10 kilokTrinde moning. Na ol bin tokim ol olsem Praim Minista bai bungim ol long dispela taim.

Praim Minista i no bin wokim wanpela opisel tok-save olsem em bai bungim ol soldia.

Aste ol soldia bilong Taurama, Goldi na Mari Bareks i bin bung long 10 kilok tasol nogat wanpela sinia opisa i bin stap long

toktok long ol.

Ol mausman bilong ol i wok long toktok wantaim Difens Minista na Komanda na Opis bilong Praim Minista.

Ol soldia i bin lusim ples bilong bung long belotaim tasol ol i bin tokim ol long go bek long 1 kilok apinun. taim

ol i go bek, nogat senis i kamap. Long dispela taim, Praim Minista i bin tokim mausman bilong ol soldia olsem em bai i no inap bungim ol.

Wantok i save olsem mausman i bin kisim nius bipo long belo tasol em i no bin toksave long ol bikos em

i pret nogut ol i kamapim trabel. Tasol ol i wet na klostu long 4 kilok, apinun, em i autim tok long dispela samting na askim strong ol soldia long go bek long wanwan bareks bilong ol na ol i ken makim sampela man long ol yunit bilong ol long stap insait long wanpela bung wantaim ol niuslain.



• Ol mausman bilong PNG Difens Fos i wetim Praim Minista long kam bungim ol long Tunde na Trinde aste tasol em i no kamap long kisim petisen bilong ol. Foto: IVAN BAYAGAU.

## Ol i sutim tok long traime daunim mi, lpatas i tok

**JOE KANEKANE i raitim**

GAVANA bilong Enga Peter lpatas i tok ol ripot we i sutim tok olsem mani i paul em ol toktok bilong traime bagarapim na daunim em.

Mista lpatas i tok em i bilip bai opis bilong Keateka Edministreta Kundapen Talyaga i tromoi moa pepa i kamaut long nius na pablik long traime bagarapim em na ol gutpela developmen em i bin mekim taim em i bin go pas long provins.

Dispela em ol piksa we eking edministreta i mekim long bagara-

pim nem bilong mi na mekim mi i kamap olsem wanpela man nogut long ai bilong ol pipel. Mi bilip moa ripot bilong sutim tok long mi bai kam aut long traime bagarapim na daunim mi, Mista lpatas i tok.

Long bekim tok long ripot olsem em i bin kisim KB milien, Mista lpatas i tok em i kirap nogut long lukim olsem dispela ripot i sut long em i papa long kisim dispela mani.

Em i tok i nogat wanpela sikret (hait pasin) olsem famili bilong em i papa long Panda Builders kampani we toktok i sut long en. Tasol long save bilong em, olgeta kontrak em provinsel tendas bod i go

pas long ol.

Ol dispela kain toktok bilong sutim tok i mas go long Siaman bilongProvinsal Tendas Bod. Dispela man tasol i save gut long olgeta ripot ya bikos em bai save long wanem hap ol mani i go long en, Mista lpatas i tok.

Em i tok planti pipel long Enga i save olsem em i papa long dispela kampani na em i save was gut tru long em i noken yusim posisen bilong em long dispela kampani na em i save sanap strong long lukim olsem kampani i mekim wok bilong em stret bhainim bisnis rekot bilong en.

Keateka Edministreta Kundapen Talyaga i tokaut long ripot olsem em i kirap nogut long luksave olsem bikpela mani tru bilong pablik i bin go hait long tras akaun (pasbuk) na peim i go long Panda Builders na i no bhainim stretpela rot.

Mista Talyaga i tokaut olsem i nogat rekot i stap long provinsal saplai na tendas bod long Kopen na Pili Kambi projek long skelim gut kos o veliu bilong kontrak, sapos kontrakta i ken mekim dispela wok na level bilong wok we i ken go stret wantaim mak bilong peimen.

**New and Improved  
with more vitamins  
and minerals**

**Nestlé  
Sunshine**

Calcium  
for strong bones

# PLIS RIPOT

• **POT MOSBI:** Plis i bin sasim Oposisen Lida Bill Skate long tripela sas bilong paulim K350,000. Frod Skwad i bin askim em ol kwesten long opis bilong ol long Badili na bihain ol i sasim em na lokim em long Boroko sel na Mista Skate stap liklik taim tasol long sel na bihain em i kam aut long K1000 beil.

Tripela sas ya em bilong paulim K200,000, K45,000 na K100,500.

Loya bilong Mista Skate i tok kain pasin bilong ol plis em politik i stap insait long en.

• **MAUNT HAGEN:** Plis i holim na sasim wanpela man husat i bin stil long Sekurimax. Provinsel plis komanda, Alan Kundi i tok saspek ya em i wanpela wokman bilong Sekurimax yet husat i bin wok long taim dispela stil pasin i bin kamap.

Suprintenden Kundi i no tokaut long hamas mani em man ya i bin stilim tasol em i tok man ya i stilim bikpela mani stret. Plis i bilip olsem dispela stil pasin em ol lain wok long Sekurimax yet i save long en na plis i mekim wok painaut yet.

Plis i holim tu wanpela man husat i bin traim long holim ol lain i save stap long kaunta bilong stoa long Bes Bai supamakot. Wanpela geng i hensapim ol kaunta lain na traim long stilim mani na ronawe tasol ol sekuriti gad bilong stoa i hariap na pasim ol dua bilong stoa na dispela eksem bilong ol i putim wanpela bilong ol saspek long han bilong plis. Plis mekim wok painaut yet.

• **POT MOSBI:** Plis Komisina John Wakon i tok ol plis i no mekim pret toktok o bagarapim sindaun bilong famili bilong Oposisen Lida Bill Skate.

Mista Skate i bin tok plis i bin bagarapim laip bilong famili bilong em. Em i tok ol pikinini bilong em i no save go long skul moa, pikinini meri bilong em i risain long wok bilong en na meri bilong em i no save go long stoa moa.

Long wankain taim helikopta bilong ol plis "Eye in the Sky" i nogat paiot na i mekim ol wok bilong em.

Ekting plis komisina Sam Inguba i tok plis ea win dairekta i bin lusim wok bilong em taim ol i no rivuium kontrak bilong em. Mista Inguba i tok plis i no rivuium kontrak bilong Mista Inau bikos plis i no inap long resis wantaim wanpela kontrak bilong wanpela komesel balus kamapni.

# NCDC statim imejensi klin ap long Godens na Boroko

LYNNE MINIRU i raitim

Nesanel Kapitel Distrik Komisn (NCDC) i statim wanpela imejensi klin ap long aste (Trinde) long Godens na Boroko eria long rausim ol smel pipia bihain long kontrakta bilong rausim ol pipia i painim hevi wantaim ol ka bilong em.

Deputi siti menesa, Tom Gesa i tok NCDC i salim faipwela tipa trak i go long dispela tupela eria long rausim ol pipia. Em i tok planti manmeri i bin komplek long NCDC olsem kontrakta i no mekim wok bilong em olsem tripela wik nau na ol pipia i pulap na smel nogut tru.

Mista Gesa i tok em i go raun long Godens long Tunde na lukim sampela manmeri long hap i bin wok long tromoi ol pipia bilong ol long rot na em i tokim ol long no ken mekim dispela kain pasin.

Em i tok kontrakta i no bin tokaut hariap long hevi bilong em long NCDC olsem na NCDC bai rivuium o lukluk gen long kontrak bilong ol wantaim kampani ya na NCDC i tingting long kisim nupela kontrakta husat i ken mekim wok gut.

Wanpela wokman bilong Telikom PNG husat i save stap long Is Boroko tu i tok pipia bilong planti haus long hap i bin stap longpela taim tru na i kamapim smel nogut.

Bosman bilong helt divisen bilong NCDC, Robin Yanopa i tok ol i kisim wankain komplek pinis long ol hap olsem Mosbi Not Is, Bomana na sampela hap bilong Korobosea.

Konsolidetet Propeti Holdings i save kisim ol rabis long ol dispela hap we nau ol i wok long lukim dispela hevi.

NCDC i kisim tripela kontrakta long raun long siti na kisim ol pipia tasol long dispela taim em tupela tasol i mekim ol wok bilong ol. Tupela narapela kontrakta ya em Pako Bothers na Wani Koropa.

NCDC i save spendim samting olsem K200,000 long wanwan yia long ol dispela kontrakta long klinim siti na NCDC yet i save was long ol na lukim sapos ol i mekim ol wok bilong ol o nogat.

# Lo na oda hevi i go bikpela long Sumo

SYLVIA AVITU NA JACKLEEN TILI i raitim

PLIS long Aitape i ripot olsem wanpela as long lo na oda hevi i wok long go bikpela long Sumo insait long is kos bilong Sandaun em ol plis i no wokim tumas ol patrol raun na nogat gutpela komyuniti lidasip i stap.

Konstebol Eddie Gobey na John Bidau i bin autim wari bilong ol long dispela samting bihain tasol ol i wokim wanpela wik patrol long dispela eria.

Konstebol Gobey i tok em i wari olsem ol asples i wok long groim mariwana o spakbrus bilong peim rot bilong ol i go olsem long ples Serra we ol i salim dispela samting.

Em i tok Sumo Lokol Level Gavman (LLG) i no wok gut na sampela pipel i no givim luksave long ol komyuniti lida.

Em i tok dispela em i wanpela samting long ol hevi we i go antap long eria long dispela taim.

Narapela wari em Aitape na Vanimo plis stesen i nogat

inap plisman long karimaut ol plis patrol olgeta taim long Sumo eria.

Na Konstebol Gobe i tok samting ya bai i no inap long senis hariap.

Ol i kolim dispela plis operesen long Sumo long "Klinim Sumo".

Tupela grup bilong ol plis long Aitape i bin kisim dingi i go long Sumo na stap karimaut wok long wanpela wik. Bihain ol bin kisim ka na i go long Barap na stap wanpela nait long hap na skruim wok abaut i go bek long Aitape.

Ol sevis tu long hap i no gutpela na i hat tru.

Bihain dispela Konstebol Gobe i autim wari bilong em bikos wanpela meri i bin dai taim em i wok long karim bebi. Na i nogat helt senta o edpos i stap klostu. Sissano sab helt senta i stap tupela aua longwe long kisim bot.

Em i tok ol bai wokim ripot long ol plis i wokim ol patrol i go long dispela eria na tu, toktok wantaim ol atoriti olsem i gat bikpela nid long sanapim helt senta o edpos long eria.

# Nesanel Alaiens opim brens long Wewak

RIJINOL memba bilong Is Sepik provins, Sir Michael Somare i tok gutpela long Praim Minista i rausim em long wok Minista las yia bikos nau em i gat inap taim long redim pati bilong em Nesanel Alaiens (NA) long nesanel ileksen neks yia.

Sir Michael Somare i mekim dispela toktok long fran bilong moa long 2000 manmeri long Wewak Lutheran Hol husat i kamap long witnessim nupela provinsal brens bilong Nesanel Alaiens i op.

Sir Michael Somare i tokim ol sapota na ol pipel bilong Is Sepik olsem pati bilong em i stap yet long Gavman long lukim olsem ol plen na wok ol i kamapim i mas kamap gut na wok. Na gutpela tru long pati lida i sanap long sait na lukluk na stretim gut pati long wok bilong em.

Nesanel Alaiens i bin stap insait long kamapim dispela Gavman tude olsem na mipela bai sapatim ol Minista bilong mi long stap yet long Gavman inap 2002 jenerel ileksen, Sir Michael i tok.

Sir Michael i tok nau em i gat planti taim long lukluk gut na streti gut pati (NA), opim ol provinsal brens na i go daun long ol distrik brens na skulim ol provinsal eksekutiv long ol mekimsave ol inap kisim insait long nupela lo we i banisim ol politikel pati.

Kamap bilong Is Sepik brens em namba wan long ol arapela brens moa long kamap. Na long kamapim ol pati brens em i bihainim mama lo aninit long nupela lo bilong Intagriti ov Politikel Pati na Kendidet na pati bilong mi bai mekim olsem long olgeta provins, Sir Michael i tok.

Sapos Nesanel Alaiens i ken go pas long mekim dispela, pati bai i go long bikpela wei tru long kamapim klinpela ileksen, em i tok.

Sir Michael i bin tokaut klia long wok bilong nupela lo na mekimsave bilong en we i banisim ol politikel pati na ol kendidet na tu em i soim klia ol pati memba bilong em long ol pipel bilong Is Sepik.

Sir Michael i go long Rabaul long Trinde aste long opim namba tu provinsal brens bilong Nesanel Alaiens pati. Bihain bai em i go opim narapela brens long Manus na long neks mun bai em i go opim brens long Hagen, Westen Hailans provins.

# Aitape Fri Tred Jon aweanes i go het

SANDAUN Fri Tred Jon (FTZ) aweanes program i-go het na ol papagraun bilong Aitape i wok long holim ol bung yet i stap.

Ol wod memba na papagraun bilong Lemiang, Prou, Vokau, Paj, Pes, Pultulul, Tumleo na Aitape taun i wok long karimaut ol aweanes long Fri Tred jon bikos ol eria bilong ol em ol i luksave pinis olsem dispela wok developmen bai kamapim ol.

Foma administreta bilong Sandaun husat i gat intres long dispela samting em Maran Nataleo i tok ol papagraun i amamas long ol bung na ol bai sapatim FTZ sapos em i kamap tru tru.

Tasol Mista Nataleo i tok moa wok i mas kamap long ol wok painimaut long dispela samting, makim graun na rejistaim na tu, planti papa graun i no klia gut ol as tingting bilong kamapim dispela FTZ.

Em i tok ol papagraun na ol divelopa long dispela projek i mas klia gut long ol gutpela samting we ol pipel bai kisim long projek ya na tu wanem kain developmen em bai kamapim.

Mista Nataleo i tok tripela rot we ol pipel i ken kisim gutpela samting long dispela projek em

long salim graun i go long ol divelopa, lisim o wokim rot we ol divelopa bai i peim hap mani long olgeta mun o yia long yusim graun na bihainim BOOT agrimen long en.

BOOT i ( sanap long bildim, operet, own o papa long samting na trennsfe) em ol wok developmen we ol ausait man o kampani i kirapim na bihain bai lusim kampani long han bilong ol asples o gavman long en.

Em i tok ol sampela bisnis lain bilong Taiwan em bin toktok long ol long Vanimo i gat laik long BOOT agrimen.

Em i tok i bikpela samting olsem ol papagraun i mas klia gut olsem taim ol i salim graun bilong ol o sainim lis na BOOT agrimen ol i nogat kontrol long graun bilong ol.

Mista Nataleo i tok gavman i no katim hap mani long karimaut ol aweanes tasol ol i putim pinis wanpela askim i go long Tred na Industri Minista John Tekwie long givim helpim.

Em i tok nogat mani long karimaut ol aweanes na tu i nogat gutpela wok plen long go hetim dispela program na tu nogat sapat i kam long ol nesanel lida i wok long mekim wari ol komyuniti long dispela samting.

# WANTOK

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon.	Papers distributed by air throughout PNG.
Advertising Manager: Mike Kanin.	Available by air mail subscription within Papua New Guinea and overseas
Editor of Wantok: Yakam Kelo.	Email address: word@global.net.pg

Advertising deadlines: Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.





## Praim Minista tok nogat long sasim ol soldia

PRAIM Minista Sir Mekere Morauta i tokaut olsem bai i nogat wanpela sas o mekim-save i kamap long ol ami long Mosbi husat i bin mekim ol trabel long las wik i kam.

Sir Mekere i tokaut olsem em i givim tok orait bilong em i go long olgeta Difens Fos soldia olsem nogat man bai kisim sas.

Sir Mekere i tokaut olsem em i skelim olsem i nogat gutpela komyunikesen o tok-tok wantaim i bin kamap wantaim ol soldia olsem na i kamapim hel hevi na kros long ol. Em i tok Gavman i kisim dispela hevi long asua we i kamap.


Em i tokaut olsem Nesenel Eksekutiv Kaunsil (NEC) i kamapim disisen pinis long noken karimaut ripot o wok we Eminen Pesens Grup (EPG) i kamapim long mekim ol bikpela senis long Difens Fos. Dispela senis bai lukim mak olsem 2000 ami bai pinis long wok soldia. Dispela rifom bai i no inap go

het, em i tok.

Sir Mekere i tok dispela disisen bilong Kabinet i kamap bikos long bikpela luksave olsem i bin nogat gutpela komyunikesen o tok-tok wantaim i kamap namel long Gavman na ol level bilong PNG Difens Fos. Dispela asua nau i soim olsem bihain taim Difens Fos i mas stap insait na autim tingting bilong ol tu long wanem kain senis o developmen i laik kamap insait long Difens Fos.

Praim Minista i mekim klia olsem Kabinet i givim olgeta wok i go long Minista bilong Difens Kilroy Genia long bung wantaim ol soldia na kisim petisen pepa bilong ol i go long Gavman. Minista i kisim strongpela oda long givim petisen bilong ol soldia i go long Kabinet taim em i kisim, Praim Minista i tok.

Nau mipela i lukluk i go het long toktok gut wantaim Difens Fos, Sir Mekere itok.



• Helt Minista Ludger Mond i katim pamkin kek na WHO rijinol dairekta Shigera Omi i lukluk. Dispela em long Madang las wik insait long bikpela helt miting bilong ol Helt Minista na Dairekta insait long Pasifik rijon. Foto: HELEN REI.

## Mekere paitim rong belo

### YAKAM KELO i raitim

OL ami i mekim nois gen long disisen bilong Nesenel Gavman. Dispela taim em disisen bilong Gavman i sutim stret bel na tingting bilong ol ami we i laik rausim klostu 2000 soldia long Difens fos.

Praim Minista Sir Mekere Morauta i tokaut long Sande olsem Nesenel Eksekutiv Kaunsil (NEC) i wanbel long stapim dispela disisen bilong rausim ol ami long wok. Dispela disisen bilong rausim klostu 2000 ami long wok i kamap bihainim wanpela ripot o wok painimaut i go insait long kamapim rifom long operesen na wok bilong PNG Difens fos. Tasol taim ol soldia i laik mekim nois long askim Praim Minista na Gavman long skelim tingting bilong ol ami (petisen), wantu Praim Minista i mekim disisen bilong em yet long rausim dispela ripot na NEC tu harim tok bilong Praim Minista na wanbel long tingting bilong em.

Dispela em namba tu taim ol ami bilong PNG i mekim kain nois olsem salensim Gavman. Namba wan taim em long 1997 we ol soldia i egensim tru Gavman long kisim ol Sandlain ami i kam long go stapim hevi long Bogenvil ailan. Dispela eksen bilong ol ami i pulim sapot bilong olgeta pablik na ol studens we i lukim olpela Praim Minista Sir Julius Chan, Chris Haiveta na Mathias Ijape i lusim sia bilong ol olsem Praim Minista, Fainens Minista na Difens Minista. Olpela memba bilong Henganofi John Giheno i bin kamap Ekting Praim

Minista long ronim wok bilong kabinet na Gavman i go inap long ileksen i kamap long 1997 Julai. Dispela em long mun Mei i go inap long Julai.

Long tasim ol ami olsem yu paitim belo bikos taim belo i kra i bai olgeta pipel i kam na taim olgeta i kam bung, yu dispela man i paitim belo bai olgeta ai na toktok i kam long yu stret. Dispela piksa i kamap pinis long 1997 na em i no nupela samting long Gavman stat long 1997 taim Bill Skate i kamap Praim Minista i kam inap nau.

Praim Minista Sir Mekere Morauta wantaim Gavman bilong em long tude i save long dispela na olsem ol i hariap long kilim dai paia ol i laik laitim na mekim bel bilong ol ami i kol taim Praim Minista i tokaut olsem olgeta soldia husat i mekim bikhet long kisim ol sotgan long banis o mekim bikhet na brukim lo bilong ami i no inap kisim mekimsave. Olgeta i ken stap fri.

Praim Minista yet i tokaut pinis olsem em i no laik bai dispela hevi bilong ol ami bai opim dua long ol arapela politikis toktok na salens i kam insait wantaim. Olsem na em i laik stapim dispela disisen na larim ol samting i stap wankain olsem bipo.

I tru hevi bilong mani long kantri i bikpela bikos strong bilong Kina i pundaun na prais bilong ol kaikai na olgeta samting i go antap. Long mekim ol pipel i pilim hevi moa, Gavman i no laik tru long apim pe bilong ol liklik plentesen na ol rurel woka igo antap long K60 wanpela wik. Na long mekim ol pipel i bel hat olgeta, ol palamen memba wantaim ol dipatmen bos na

judiseri het i kisim bipela pe tru i go antap. Ol pipel i skelim dispela olsem Gavman i no laikim ol pipel i kisim wanpela gutpela presen bikos dispela presen em bilong ol lida yet long kisim. Gavman i save olsem ol pipel i gat bel kros, bel wari na bel hat i stap long planti samting we i kamap long ol insait long kantri. Gavman i save harim dispela olgeta taim long floa bilong palamen taim ol memba i save autim wari bilong ol pipel bilong ol long ol Minista na Praim Minista yet.

Yes, Papua Niugini em narapela kain kantri we yu ken kisim na pilim hevi long olgeta kain hap ol bai i kam long en. Ol ami i go pas nau long hevi na wari bilong ol. Tasol ol arapela grup bai yusim sans nau long karim hevi na wari bilong ol tu i kam long Gavman i lukim na skelim na sampela taim ol lida o politisen yet i save hait insait na pusim ol arapela grup long bringim hevi bilong ol tu i go antap long ai bilong Praim Minista.

Praim Minista yet i bin tokaut klia taim em i kisim Gavman long 1997 olsem Gavman bilong em i no inap tasim ol institusen. Tasol ol bai wok strong moa long strongim ol dispela Gavman institusen. Dispela toktok i abrus tru nau bikos Gavman i wanbel long mekim rifom long Difens Fos. Na bihain Praim Minista yet i bin kamapim disisen gen long rausim disisen bilong Gavman bilong em na NEC i wanbel long noken mekim ol senis long Difens fos. Olsem na em yet i ken mekim disisen long go sindaun wantaim ol ami na harim kra i na wari bilong ol.

## Ol liklik ailan long Bogenvil i sot long kaikai

### VERONICA HATUTASI i raitim

OL PIPEL long ol liklik ailan long Bogenvil i bungim hevi long kaikai i sot, ol ripot i tok.

Dispela ol ailan em Carterets, Nuguria, Tasman na Motlok. Bihainim ripot long dispela hevi, Bogenvil Pis na Restoresen opis (BPRO) i makim Nesenel Gavman na givim K120,000 long baim ol helpim kaikai na salim i go long ol pipel bilong foapela ailan grup ya.

Wantaim K70,000 long dispela mani ol bai baim 40 ton rais na narapela K50,000 em ol bai sataim sip long karim ol kaikai i go long ol ailan ya.

Bogenvil Afeas Minista Moi Avei long dispela wik i tok em i wari long kisim ripot olsem ol pipel long ol dispela liklik ailan long Bogenvil i bungim sot long kaikai. As long dispela hevi em solwara i wok long go antap na karamapim graun long ol ailan na bagarapim ol gaden kaikai na tu, Saiklon Abigeil we i bin kamap strong long las mun na bagarapim ol gaden kaikai moa yet.

Minista Avei i tok bikos i nogat gutpela siping sevis i go long ol dispela liklik ailan, em i hat long salim ol helpim kaikai taim yet hevi i stat long Krismas taim long mun Desemba.


Em i tok hevi i go nogut tru na long ripot we em i kisim, ol pipel i wok long stap long kokonas na pis tasol.

Em i tok Bogenvil edministresen i nogat inap samting long edresim dispela hevi na olsem em i bin askim BPRO long helpim.

Mista Avei i tok ol dispela liklik ailan bilong Bogenvil em ol i hap bilong PNG na gavmani mas helpim ol.

Em i tok em bai salim wanpela gavman investigesen grup long go long ol ailan ya na mekim ripot long dispela hevi.

Em i tok dispela investigesen i mas kamap hariap bikos ripot long en bai gavman i glasim na skelim long givim helpim i go long ol pipel husat i bungim taim nogut long en.



## Pawa bilong makim ol Gutpela Lida o Lida Nogut i stap long vot bilong yumi

TINGTING long laif bilong yu na tingting long sindaun bihain bilong ol pikinini na tumbuna bilong yu na vot long gutpela lida long Ilekse 2002 long makim yu long Nesenel Paliamen.

Sapos yu vot long lida nogut, pren, sindaun bilong yu wantaim ol pikinini na tumbuna bilong yu bai i no gutpela olsem na yu mas tingting gut na vut gut long Nesenel Ilekse neks ya.

Ol Papua Niugini sitisen tasol i ken vot long Nesenel Ilekse. Yu ken vot

sapos krismas bilong yu i 18 ya na antap na yu enrol o putim nem bilong yu pinis long Komon Rol. Komon Rol em i buk wantaim nem bilong olgeta manmeri husat i ken vot long ileksen.

Bipo long olgeta ileksen, Ilektorol Komisen, husat i lukatutim olgeta wok bilong ileksen, i mas stretim Komon Rol bilong ol vota na long las ya yet ol i statim wok long Komon Rol bilong Ilekse 2002. Ol i kblim dispela wok vota enrolmen.

Neks Mande, Mars 25, bai ol ileksen wokmanmeri i pinisim wok long Komon Rol bilong olgeta hap bilong Papuan Rijen. Bai ol i wok long Westen Provins i go inap long Galf Provins, Milin Bei na Noten Provins.

Sentral Provins em i pes asples Papua long stretim Komon Rol bilong ol. Wok long Komon Rol bilong Sentral Provins i pinis long las ya yet wantaim wok long Komon Rol bilong Wes Niu Briten, Manus Provins, Is Niu Briten na Kavieng taun.

Klostu nau bai wok i pinis long Komon Rol bilong Nesenel Kapitel Distrik na Namatanai long Niu Ailan Provins.

Wok long Komon Rol bilong Hailens Rijen na Mamose bai i stat taim Tresuri Dipatmen long Pot Mosbi i tok orait na Ilektorol Komisen i ken opim benk akaunt long putim mani bilong mekim dispela wok.

• PNG Ilektorol Komisen i sponsorim dispela Ilekse Tok Save.



# NIUGINI AILAN NIUS



## MV Sankamap bai kam bek long PNG long neks mun

**VERONICA HATUTASI** i raitim

OL TINGTING i stap nau long salim Bogenvil Provinsel fleksip MV Sankamap we i kisim moa long wanpela kris-mas pinis long Australia long ol i karimaut ol bikpela mentenes long en.

Sip i bin lusim Mosbi long go long Kens Kwinslen klostu long mun Februari las yia na i kam inap tude, em i stap yet.

Hevi long mani bilong baim ol kampani we i bin karimaut ol wok long sip insait long 13 mun, stat yet long mun Februari las yia em bikpela samting we i bin stapim long kam bek hariap long PNG.

Sip i bin go long NQEA Slipwe long Kens, Kwinslen bilong ol long karimaut ol bikpela mentenens wok long en.

Na ol dispela wok wantaim ol kos bilong lukautim ol kru i kostim klostu K3 milien.

Long las yia, Opis bilong Bogenvil Afeas (OBA) i bin peim K2 milien na nau ol i laikim gen samting olsem K600,000 long peim ol wok we ol wan wan kampani i bin karimaut bihain long dispela namba wan hap bilong K2 milien we OBA i baim pinis.

Long ol ripot we Wantok i kisim, ol lain i salim sip i go long Australia i no bin bihain-



• Bogenvil Provinsel fleksip MV Sankamap.

im stretpela rot na tu ol i no bin stretim inap mani pastaim long helpim baim ol wok long mentenes bilong sip bipo ol i salim sip i go long Kens.

Ol ripot we Wantok i kisim long dispela wik i tok sip bai i kam bek nau long neks mun, Epril.

Ripot i tok long nau OBA i tok orait long stretim dispela K600,000 na sip i ken kam bek long PNG.

Ripot i tok em i wok long kostim moa mani long karimaut ol wok mentenens long bikpela sip olsem na ol atoriti i tingting nau long baim wanpela sip we ol inap long lukautim long sait bilong mani.

Planti lain long ailan i wok long wari taim sip i stap aut long ailan long-pela taim tru bikos sip ya i save sevim ailan, moa yet ol liklik ailan olsem Carterets, Motlok, Nissan, Nuguria na Tasman.

OBA i tok taim sip i kam bek long Mosbi, ol kru bai i mekim ol wok we ol i no pinisim long Australia.

Em i tok ol dinau mani we MV Sankamap i gat wantaim ol kampani we i karimaut ol wok na givim sevis em A u \$ 3 0 , 0 0 0 (K51,591.53) long ol wok i no pinis yet, \$40,000 (K68,259.38) long ol wok kontrak ol i karimaut long sip, \$29,769 (K50,800.98) long ol wok ol i karimaut insait long sip, \$28, 103.(K47,957.33) long ol wan wan kampani husat i bin karimaut ol wok na givim sevis i go long sip, na narapela \$29,000 (K49,488.05) long fiul, ol kaikai na ol arapela kos moa.

Nem bilong sampela kampani we i bin karimaut ol wok na sevis long sip em long Not Kwinslen Haidroliks, ABC Steel, NQEA, Taylor Marine, Ash Bratas, Stuart Lovell,

Tropical Reef Shipyard na sampela arapela moa.

Wantok i kisim tok olsem sip bai i no inap long lusim Australia inap em i mekim ol peimen long stretim ol dinau bilong em long Australia we long las wik, OBA i tok em bai baim long en.

Ol arapela kos we kepten na ol kru i kamapim em long K43,814 kes edvens, K2,843.40 long stretim akomodesen o ples bilong slip long ol kru, K2,175 long peim balus tiket, K4,513.73 long ol kaikia, K122 long peim trenspot bilong ol kru, K209 long peim kastom ejen, K12,150.38 long ol kain saplai bilong ol guds na sevis, K1716 long dokumen rivyu, K5,000 kes edvens long stretim ol dinau na K4527.46 long ol telipon we sip i mekim. Totol kos bilong ol dispela samting em K77,075.27.

## Tohian tokaut long stretim ol rot

ROT em i bikpela samting na Nu Ailan Gavana Paul Tohian i tok gavman bilong em bai tromeim bikpela mani long wokim na stretim ol rot long provins.

Gavana Tohian i bin tokim moa long 1,500 pipel husat i bin bung long witnessim opening bilong nupela Namatanai taun maket olsem gavman bilong em bai putim kolta long ol rot we i stap nau long Namatanai na moa yet, em bin promisim 114,000 pipel long provins olsem gavman bilong em bai tromeim moa mani long wokim na stretim ol rot long Namatanai na ol arapela hap bilong provins.

Lihir Bildas i bin wokim dispela nupela

maket long mani mak inap long K161,000.

Kopra em narapela samting tu we Gavana Tohian na gavman bilong em i sapatim bikos em wanpela rot we ol pipel long provins i save kisim mani long en.

Long dispela opisel opening bilong Namatanai maket, Mista Tohian i bin strongim promis bilong em long K500,000 we gavman bilong em i katim i go long Kopra Maketing Bod long provins pinis long helpim peim ol kopra groa taim prais i stap daunbilu tru.

Long baset bilong dispela yia, gavman bilong em i katim K100,000 na long

baset rivyu long mun Jun, gavman bilong em bai katim narapela K400,000 long helpim prais bilong kopra long provins.

Taim Mista Tohian i tok tenkyu long ol komiti memba long redim dispela sere-moni, em bin singaut long edministresen long lukim olsem ol pipel i yusim maket na i no larim em i stap nating.

Em bin singaut tu long presiden bilong Namatanai Lokol Level Gavman Francis Wassau na edministresen long lukautim gut ol samting long maket bikos em i hat long sanapim nupela gen sapos bagarap i kamap.

## Wok long stretim Bogenvil rot bai go het

OL WOK bilong stretim bikpela rot i raunim Bogenvil Ailan i go het.

AusAID i tromeim K4 milien long karimaut ol wok mentenens long stretim rot i stat long Kokopau long Buka i go olsem long Tinputz, Wakunai, Itakara, Birempa na Aropa long Sentrel Bogenvil i go olsem long Buin, Siwai na pinis long Wara Nonopa long Bana Distrik insait long saut Bogenvil.

Wok long dispela rot i bin stat long Oktoba 1999.

Baclay Brothers (PNG) i bin winim K4 milien AusAID kontrak na i kisim ol asples sab kontrakta long karimaut ol wok long olwan wan eria bilong ol.

Provinsel Dipatmen bilong Woks na Implimentesen na Bogenvil Provinsel Edministresen i stap tu insait long wok bilong karimaut mentenens wok long bikpela rot long provins.

AusAID opis long Mosbi i tok long taim namba wan hap long wok i bin stat long 1999, em bin hat long go long planti eria long bikailan bikos rot na planti ol bris i bagarap long wanem i no bin gat mentenens long ol moa long 10-pela krismas taim trabel long ailan i stap.

Tasol taim wok tru tru i stat long mun Epril 2000, ol i putim kolta na stretim 270 kilomita long ol rot we i no bin gat ta long en bipo.

Aninit long projek tu, ol i stretim 23 kilomita bilong rot i go na i kam long wof o bris i seif long ol ka long kisim na lusim ol kago na ol kopra kakau samting long ol sip.

Opis i tok 40 kilomita rot tasol long Panguna we ol BRA paitman i putim tambu na makim olsem "No go zone" long en em nogat mentenens i kamap yet long en.

Opis i tok sapos komyuniti na ol BRA atoriti i givim tok orait olsem ol i

laikim bai ol wok mentenens i kamap long dispela hap eria, ol bai wokim.

Tasol planti memba bilong pablik long Bogenvil husat i save raun long dispela rot i tok i moabeta long ol wok mentenens i kamap bikos planti hap long dispela rot i bagarap.

Moa yet dispela hap rot insait long Panguna main eria we klostu nau rot i bruk long en na i no gutpela long ol ka i ron bihainim rot ya.

Ol pasindia i save pret na pulim win strong na pasim ai taim ol i kamap long dispela hap. Na bris long Wara Jaba i wok long bagarap bikos sampela timba i sting pinis.

Narapela hap rot em long Arawa Panguna rot antap long maunten we i bagarap tu long wanem graun i bruk long en.

AusAID opis i tok ol bin stretim Arakawau bris na taim ol wok long stretim ol hap rot i kamap, ol ples lain i wok long painim isi long yusim rot na salim ol samting in go long maket na tu em i isi na gutpela long kisim ol sevis.

Opis i tok moa olsem rot i helpim nau long skruim ol wok bilong kamapim gutpela sindaun long Bogenvil.


Ol as tingting long karimaut dispela rot projek em long stretim ol seksen bilong rot we i nogat kolta long en, kisim i go insait long dispela wok projek ol komyuniti na ol yut long ailan na olgeta dispela em ol i inapim pinis taim ol i wok wantaim ol komyuniti long asples.

AusAID opis i tok ol gavman bilong Australia na PNG i tok orait pinis long skruim ol wok long dispela projek inap long pinis bioong dispela yia.


Long nau, ol i wok long karimaut ol rot mentenens long ol hap rot long nambis eria.







# SEPIK NIUS



## Is Wape LLG presiden samonim Eddy Saweni

IS Wape Lokok Level Gavman -presiden, Dominic Sume i kisim pinis samon pepa long Aitape kot haus na i bin sevim long Eddy Saweni yet long Trinde Mas 7 long Aitape hotel.

Dispela samons i bihainim sampela toktok em memba bilong Aitape Lumi, Eddy Saweni, i bin mekim long wape bung long Lumi long Januari we Dominic Sume i tok i bagarapim nem bilong em na 7-pela arapela man.

Mista Sume i tok memba i bin tok olsem memba bilong Vanimo

Green, Micah Wes, i bin braibim ol long K3,000 long vot long em na i no long Eddy Saweni taim ol i bin resis long Gavana taim John Tekwie i bin kisim ministri long Nesenel Gavman.

"I nogat man i braibim mipela na mipela i no bin kisim K3,000 long Micah Wes. Mipela i votim em bikos em i bin helpim ol pipel bilong Is Wape long K7,000 long rejisterim ILG bilong Saut Wes Wape timba eria bipo long resis bilong Gavana.

"Em i bin helpim tu Lumi haus sik na plis taim em i stap yet

olsem palamen memba, olsem na mipela i votim em bikos mipela i bilip olsem em inap long bringim developmen," Mista Sume i tok.

Ol narapela husat i bin tingting tu long kisim samons tu long memba em ol LLG presiden; Sebby Wamrabus Is Aitape, Hendry Wene Wres Wape, David Wambo Amanab LLG, Mathew Sangu Meya Vanimo Taun Atoriti, Martin Negai Imonda LLG, Patrick Muliale Wutung, One, Bewani LLG.

## 100 sekyuriti opisa pinisim trening long Vanimo

FELIX RAMRAM i raitim

WANPELA nupela sekyuriti kampani insait long Vanimo taun ol i kolim Waznan 2000 Limited, long Fraide 9 Mas i lukim 100 sekyuriti opisa i pinisim 4-pela wik trening na kisim setifiket bilong ol.

Long dispela bung Sandaun edministreta Conficius Ikoirere i tok, em i amamas tru olsem Sandaun i kisim luksave bilong sampela ausait bisnis lain we ol i lukim olsem Sandaun i ken givim ol sampela samting na amamas bilong wok long wok. Olsem na ol i bringim as tingting bilong bisnis na wok bilong ol i go insait long provins.

"Dispela nupela wok kamap i wape bung sampela samting long sait bilong wok sekyuriti. Bipeka tru long ol dispela taim we planti kain senis na developmen bai i kamap insait long provins. Dispela wok sekyuriti i wapeka piksa ol narapela pikinini bilong Sandaun i mas bihainim," Mista Ikoirere i tokaut.

Em i tok wanem samting Wazman 2000 i kamapim pinis long Vanimo i makim mak bilong gutpela wok dispela kampani bai i bringim i go long liklik taun na komyuniti bilong Vanimo long longpela taim i kam bihain.

Em i tok tu olsem i gutpela long lukim olsem wapeka pikinini bilong Sandaun yet i wapeka long ol lain bai i go pas long lukautim na ronim wok bilong sekyuriti aninit long nem bilong Wazman 2000 Limited. Olsem na wantaim dispela gutpela piksa ol narapela pikinini Sandaun i mas tingting long kam bek long provins. Na kamapim ol arapela bisnis we bai givim wok long ol yangpela bilong provins.

Edministreta i tokim ol lain i bung tu olsem long dispela taim we provins i wok long develop, na wantaim tu planti toktok na ripot i promotim ol astingting bilong Fri Tred Jon. Wantaim planti ol gutpela samting Fri Tred Jon bai i bringim long developim Sandaun na kantri olgeta. Dispela liklik mak we liklik lain i kisim pepa bilong ol long wok sekyuriti i wapeka bipeka samting. We i mas stap pastaim bipo long Fri Tred Jon na ol arapela developmen i kam bihain.

Mista Ikoirere i tok em i gat bipeka amamas na i tenkim pepa na Menesing Dairekta bilong Wazman 2000 Ltd. Mista Peter Aigilo, long makim Sandaun na bringim sekyuriti kampani bilong em i go insait long kamapim mak bilong em olsem wapeka developmen insait long provins.

"Mi save gut long Peter Aigilo olsem Plis Komisina bipo, Mista Aigilo i kamapim wapeka skim insait long rot long Mosbi ol i kolim komyuniti Polising Skim. Na dispela skim em i kirapim i save mekim wok insait long Morata na Gerehu, 2-pela eria we i save gat planti bikhet pasin i save kamap olgeta taim.

Tasol sori dispela taim i no stap longpela taim maski planti i welkamim dispela skim. I gat ol lain tu i no sapotim dispela skim husat long ol i stap insait long Gavman.

"Tasol wanem samting yumi lukim i kamap long ai bilong mipela hia long Vanimo i piksa bilong dispela skim Mista Aigilo i bin kirapim bipo long Mosbi, nau wantaim nupela nem ol i kolim Wazman 2000," Conficius Ikoirere i tokaut.

"Kam bilong Wazman 2000 long provins, dispela bai i givim bipeka helpim tru long wok bilong daunim raskol na planti ol bikhet pasin insait long Vanimo bai i stap gutpela tasol olsem nau. Namba bilong ol manmeri na pikinini i wok long sut i go antap olgeta mun. Ol kainkain wok developmen i wok long kamap na bai i kam moa yet, na bikos long ol dispela samting. Planti stil, ol bikhet na raskol pasin bai i sut i go antap na mipela i mas redi long bungim ol dispela kain hevi na trabel bai kam."

Edministreta i tok kam bilong Wazman 2000 long Vanimo i kamap long taim we i stret long planti wok developmen i redi long kamap. Na wok bilong dispela kampani tu bai i helpim tru wok bilong plis na ol gavman ejensi husat long ol i save mekim wankain wok i isi.

Mista Ikoirere i givim wapeka tok-save tu olsem ol lain bilong Wazman 2000 i mas save, bipeka tru Peter Aigilo olsem Menesing Dairekta. Mista Ikoirere i tokaut olsem planti lain insait long bilong Vanimo taun em ol ples klostu i kisim planti kain tingting nogut. Long kirapim bilong dispela komyuniti kampani long Vanimo. Ol memba bilong komyuniti i bilip i gat sampela kain sait tingting i stap beksait long kirapim bilong Wazman 2000 sekyuriti kampani.

"Tasol salens bilong ol i go long Menesing Dairekta bilong Wazman 2000, Peter Aigilo olsem. Taim i gat dispela kain tingting nogut i stap, planti tu i welkamim kam bilong Wazman 2000 sekyuriti kampani.

Sapos ol i mekim gutpela wok, dispela tasol bai i rausim kain paul tingting Vanimo komyuniti i gat long dispela sekyuriti kampani."

Dispela 100 sekyuriti opisa i kam long Aitape, Lumi, Nuku, Telefomin, Green River na Vanimo distrik. Wazman 2000 i winim tu kontrak long sanapim ol sekyuriti opisa bilong em.

Husat long ol bai i mekim wok long lukautim ol opis na haus slip wantaim ol woksap na somil bilong Vanimo Fores Prodaks. Kampani tu i kisim luksave i kam long kampani W&R Parker long Aitape na tu Aitape Katolik Misin. Husat long ol i gat laik long givim wok kontrak i go long dispela sekyuriti kampani.

## Tumleo Ailan selebretim St Joseph Pestode

MATHEW PAIYAU i raitim

SAMTING olsem 300 manmeri i bin kamap long selebretim St. Joseph Pestode long St. Joseph Peris, Tumleo Ailan, long Mande Mas 19. Vika Jenerel bilong Aitape Daioses na Peris Pris bilong St. Ignatius Katidrel Peris, Pater Chinua, i bin go pas long misa.

I go wantaim Pater Chinua long dispela selebresen em Sista Maria na Rose bilong MFIC Conven long Aitape, na Katekis Noel wantaim ol lituji grup memba bilong St. Theresa na St Joachim sab peris bilong St. Ignatius Katidrel Peris.

Misa selebresen i bin stap long peris stesin nambis aninit long ol diwai we gutpela win i bin kamap na mekim

misa selebresen i bin kamap nais tru. Insait long misa i bin gat ol drama bihainim tok bilong God i stori long laip bilong Santu Joseph long singaut bilong God.

Pater Chinua i tok, "Pikinini diwai i bin pundaun pas long dispela ailan bai sampela bilong yumi i ken kamap Pater, sista na bruda.

"Yumi mas bihainim

stretpela pasin bilong Santu Joseph, em i stretpela man long ai bilong God", Pater Chinua i tok.

Bihain long misa i bin gat ol kainkain pilai olsem drama, eksen song, na ol spot olsem soka na volibal wantaim liklik kaikai na dring.

Ol narapela sab peris insait long St. Ignatius Katidrel Peris i bin holim tu misa long selebretim dispela pestode.

## Ol pipel lotu aninit long diwai

OL pipel bilong Rainikir long Aindrin na Tainapin i wok long lotu aninit long diwai na wetim nupela haus lotu bilong ol long pinis.

Ol i stat mekim haus lotu las yia namel long mun Ogas na Septemba na ol i bilip olsem em bai pinis long pinis bilong dispela mun.

Ol komyuniti yet wok long putim han wantaim long mekim dispela haus lotu wantaim ol samting ol i kisim long bus.

Ol komyuniti yet i bungim mani olsem K420.52. Helpim tu i kam long Ministry of Aindrin/Tainapin, fanraising, Aindrin viles komyuniti, Tainapin viles komyuniti, leta raiting, yut grup bilong Aindrin na Tainapin, Rainikir komyuniti skul, LLG wod memba, Lokol Level Gavman memba bilong Aindrin na Tainapin. Herman Semo i tok olsem rot bilong wokabaut i go

long bikples Malol long lotu i longwe na tu rot i no gutpela olsem na ol i laik wokim haus lotu bilong ol yet.

Mista Semo tok mipela i lusim tu bikos i gat ol wanwan lain i stap save bikhet na bagarapim nem bilong olgeta lain Malol, mipela i les long olsem.

Sab Paris siaman, Conny Amawaruw i tok olsem i gat liklik lain givim nem nogut tasol olgeta 10,500 Katolik manmeri long Malol i singaut yet long Pater i mas kamap long Malol paris.

Nau yet i nogat Pater o sista long paris. I gat tupela katekis i save stap na mekim lotu long ol lain.

Em tok: "Tru mipela nogat Pater na ol sista tasol ol pipel ol i no lusim bilip bilong ol. Ol i save wok strong long lotu. Tasol i save gat wari long sait bilong skul long

ol sakramen olsem pes konfesio, komonio na marit. Mipela laikim tru wapeka Pater."

Katekis Joe Erame i tok tu olsem taim Pater na sista i lusim ol las yia wok bilong paris i no pundaun em i stap strong. Ol pipel i amamas long wokim wok bilong ol maski i nogat Pater, ol i sanap long bilip bilong ol.

Katekis Joe i tok tu olsem ol i pasim tok pinis long kamapim ritrit long dispela taim bilong Lent.

Em tok ol i gat plen long mekim wapeka strongpela haus lotu. Ol yet i wok long mekim fan-reising long kisim mani na i askim long Diocese long helpim ol tu.

Olgeta i tok olsem wapeka problem ol i gat em i rot na komunikesen i pundaun na ol i save kisim ol infomesen leit.

**trukai.**  
RICE



**SAPOS NAMBA BILONG YU ISTAP LONG HIA.  
YU WINIM K200**

B01357897 A01630483 B00833915 D01661039  
F01523533 C01675371 A01350545  
F00657876 E00913028 E01689765


LONG KISIM PRAIS BILONG YU. GO LONG TRUKAI DISTRIBUTION CENTRE.



# SAUTEN



# RIJON




## Minista laik opim gen raba projek long Kep Rodni

Minista bilong Difens Kilroy Genia i lukluk nau long opim gen raba projek insait long Kep Rodni insait long Sentrel provins.

Dispela projek i bin wok pastaim aninit long lukaut bilong wanpela Melesian kampani tasol klostu wanpela krismas na 6-pela mun olgeta dispela projek i no moa wok i kam inap nau.

Mista Genia i singautim ol pablik sevans na ol fama long Kep Rodni eria long kam sanap wantaim na traim long kirapim bek dispela projek. Sapos dispela projek i kirap na ron gen, em inap pulim mani olsem K60,000 long wanpela mun.

I gat luksava olsem dispela Melesian kampani i bin lusim dispela raba projek bikos ol rot bilong ka i ron na mekim wok i no gupela long sapatim na strongim dispela raba projek. Na tu prais bilong raba i bin pundaun we i wanpela as kampani ya i stapim wok.



• Minista bilong Difens Kilroy Genia.

## Ol Milen Be lida i abrusim Asembli bai kisim taim

MILEN Be Provinsal Asembli i laik kisim strong-pela eksen egensim ol nesanel lida na lokol level gavman presiden husat i no save kamap long asembli kibung wantaim nogat gutpela as.

Gavana bilong Milen Be provins Titus Philemon i tokaut long dispela eksen long Mande dispela wik taim em i opim namba wan asembli bung bilong dispela yia 2001.

Asembli bai i no inap oraitim ol lida i givim kain kain toktok long lusim kibung bikos planti taim ol lida i save toksave long ol i no inap kamap long bung tasol astingting ol i laik lusim bung i no stret olgeta olsem na dispela pasin i mas stop, Mista Philemon i tok.

Mista Philemon i tokim asembli olsem long nau i go, husat lida i laik lusim asembli bung, em i mas

raitim toksave pas wantaim as em i laik tusim bung. Dispela pas i mas go long Asembli Klak Napoleon Bapera.

Husat memba ino mekim dispela bai asembli i skelim olsem em i lusim bung na nogat gutpela as, em i tok.

Aninit long Ogenik Lo long Provinsal na Lokol Level Gavman, husat memba i no kamap long asembli kibung tripela taim olgeta na i nogat gutpela as long en, bai em i pinis long kamap olsem memba bilong asembli.

Presiden bilong Weraura lokol level gavman na Lida bilong Gavman Samson Banige i bin ritim tok sori bilong Minista bilong Provinsal na Lokol Gavman Afeas-lairo Lasaro na presiden bilong Kiriwina lokol level gavman na siaman bilong Kalsa na Turism Tom

Cameron.

Mista Banige i tokaut olsem Mista Lasaro i nogat taim long kamap long bung bikos em i pas long ol arapela bikpela wok bilong Minista na Mista Cameron i ino kamap bikos em i stap insait long woksop bilong ol risev plis long Losuia.

Mista Lasaro na Mista Cameron bai kamap long bung long dispela wik we bai i pinis long Fraide tumoro.

Ol memba husat i no bin kamap long asembli bung na ino bin raitim pas long toksave long wanem as ol i no kamap em, Rijinol memba bilong Milen Be Dem Josephine Abaijah, memba bilong Kiriwina Goodenough na Minista bilong Sosel Welfea na Developmen William Ebenosi na memba bilong Esa'ala John Kanadi.

## Plen i kamap long stretim Aroma rot

OL plen i kamap pinis long kirapim bikpela wok mentenens long Aroma rot insait long Sentrel provins.

Sentrel Provinsal Gavman bai wok

klostu na bung wan-taim Minista bilong Difens Kilroy Genia long yusim ol Difens Enjiniering Batelion long karimaut dispela wok.

Sentrel Provinsal

Gavman bai redim mani mak olsem K300,000 long putim i go insait long dispela wok bilong rot mentenens.

Sentrel Gavana Opa Taurekta na

Difens Minista Kilroy Genia i holim toktok pinis insait long bung bilong Join Distrik na Buset Praioriti Komiti long Moreguina ples insait long Rigo distrik long las wik.

## Skate i egensim NCDC long bagarapim ol strit maket

OPOSISEN lida na memba bilong Nesanel Kapitel Distrik Bill Skate i toktok strong egensim Nesanel Kapitel Distrik Komisn (NCDC) long stapim na rausim ol manmeri long salim ol samting long strit we dispela i ken pusim ol pipel long mekim ol bikhet rta trabel pasin long painim mani.

Mista Skate i mekim dispela toktok bihain long ol wokman bilong NCDC i go aut na rausim na kapsaitim ol samting ol manmeri i wok long salim long mekim mani insait long siti.

“Wanem samting yupela i mekim i wok long pusim ol manmeri long noken sapatim ol yet. Gavman i nogat wanpela gutpela plen na rot bilong helpim ol liklik manmeri i helpim ol yet long ol liklik wok bisnis nabaut. Komisn i wok long rausim ol manmeri i go longwe long rot bilong ol pipel i traim long helpim na sapatim ol yet.

“Ating ol dispela manmeri i save tu olsem dispela Gavman i pusim ol manmeri i go long mak we kos bilong



• Opoisen lida Bill Skate.

baim olgeta samting i antap tru.

“Yu bin apim skul fi i go antap, prais bilong ol kaikai na ol samting long stua i go antap, interes reit na namba bilong ol manmeri i painim wok i antap tru, prais bilong petrol, kerosin na diesel i antap tru. Olsem na ol manmeri i painim rpt i go long dispela rot bilong salim ol samting long rot long mekim

mani long baim sampela samting ol i mas kisim long stap laip na strong.

“Bilong wanem na panisim ol manmeri husat i laik helpim em yet. Komisn (NCDC) i bagarapim tru ol pipel, brukim ol eksi bilong ol, kapsaitim ol kiau na tro-woi ol buai nabaut na ol arapela samting ol i wok long salim. Husat bai bai givim mani long ol dispela turangu tain long ol samting bilong ol we NCDC i bagarapim?”

“Dispela em i egensim tru pasin bilong humen raits. Bai ol pipel i bihainim to olsem wanem taim ol lain bilong karimaut to i wok long brukim lo,” Mista Skate i tok.

Olpela Gavana bilong NCD i singaut long NCDC long noken mekim dispela kain pasin bilong go brukim na kapsaitim ol samting nabaut. Tasol ol i mas kamap wantaim sampela gutpela rot na plen bilong ol pipel i bihainim we i nogat trabel na siti i ken stap klin tu. Na i no bilong panisim ol turangu manmeri bilong Mosbi siti.

# BOROKO FOODWORLD

AT GORDONS

<p>Dispela Wik</p> <table border="0" style="width: 100%;"> <tr><td>Roots Rice 1kg</td><td style="text-align: right;">K1.39</td></tr> <tr><td>Sunshine Milk Powder 200gr</td><td style="text-align: right;">K2.90</td></tr> <tr><td>Bushells Tea Bags 25</td><td style="text-align: right;">K0.90t</td></tr> <tr><td>Weet Bix 375</td><td style="text-align: right;">K3.95</td></tr> <tr><td>Diana Tuna 380gr</td><td style="text-align: right;">K2.40</td></tr> <tr><td>Globe Curry Chicken 300gr</td><td style="text-align: right;">K2.30</td></tr> </table>	Roots Rice 1kg	K1.39	Sunshine Milk Powder 200gr	K2.90	Bushells Tea Bags 25	K0.90t	Weet Bix 375	K3.95	Diana Tuna 380gr	K2.40	Globe Curry Chicken 300gr	K2.30	<p><i>Supa Spesol Prais!</i></p> <table border="0" style="width: 100%;"> <tr><td>Roots Rice 10kg</td><td style="text-align: right;">K14.74</td></tr> <tr><td>Dazzle Bleach 1250ml</td><td style="text-align: right;">K2.75</td></tr> <tr><td>Nambawan Cordial 2ltr</td><td style="text-align: right;">K3.48</td></tr> <tr><td>Ox &amp; Palm Taper 340gr</td><td style="text-align: right;">K3.19</td></tr> <tr><td>Meadow Lea Oil 250ml</td><td style="text-align: right;">K1.15</td></tr> <tr><td>Arrow Beef Biscuit 85gr</td><td style="text-align: right;">K0.45t</td></tr> </table>	Roots Rice 10kg	K14.74	Dazzle Bleach 1250ml	K2.75	Nambawan Cordial 2ltr	K3.48	Ox & Palm Taper 340gr	K3.19	Meadow Lea Oil 250ml	K1.15	Arrow Beef Biscuit 85gr	K0.45t
Roots Rice 1kg	K1.39																								
Sunshine Milk Powder 200gr	K2.90																								
Bushells Tea Bags 25	K0.90t																								
Weet Bix 375	K3.95																								
Diana Tuna 380gr	K2.40																								
Globe Curry Chicken 300gr	K2.30																								
Roots Rice 10kg	K14.74																								
Dazzle Bleach 1250ml	K2.75																								
Nambawan Cordial 2ltr	K3.48																								
Ox & Palm Taper 340gr	K3.19																								
Meadow Lea Oil 250ml	K1.15																								
Arrow Beef Biscuit 85gr	K0.45t																								

*Hamamas na baim kaikai long Boroko Foodworld Gordons!*

Planti moa kaikai prais i go daun long en!  
Ph: 325 7566, 325 7310 Fax: 325 7096

**EXTENDED TRADING HOURS**  
Monday to Wednesday 7:00am to 7:30pm  
Thursday / Friday 7:00am to 8:00pm  
Saturday / Sunday 7:00am to 10:00pm



# HAILANS NUIS



## Is Goroka Praimeri Skul opim nupela edministresen opis

SAPE METTA | raitim

LONG Fraide wik i go pinis, Is Goroka praimeri skul long Isten Hailans i bin lukim opening bilong nupela edministresen opis bilong en. AusAID aninit long Beicamp Sevis Program husat i go pas long kamapim dispela opis.

Na dispela nupela edministresen opis em i namba wan kain opis em AusAID i go pas long helpim na kamapim insait long Goroka na long PNG tu. Dispela kain helpim i no i go yet long ol arapela provins.

Long taim bilong opisel opening bilong dispela nupela edministresen bilding, ges spika na provinsel edvaisa husat i makim AusAID, Dokta Allan Pop i tok AusAID aninit long gavman bilong Australia i amamas tasol long helpim na sapotim ol wok we ol lain PNG bai i ken helpim long en. Na edukesen em i wanpela long ol dispela wok we bai i ken helpim planti lain skul pikinini nau na long ol yia i kam bihain.

Em i tok nau yet AusAID i wokim pinis plen na pasim tingting long kirapim ol edministresen opis wankain olsem dispela long Is Goroka praimeri skul insait long wanwan arapela praimeri skul long Goroka na Isten Hailans.

Dokta Pop i tok dispela opis i no

inap long kamap, tasol long pasin bilong wokbung wantaim Goroka Eben Lokel Levlo Gavman, ol Bod ov Dairektas bilong Is Goroka Praimeri skul na ol konstraksen wokas bilong Frameworks aninit long lukaut bilong bosman, Robert lai, dispela edministresen bilding i sanap na i redi nau long ol skul wokas long yusim.

Em i tok dispela program i karamapim tu ol arapela praimeri

skul insait long Goroka olsem Faniufa praimeri skul, Wes Goroka na Not Goroka.

Dokta Pop i tok tu olsem nau yet long plen, 69 arapela kaunsil eria insait long kantri bai kisim wankain helpim.

Bihain long opening bilong dispela nupela opis, Goroka taun Meya, Michael Gotaha i tok tenkyu long wokbung na kamapim dispela nupela opis.

Em i tok kain opis i ken helpim tru skul long sait bilong karim aut ol edministresen wok bilong en.

Mista Gotaha i tok, "long pasin bilong gutpela tingting na wokbung wantaim, kaikai bilong en i kamap na nau yumi olgeta lain husat i kamap long hia i lukim pinis."

Em i surikim toktok i go moa na i tok em i laikim moa helpim na i askim AusAID sapos i gat sampela moa patnasip sevis program long

bihain, em bai amamas tasol long sapotim na wokbung wantaim AusAID long kamapim moa developmen insait long Goroka na Isten Hailans. Bod ov Dairektas Siaman bilong Is Goroka Praimeri Skul, Siaman Parka i bin sapotim toktok bilong Meya Gotaha na i tok bikpela amamas long AusAID long mekim skul bilong en na kirapim dispela namba wan edministresen bilding insait long Is Goroka praimeri skul.

Em i tok tenkyu tu long Dokta Pop husat i bin wok hat tru long i go pas na ogenaisen ol wok bilong kirapim dispela nupela opis. Mista Parak i tok Is Goroka Praimeri Skul i gat moa long 900 sumatin husat i skul stat long elementri na i go antap long top ap gret 8. Na tu skul ya i gat moa long 20 tisa na ol arapela woman na meri.

Em i tok dispela nupela edministresen blok we i kos moa long K50,000 bai i ken helpim tru ol edministresen wok bilong skul.

• **Provinsel edvaisa na mausman bilong AusAID Dokta Allan Pop (lephan) i givim ki bilong nupela edministresen opis bilong skul long Goroka Taun Meya Michael Gotaha. Sanap lukluk istap em Bod ov Menesmen siaman Simon Parak.**



## Imbongu lida laikim gavman long tok klia long developmen

WANPELA lida long Imbongu eria bilong Sauten Hailens provins i askim gavman long tok klia long wanem kain ol developmen i bin kamap long kantri insait long 28 krismas taim kantri i bin kisim independens.

Paulus Pandeia em i wanpela olupela mejistret long Orei viles i tok em i laik save long ol plen na polisi bilong ol gavman bilong bipo i kam inap nau i go we.

"Mipela lukim ol gavman kam na go. Mipela lukim ol yia i flai

long ai bilong mipela tasol samting mipela i laik save em ol developmen ol dispela gavman i sapos long kamapim."

Em i tok planti ol pipel long ples i no kisim ol sevis bilong gavman na gavman i mas tokaut stret we ol sevis ya i go na bilong wanem ol pipel i no kisim ol sevis.

Mista Pandeia i tok ol viles pipel i kisim taim long laip bilong nau we pei bilong olgeta samting i go antap, ol i kisim taim long dispela Valiu Edet Takis (VAT), nogat

gutpela marasin long ol haus sik na ol rot i bagarap.

Em i tok em i laik save bilong wanem na ol pipel long ples i no kisim ol sevis na tok sapos em i rong bilong ol pipel long ples orait ol i mas toksave long ol bai ol i ken senisim ol pasin bilong ol.

Em i tok kain sistem bilong givim sevis long dispela kantri i gat stall bilong em yet. Gavman i apim nem bilong em olsem em i givim sevis na ol pipel i wet yet long kisim ol sevis.

## Lukautim sipsip long Sauten Hailens gat gutpela sans

OL PLES long Lek Koplago distrik bilong Sauten Hailens provins i gat bikpela tingting long kamapim ol sipsip projek.

Ol pipel i askim pinis Dipatmen bilong Agrikalsa na Laipstok (DAL) na provinsel edministresen long apim namba bilong ol sipsip long kantri long bridim na skelim i go long ol lain husat i gat laik long lukautim sipsip.

Wanpela kaunsela Ronald Kendope i bin go long hetkwata bilong DAL long Mosbi long toktok long dispela samting wantaim ol opisa bilong Fud Sekuriti Brens na askim tu long help bilong ol.

Mista Kendope i tok Lek Koplago i wanpela las ples long sait bilong developmen na ol pipel i mas gat sans long kamapim sampela liklik bisnis. Planti pipel i laik lukautim sipsip na i luk olsem sipsip faming i gat sans long kamap bikpela. Em i laikim DAL long givim planti sipsip bai ol i ken dabolim namba bilong ol

na givim long ol pipel long ol viles.

Mista Kendope i tok intres bilong sipsip i bin kamap strong taim ol pipel i lukim wanpela sipsip projek long Lane viles we gavman bilong Frans i bin fandim we mak bilong mani i sanap olsem K96,000. DAL i bin givim 38 sipsip long dispela projek na tu wanpela sipsip ekstensen opisa bilong DAL i bin helpim dispela sipsip projek we eitpela grup bilong ol yut na ol meri i bin stap insait.

Mista Kendope i bin helpim tu dispela projek na tok projek i nidim moa fanding na askim DAL long givim moa trening long sait bilong lukautim sipsip na ol narapela wok bilong sipsip faming we dispela i ken kirapim tingting bilong ol yangpela pipel long stap insait long kain projek.

Em i tok sipsip projek long Lane viles i no inap long benefitim olgeta 40,000 pipel bilong distrik olsem na i gat nid long apim namba bilong ol sipsip long givim aut long ol narapela fama.

Sweetest thing  
Great for the office  
Great for the village

**2in1**

**Sugar and Tea Pack**


A combination of 25 Ramu Sugar sachets of sweet cane sugar from the Ramu Valley and 25 National No.1 Tea bags of carefully selected tea leaves from the Highlands

Now that's refreshing





# MADANG NIUS



## Paillet projek long promotim helt i kamap gut

OL paillet projek o trael projek ol i makim olsem ol model bilong promotim ol helti komyuniti envaramen na kamapim gutpela laip i wok long kamap gut long Madang.

Ol projek ya em ol graun toilet, pam bilong pulim wara long graun, tenk wara na klinim ol viles.

Ekting provinsel helt edvaisa, Dokta Markus Kachau i tok ol projek i olsem model o makim gutpela helti viles na dis-

pela tingting i kam long Wol Helt Ogenaisesen na Helt Dipatmen bilong ol helti ailan na helti nesen o kantri.

Dispela tingting i bin kamap long 1998 long mekim ol pipel bilong Pasifik we PNG i stap insait tu long luksave long helt bilong ol yet insait long ol eria o ples ol i stap long en.

Helt Dipatmen long 1998 i kam inap nau i wok long putim moa tingting long priventiv

helt o mekim ol samting long stap helti we dispela i kamap olsem wanpela polisi daireksen insait long 2001-2010 Nesenel Helt Plen.

Las wik ol helt ministra insait long Pasifik i bin kam holim wanpela bung bilong ol long Madang Risot Hotel na olsem pat bilong dispela bung, ol i bin go lukim ol dispela paillet projek.

Ogenaising komiti bilong dispela kon-

frens bilong ol helt ministra i bin makim Siar Viles, Sagalau Demonstresen Skul na Madang taun maket olsem ol paillet projek we ol biklain ya i bin go lukim.

Ol dispela ples i stap klostu long taun na isi long go long ka.

Nesenel Gavman i bin fandim dispela konfrens wantaim K100,000, Madang Provinsel Gavman putim K50,000 na WHO putim K60,000.

## Skul saplai bai klostu kamap long Madang

OL elementri, komyuniti na praimeri skul long Madang Provins bai kisim ol skul saplai bilong ol long stat bilong neks mun.

Menesing Dairekta bilong Mamose Skul Saplai, Pius Bugatar i mekim dispela toktok.

Long wanpela liklik bung na kaikai we Mista Bugatar yet i bin holim long Osenia Restoren, em i tok ol nambawan kontena bilong ol skul saplai bai lusim Nu Silan long dispela wik na kamap long Madang long tupela wik taim.

Ol lain husat i bin go long dispela bung em sian bilong edukesen na memba bilong Raikos, Stahl Musa, edministreta Clant Alok na edvaisa bilong edukesen, Bill Salbung Sei.

Stap long dispela bung tu em fainensial kontrola, Mark Harvey na eksport menesa, Alistair Haig bilong Kroksli Stesineri Saplai long Nu Silan. Kroksli Stesineri i wanpela wol klas stesineri manufeksera, impota na distributa na kampani i gat 120 krismas long mekim dispela bisnis na i kontrolim samting olsem 60 pesen bilong stesineri maket long Nu Silan.

Mista Bugatar i tok taim ol saplai i kamap long Madang bai ol i kisim ol saplai i go stret long ol skul. Em i tok ol i redi tasol long karimaut dispela wok. Olsem 60,000 skul pikinini long provins bai kisim benefit long dispela.

Mamose Skul Saplai i pasim toktok pinis long kisim ol saplai i go stret long dua bilong ol skul olsem kontrak pepa i tok. Bikos bipo dispela kain pasin i nogat na sampela skul i no save kisim ol saplai bilong ol hariap. Sampela taim ol saplai i save bagarap na sot.

Ol pikinini long Provins i gat rait long kisim gutpela edukesen na ol i mas gat ol gutpela buk o materiel long lainim samting na kisim save.

Mista Bugatar i tok ol kontena bilong teks buk i kamap pinis long Lae na ol kontena bai kam long Madang long taim stret long ol i ken skelim aut long ol skul.

Edministreta Alok i tok em i amamas olsem ol skul saplai bai kam long Provins na em i laik bai ol lain bilong skelim ol saplai i go long ol skul mas mekim kwik bikos bipo Madang Provinsel Gavman i bin traim tupela kontrakta long mekim dispela wok tasol i no bin kamap gut.

Long dispela tasol na Mista Alok i tok em i laik lukim ol saplaia nau ol i kisim ol long karimaut gut kontrak bilong ol.

Mista Alok i tok amamas tu long lukim Mista Harvey na Mista Haig long go long Madang na em i tok dispela i soim olsem olgeta samting bai orait nau.

Mista Harvey na Mista Haig i tok tupela i amamas long go bungim ol edukesen lain long Madang na tok tupela bai stretim olgeta rot long mekim bai saplai i kam hariap long Madang na ol skul i ken kisim ol saplai bilong ol.

Tupela man ya i tok tupela i laik kamapim wanpela gutpela rilesensip wantaim Madang na PNG na tupela i bilip i gat gutpela sans long dispela.

tesis stat long  
12 March - pinis 7 April 2001

WINIM KAIN KAIN  
Coca-Cola PRAIZ  
GET CAUGHT  
RED  
HANDED™  
Enjoy  
Coca-Cola

IGAT SANS LO WINIM OL GUTPELA 'COCA-COLA' PRAIZ TAIM YU BAIM AIS KOL 'COCA-COLA', BAI IGAT SAMPELA LAIN BILONG 'COCA-COLA' I RAUN NA SAPOS OL 'KATCHIM YU' WANTAIM 'COCA-COLA' BLO YU MAN, EM YU LAKI NAU. PLENTI TAUSEN CAP, 'T' SHET NA KAIN KAIN PRAIZ LO WINIM I STAP.

500 ml  
Coca-Cola  
enjoy  
Coca-Cola  
enjoy

enjoy life with 'Coca-Cola'

COCA-COLA AND 'enjoy' ARE REGISTERED TRADE MARKS OF THE COCA-COLA COMPANY



# Lae Nius

## FM Morobe i kisim bikpela sapot

NUPELA redio stesin long Morobe provins ol i kolim 94.7 FM Morobe i kisim bikpela luk-save long ol pipel bilong Lae siti bihain tasol long wanpela mun em i statim wok bilong em long Lae.

Dispela redio stesin i statim wok bilong em long Fraide Feburari 9 long taun opis bilong em na i kisim bikpela sapot tru we i lukim olsem moa long 5000 manmeri i go raun lukim dispela redio stesin insait long 4-pela wik taim redio ya i statim wok bilong em i kam. Mak olsem 5,000 lain i salim ol askim na laik bilong ol telefon na teks olgeta de.

krai bilong FM Morobe i go aut tu long ol autstesin na distrik long provins olsem long Lae na Makam Veli, Wau na Bulolo na Ramu Veli i go long Finsafen. Ol manmeri long ol dispela hap i save tanim redio bilong ol na harim krai bilong ol musik na nius na ol progrem o toktok i kamap long dispela

redio stesin.

Siaman bilong Hirad Limited husat i papa kampani bilong dispela redio stesin, Gereaa Aopi i autim bikpela tok amamas tru long bikpela sapot ol pipel bilong Morobe i soim long dispela redio stesin. Mista Aopi i tok dispela i soim olsem ol tingting bilong ol long kamapim ol rijinol redio stesin i wok gut. Olsem na em i tok bikpela tenkyu long ol pipel bilong Morobe long soim dispela sapot long ol.

Mista Aopi i tokaut tu olsem kampani bilong ol i tingting long surukim dispela kain redio stesin i go aut long ol arapela rijon olsem Hailans na Niugini Ailan na ol toktok i kamap pinis long dispela samting. Sauten rijon i kisim pinis redio stesin bilong ol we ol i kolim FM Sentrel na i pulim bikpela interes tru insait long Mosbi siti na ol ples na autstesin insait long Sentrel provins.

## Pipel i no klia long kot bilong VAT lo, Conelius i tok

### YAKAM KELO i raitim

SALENS bilong Morobe Provinsal Gavman egensim disisen bilong Nesenel Palamen long kamapim takis lo ol i kolim Veliu Eded Takis (VAT) i no sanap klia yet long wanem mak na wanem hap dispela salens o kempen i stap nau.

Deputi Gavana bilong Morobe provins Smith Conelius i tokaut long wanpela pas bilong em olsem Morobe Gavana Luther Wenge i bin go pas long kamapim dispela tingting na Morobe Provinsal Gavman i bin givim pinis K444,000 long 1998 long wok bilong salensim dispela VAT o takis lo long kot.

Mista Conelius i tok long las yia gen, Morobe Gavman i peim narapela K100,000 i go long Pato Lawyers (loya) tasol i nogat gutpela as bilong givim dispela mani i go long dispela loya kampani ya.

Mista Conelius i tok ol dispela mani i go long Pato Lawyers bihainim tok orait bilong Morobe Gavana Luther Wenge tasol.

Wantok i traim long toktok wantaim Gavana Luther Wenge long las wik long Mosbi. Opis bilong em long Palamen i kisim toksave tasol emi no bin bekim.

Wantok i lusim toksave tu wantaim Pato Lawyer long Tunde dispela wik long Alfred Manase i ken toktok liklik long dispela wok bilong enti VAT kempen. Tasol em tu i no bin bekim singaut bilong Wantok.

Wantok i bin lusim toksave wantaim opis bilong Gavana Wenge long Lae long toktok wantaim siaman bilong Enti VAT kempen Roy Miringke long las wik inap dispela wik tasol nogat bekim i kam.

Mista Conelius i tokaut tu olsem wok bilong egensim dispela VAT takis i bin kisim bikpela sapot tru bilong planti tausen manmeri bilong Morobe provins na ol i tromoi bikpela mani tru i go insait long dispela kempen. Olsem na ol i mas save long rekot bilong mani na wanem kain wok i kamap pinis long dispela kempen bilong salensim dispela VAT takis ya.

Dispela kempen bilong enti VAT i go go tu long Hagen, Mosbi na Kimbe na planti manmeri i bin putim mani i go long dispela kempen.

VAT takis i kamap lo pinis we Palamen i pasim olsem na wanem senis long em i mas go bek gen long Palamen long brukim na skelim. Suprim Kot tu i ken skelim dispela lo na tokaut sapos lo i ken go bek long Palamen long mekim sampela moa senis antap.

## I nogat trabel long Igam Bareks

IGAM Bareks long Lae i no bungim wanpela hevi long las wik na wiken taim ol ami long het kota long Mosbi i mekim ol kros egensim Neseñel Gavman na rausim na samting bilong pait long haus banis bilong lukautim ol samting bilong pait. Komanding opisa Lutenen Kenel Verave Mae i tokaut long FM

Morobe olsem ol pipel long Lae, ol bisnis haus na komyuniti na ol Gavman opis na ol wokmanmeri i noken pret bikos ol ami bilong Igam Bareks i sanap strong long wok aninit long lo na karimaut oda bilong Gavman bilong PNG.

Mista Mae i tokaut olsem i tru i gat sampela paul tingting i kamap

namel long ol membas bilong enjiniaring Batelion long Igam, tasol olgeta samting i go daun isi na pinis.

Bos bilong Igam Bareks i bin holim toktok tu wantaim Lae Samba ov Komes na Industri, Morobe Edministresen na Siti Kaunsil las wik Fraide. Long Mande mon-

ing em i go bungim Gavana Luther Wenge long haus bilong em na toktok wantaim em long dispela samting.

Mista Mae i tokim ol komyuniti long Lae siti olsem i nogat wanpela samting ol pipel bai wari long en na bai i nogat wanpela bikpela hevi i kamap long lo na oda.

## Kabwum distrik kisim namba 5 top ap skul



• Mamba Ginson Saonu (wantaim hat) i sanap wantaim mausman bilong Morobe Edukesen opis na tupela nupela elementri tisa bilong Isan praimeru skul long fran bilong haus bilong tupela tisa ya.

OL pipel bilong Isan, Urop, Mek, Danatom na olgeta hap bilong Yopno eria long Yus Lokol Level Gavman kaunsil eria long Kabwum distrik i gat top ap praimeru skul. Isan Komyuniti Skul nau i kamap namba 5 top ap praimeru skul insait long Kabwum distrik.

Tripela top ap skul em Ombo, Kabwum na Konge we olpela Praim Minista Sir Julius Chan wantaim mamba bilong Kabwum Ginson Saonu i bin opim long 1996. Indagen top ap praimeru skul em Mista Saonu i tokaut long en long las yia 2000. Mista Saonu long Mas 10, 2001 i tokaut gen long Isan top ap praimeru skul we i bringim namba

bilong top ap skul long distrik i go antap long 5-pela olgeta na sampela moa bai kamap bihain.

Long witnesim dispela de bilong opim top ap skul long Isan, ol mausman bilong Provinsal Divisen bilong Edukesen, Evenjelikel Luteran Sios (ELC-PNG) edukesen opis, Distrik edministreta na ol sios lida bilong Teptep seket na ol wod kaunsil na ol viles kot opisel i bung wantaim long witnesim tokaut bilong Isan top ap praimeru skul.

Mamba Ginson Saonu i tokim ol manmeri bilong Isan long ol i mas wok bung gut wantaim ol tisa na ol lida bilong ples long strongim wok

bilong skul. Em i tok yumj i amamas long kisim top ap tasol hevi bilong top ap em bikpela na yupela wantaim mipela i mas wok bung wantaim long karim hevi bilong skul na kamapim long level bilong top ap.

Long soim amamas na bekim bilong mamba Mista Saonu, ol pipel i tokim mamba olsem dispela top ap em yu yet i opim na yu yet bai strongim na bai i go bikpela olsem na bai mipela i strongim yu gen long ileksen i kam. Ol pipel i tok ol i bilip long wok bilong mamba na kamap bilong em long Isan ples na tu long planti bilong hap bilong Kabwum distrik.

## Bisop Arnold Arowae selebretim namba wan Anivesari bilong Episkopal Odinisen

**OKSALERI** Bisop bilong Wabag, Arnold Arowae long isipela we i selebretim nambawan anivesari bilong em wantaim bikpela amamas na tenkyu long God. Liklik selebrenen i bin kamap long Good Shepherd Parish long Mas 4. Bisop bilong Wabag Diosis, Hermann Raich (SVD), sampela pris, tupela dikon, ol relijes, na ol seminari i bin kam na selebret wantaim Bisop na mekim ples i pulap long laip na amamas.

Bisop Arnold i tok olsem laip i pulap long amamas, bel isi na selebrenen long Jubili yia, 2000 long em na pipel bilong Enga. Long episkopal odinisen bilong em long Jubili yia ol pipel i wok bung wantaim gut, stap bel isi na amamas wantaim. Tude, Bisop i tok, laip i wok long senis bikos kainkain senis na pasin long sosesol na politikel laip i mekim sindaun bilong ol pipel i bagarap na i no kamap gut tumas.

Long wok bilong em olsem wasman bilong ol pipel bilong em long Enga, Bisop Arnold i poinim aut sampela problem na hevi i wok long daunim laip na bilip bilong ol pipel. Em i tok olsem sosesol na politikel pasin na gris, planti ol sosesol senis i wok long kamap hariap, pait na planti arapela i wok long bringim planti hevi na problem long famili na komyuniti.

## Karismetik Semina i kamap long Arawa

**KATOLIK** Karismetik grup long kantri i bin holim enuel Kerismetik semina bilong ol long Arawa tupela wik i go pinis.

Samting olsem 600 pipel i bin stap long bung we i bin kisim wanpela wik, stat long Februari 28 na pinis long Mas 4.

Ol lain i bin stap insait long bung i kam long olgeta hap bilong Bogenvil olsem long Buka, Nissan, Panguna, Siwai, Suir na Arawa.

Pater Neville Dunne em wanpela MSC pater bilong Rabaul na Pater Victor Roche em wanpela SVD bilong Hagen Daiosis i bin go pas long semina.

Het tok bilong semina em long "How to become a Catholic Christian in the present situation in Bougainville". Long Tok Pisin dispela i min olsem Hau bai wanpela i ken kamap gutpela Kristen long kain sindaun tude long Bogenvil.

Semina i bin kamap long Arawa Katolik Sios.

Sampela long ol samting we ol i bin lukluk long ol insait long semina ya em long Nupela laip long Jisas, Groa long Spirit, Ol wok bilong papamama na ol pikinini insait long famili, Pasin bilong pogiving na hiling, Evanjelaisesen na ol arapela moa.

Long de taim ol i save skruim ol bung toktok long ol samting na long nait ol prea miting i save kamap.

Long Sande, prea reli we i bin kamap long Marimari haus lotu i bin pulim moa long 2,000 pipel long en. Ol memba bilong ol arapela sios tu i bin go insait long reli ya wantaim ol Katolik na ol i bin pre long kisim hiling, pasin bilong pogiv na yuniti o bung wantaim.

Ol wan wan komyuniti i bin putim kamap ol aitem long strongim bilip bilong ol.

Ol spika long dispela nait em long wanpela Paramaun sief, Saplen bilong Pis Monitering Grup, Pater Dunne na Pater Roche.

Ol lain husat i bin ogenaisem dispela semina em long Josephine Nakin bilong Buka na ol memba bilong Sevis Komiti olsem Morris na Theresia Onabari, Francisca, Mathew na Pater Louis Dobosi bilong Arawa Peris.

## Olpela misinari long Aitape Daiosis i dai

**MATHEW PAIYAU i raitim**

**SAMTING** olsem 700 pipel i bin bung long Sen Ignisus Peris Katitrel long Aitape las wik long tingim ol wok we leit Pater Gerald Walsh OFM i bin mekim long hap taim em i stap laip.

Pater Gerard i bin kari-maut wok misineri insait long PNG long 41 krismas, stat long 1955 taim em i kam pastaim olsem wanpela yangpela pater inap em i lusim kantri long 1996 bihain long sik i kisim em na em i go stap long ples bilong em long Melbon, Australia.

Pater Gerard i bin wanpela long ol namba wan Francesken pater husat i bin go kamap long Aitape na kirapim wok misin long hap, stat wantaim Lumi long 1956.

Em i bin kirapim ol misin stesen long ol inlen eria bilong Nuku na Lumi long Sandaun na Rom i bin luk-save long hatwok bilong em wantaim ol arapela Fransesken Pater na long Novemba 1956, ol bin kamapim Daiosis bilong Aitape.

Long 1956, em na nara-pela poroman P. Dennis long sen Anna i bin statim Sen Anna skul na wokim rot i go insait long dispela misin na skul.

Long 1957 em bin opim wok misin long nupela stesen em Nuku. Long 1963, em bin statim wok long kirapim Sen Ignisus skul.

Bihain em bin kam long Mosbi na lukautim trening bilong ol Francesken pater. Long 1980 inap long 1983, Pater Gerald i bin holim wok olsem rekta o bos long Holi Spirit Seminari, Bomana. Bihain em bin go statim Francesken wok long Wes Nu Briten. Long plati yia tu em bin was gut long balus sevis, FRANAIR. Las wok bilong en em bin stap olsem Francesken Minista Provinsel na long 1996, sik i bin painim em na em i go bek long Australia.

Pater Timothy Elliott OFM i bin tok Pater Gerald i bin paionia misineri husat i bin go pas long kirapim ol helt na edukesen sevis long Aitape Daiosis we ol pipel i i benefit long en tude.

Aitape bisnisman husat i stap long hap long longpela taim tu Robert Parer i tok taim em (Mista Parer) i yangpela manki yet long Tajji, em i lukim olsem Pater Gerald i man bilong wok hat husat i save toktok planti long wok developmen na mekim kamap ol samting. Em bin save toktok planti long ol samting wantaim ol kiap.

"Mi laik tok olsem em i wanpela trupela Francesken," Mista Parer i tok.

Pater Gerald i bin dai long Mas 7 long Melbon bihain long sik we i bin kisim em long sampela yia.

Ol i bin holim ol Misa lotu long Aitape na Mosbi long tingim ol wok bilong em na planti lain i bin kamap long ol.

## Katolik na Angliken bung lukluk long ol hevi

**MOA** long 50 memba bilong Katolik na Angliken Sios bilong PNG na Solomon Ailan i bin bung long Alexishafen long Madang long stap insait long enuel bung bilong ol long dispela yia.

Bung i bin lukluk long sampela ol bikpela samting i wok long kamap long nesanel level insait long kantri olsem ikonomi o wok mani, ol hevi bilong ol yut we ol bin skruim wantaim het tok "Wokabout wantaim ol yut i go aninit long lukaut bilong Bikpela".

Praim Minista Sir Mekere Morauta i bin wokim sampela toktok long dispela bung.

Sir Mekere i bin tok long wok patna namel long stet na ol Sios em i bikpela samting long sevim ol pipel.

Presiden bilong Federesen Pater Joachim Rego i bin tok konprens i luksave long ol yut na i tok hevi i no stap long ol olsem planti taim pablik na gavman i save sutim tok i go long ol.

Tasol em bin tok ol i save bungim ol hevi long laip bilong ol na ol i save autim belhat bilong ol long sosaiti.

Sampela ol hevi we ol yut bilong tude i bungim na bung i bin lukluk long na traim painim ol rot bilong daunim ol em long :

- Nogat ol gutpela piksa long ol papamama na ol lida,
- Nogat mining long laip bilong ol na ol i stap long kalsa we i no gutpela na planti bagarap long ol samting i kamap long en

- Pasin tumbuna i pundaun
- Hevi long skul sistem we planti long ol yut i no kisim wok o ol i kamap ol drop aut aninit long sistem

- Nogat sans long skruim save na kisim wok

- Ol gutpela pasin Kristen na tumbuna i bruk daun.

Pater Joachim i bin tok wanpela aweanes program we ol bai karimaut na i stap nau long plen bilong ol em ol i kolim long "Nogat long Vai lens".

Konfrens i bin lukluk tu long wanem samting bai 2002 nesanel ileksen i kamapim long pulim tingting bilong ol yut long bihain taim bilong ol na tu rot we ol politikel lida i ken kamap olsem ol gutpela piksa long sosaiti long ol yangpela na pablik i lukluk long ol na bihainim pasin bilong ol.

Pater Joachim i tok em i wari long ol strongpela toktok we tupela lida bilong tupela sinia politikel pati i bin yusim long ol wok redi bilong ol long 2002 nesanel ileksen.

"Vai lens o ol strongpela kros toktok bai kamapim tasol ol vaiolen o ol bekim i no gutpela.

Mipela i salensim ol lida bilong ol politikel pati long yusim ol gutpela toktok we bai ol pipel i luksave long gutpela lidasip i bihainim demokretik ilektorel sistem bilong kantri," Pater Joachim i tok.

Em bin salensim ol vota long tingting gut na glasim gut ol lida bipo ol i givim vot bilong ol.

## Pumakos yut statim yia bilong Yut na Krai

**BRADLEY NAVI i raitim**

**KATOLIK** Sios i makim dispela yia 2001 olsem yia bilong Yut na Krai. Yut bilong Pumakos Peris long Wapanamanda distrik, Enga provins i bin statim yia bilong Yut na Krai long wanpela autris i kamap long 18 inap long 24 bilong mun Februari. As tingting bilong dispela autris i bilong helpim na bringim sampela awenes long planti ol yut na peris long ol hevi samting i wok long kamap long politikal na sosesol laip bilong pipel, sindaun bilong ol wantaim ol arapela na wantaim Krai.

Long dispela autris, ol yut i bin toktok strong long drak abius (spak brus), pamuk pasin, gris bilong politiks, praivetaisesen, visin na misin bilong Wabag Diosis.

Insait long dispela autris, tenpela yut lida bilong tenpela komyuniti i bin lidim. Ol yut lida wantaim moa long 30 arapela yut i wokabout long lek long wanpela viles i go long nara-pela. Ol i bin stap wan belo o sampela taim wanpela de long sampela komyuniti. Planti komyuniti i amamas long dispela wokabout bilong ol na welkamim ol. Ol Yut i bin givim toktok long ol pipel long maket ples na long ol haus lotu long wanwan komyuniti. Planti yu i bin soim interes, laik na kam



• Sampela ol yut husat i raun long autris.

bung long harim tok ol givim. Planti papamama tu i bin kamap long harim tok ol i givim. Dispela i mekim bel bilong ol yut lida i amamas moa yet long wanem, papamama i nambawan tisa long famili long skulim ol pikinini long kamap bikpela wantaim gutpela kristen pasin. Ol pikinini long dispela gutpela skul ol i kisim long papamama bai helpim ol bihain long stap gutpela na strongpela manmeri long komyuniti na long sosaiti.

Planti ol samting long sosesol na politikal laip i wok long mekim sindaun bilong ol yut i hat na bagarap. Gutpela na

strongpela bilip bilong ol yut save lus na pundaun long kain taim olsem. Ol i no painim hop, gutpela mining long mekim sampela gutpela wok o bihainim gutpela pasin. Long dispela autris i bin kamap, ol yut i gat save long ol hevi samting i wok long kamap na bagarapim laip bilong planti yangpela i traim long helpim ol arapela yut o yangpela long kisim luksave na traim long abrusim o daunim ol samting nogut i wok long kamap na bagarapim laip bilong ol insait long famili, komyuniti na sosaiti.

Pater, Josep Mesa (SVD), parish pris bilong ol yut i givim

strongpela tok long ol i mas wokabout wantaim Jisas long 2001 na oltaim. Em i salensim ol yut long pas tru wantaim Krai na i no hap hap tasol. Pater i tok strong tu long ol i mas wok bung wantaim na mekim laip bilong ol olsem kontribusen long laip na Sios bilong Wabag.

Dispela autris i bin pinis long belo taim long 24 Februari long Olemanda komyuniti wantaim santu misa. Ol yut lida bilong wanwan komyuniti i wok bung wantaim gut namel long ol yet na peris pris long mekim dispela autris i kamap nambawan tru.



### LO BILONG GOD EM I STREPELA TRU

Yu yet yu bin wokim mi, na yu save was gut long mi. Yu givim tingting long mi bai mi inap lainim gut olgeta lo bilong yu. Ol manmeri i save pret long yu bai ol i lukim mi na amamas, long wanem, mi bilip long promis bilong yu. Bikpela, mi save olgeta lo bilong yu i stret tasol. Yu tingting long stretim pasin bilong mi tasol, na yu givim hevi long mi.

Buk Song 119 : 73 - 75.



# Karambi askim ol pipel long mekim 2002 ileksen kamap gut

OL pipel bilong Madang mas luksave long 2002 nesanel ileksen na wok bung wantaim ol opisa bilong ilektorel husat i stap nau long Madang long stretim komon rol o nem bilong olgeta manmeri husat inap long vot.

Bipo sif ov staf insait long Gavman bilong Bill Skate, Mark Karambi i mekim dispela toktok na tok ol pipel i mas luksave long ileksen bilong neks

yia bikos disisen bilong ol long makim ol lida bai senisim laip bilong ol.

Em i tok vot bilong ol long neks yia bai wanpela bikpela samting ol i mekim long laip bilong ol na famili bilong ol.

Mista Karambi i tok olgeta man na meri antap long kris-mas bilong 18 i mas save olsem vot bilong ol em i bikpela samting bikos vot

bilong ol bai makim wanem rot em laip bilong ol bai go long narapela faipela yia.

Em i askim ol pipel bilong Madang long wok wantaim ol ilektorel opisa long mekim ileksen i kamap gut long provins.

Mista Karambi i risain long wok bilong em olsem sif edvaisa bilong Spika bilong Palamen, Bernard Narokobi na nau em i stap long Madang.

## Nupela senta long helpim kalabus lain bai pinis klostu

### JAIVE SMARE i raitim

WANPELA krietiv na rihebilitesen senta bai pinis long dispela mun long Beon Koreksenel Institut na taim senta i redi bai ol kalabus-manmeri long hap i ken yusim long mekim pilai, danis na ol narapela samting. Ol i bin statim biding bilong senta long las yia na fanding i bin kam long Madang Provinsel Gavman.

Rihebilitesen na welfe opisa long Institut, Jackson Gubag i tok senta bai

sevim ol lain kalabus olsem klasrum na krietiv woksop.

Mista Gubag i tok ol kalabus lain i save sindaun long nait na de na mekim ol plen na taim ol i gat samting long han bilong ol, ol i save mekim kamap ol plen bilong ol.

Em i tok ol i wok long lukluk long ol na lukim ol sem ol kalabus man na meri i gat planti talen long mekim kainkain samting olsem na ol i bildim senta long mekim olsem wanpela projek.

Bipo ol kalabus i save yusim ol olupela bek long mekim ol belt long haus kalabus. Ol woda i kisim ol dispela belt bikos dispela i no bihainim lo na ol kalabus i ken yusim belt long kilim narapela kalabusman.


Mista Gubag i tok taim senta i pinis bai ol kalabus lain i stap insait long ol projek long tism ol skils long mekim ol belt, mekim ol bek o bilum na mekim ol plawa pot long ol olupela taia bilong ka.

Ol kalabus lain i ken surukim edukesen

bilong ol long mekim ol distens edukesen kos we gavman i givim subsidi.

Mista Gubag i tok bipo ol i save tromoi tasol ol kalabus lain long haus kalabus na lus tinting long ol taim ol i pinis long hap na go aut. Nau ol i traim long mekim ol liklik samting long helpim ol.

Em i tok taim ol i stap long haus kalabus bai ol i lainim sampela samting na i no inap westim taim bilong ol long stap nating na go bek long ples bilong ol nating.



## Traipela tru!

• Tuwo Ine husat i gat 3-pela krismas i holim 3-pela dabol painapol. Dispela painapol i groa long gaden bilong ol long Goroka.

## Ol kaunsil long Sandaun kisim kompyuta sistem

OL wok i go het nau long joinim olgeta LLG kaunsil insait long Sandaun i go wantaim Provinsel Treseri Opis bilong provins wantaim ol kompyuta. Wok bilong dispela kompyuta sistem em long lukautim olgeta akauns bilong 16 lokel Levul Gavman insait long Sandaun.

Ripot i tokaut olsem nau yet i gat 16 benk akaun na dispela i kamapim planti hevi tumas. Long taim ol i putim olgeta kompyuta pinis, bai ol i pasim 16 LLG akaun ya na opim tasol 4-pela nupela benk akauns aninit long nem bilong Aitape Lumi Distrik LLG Opereting Akaun, Nuku Distrik LLG Opereting akaun, Telefomin Distrik LLG Opereting Akaun na Vanimo Green Distrik (Opereting) LLG Opereting Akaun.

Na 4-pela LLG distrik ya tu bai i gat sek buk bilong ol yet we wanpela kampani long Lae bai i raitim kamap.

Bihainim dispela wok bilong raitim kamap ol dispela sek buk, wanem ol mani i stap bek long akaun bilong wanwan LLG wantaim helpim bilong Dipatmen bilong Fainens na Treseri, ol bai i peim ol dispela mani i go insait long dispela 4-pela nupela benk akaun bilong

ol LLG.

Provinsel Tresera bilong Sandaun Mista Robert Rere i tokaut, olsem ol lain husat bai i sainim ol benk akaun em tupela Pe Opisa na tupela kaunta saining opisa. Ol dispela opisa bai i kam long wanwan Distrik Treseri Opisa.

Em i tok moa olsem dispela sistem i no nupela insait long Sandaun, bikos Sandaun Provinsel Gavman na Sandaun provinsel edministresen i yusim nau dispela sistem. Nau yet Aitape tasol i operet long kompyuta sistem wantaim Vanimo long wok bilong mani yusim dispela sistem. Ol opiseli wok long stretim bilong Vanimo Green na bihain ol narapela distrik.

Mista Rere i tok dispela sistem bai i kamapim planti senis we bai i nogat paul wok i kamap olsem yusim moa mani we i no stap long akaun, helpim long mekim ol wok bilong mani i isi na hariap, kisim ol stretpela na trupela ripot bilong hamas mani ol LLG i yusim pinis na wanem ol mani wanwan LLG i putim i go insait olsem reveniu bilong ol.

"Olsem na mi askim strong olgeta distrik edministreta, ol presiden na kaunsil long wokbung wantaim Provinsel Treseri Opis long Vanimo long

lukim wok bilong yumi long joinim olgeta dispela 16 Lokel Levul Gavman insait long Sandaun, yusim dispela kompyuta sistem.

Insait long dispela 4-pela LLG distrik i kamap gut na isi wantaim Provinsel Treseri Opis long Vanimo," Provinsel Tresera Mista Rere i tokaut.

Sandaun long tupela wik i go pinis i bin holim tupela wik kos we i trenim ol LLG kodineta wantaim ol treseri opisa bilong Sandaun. Long redim ol long wok long dispela ol kompyuta masin taim ol i putim insait long ol distrik.

Kea Teka Gavana bilong Sandaun Martin Negai i tokaut olsem Gavman bilong provins i amamas tru long wok Robert Rere i mekim long bringim dispela nupela senis. Na dispela senis bai i as bilong sampela wok kamap bilong LLG we planti taim i save kisim longpela taim long ol opisa i muv i go kam long stretim.

Bikpela tru long sait bilong mani bipo long ol wok i ken go het. Em i tok aut bai provins i gat dispela nupela akaunting sistem i stap, ol LLG i ken muv isi long bringim ol sevim na developim i go daun tru long ol pipel insait long ol ruel distrik.

# Sekim ol ovasis lain i karim gan

### FELIX RAMRAM i raitim

OL wokman na ol papagraun insait long Vanimo i singautim ol atoriti insait long Vanimo long sekim ripot we i tok olsem wanpela ausait lain long Vanimo i save karim gan. Na ol i laik save sapos ol dispela lain i gat laisens long karim ol ol gan o nogat.

Wantok i kisim ripot olsem i gat pinis sampela buria i kamap we sampela long ol dispela ausait lain i yusim ol gan santu long pretim pipel, bikpela tru long ples bilong wok. Tasol taim ol i ripot long ol dispela pasin birua we ol dispela lain ausait i stap insait long ol. Inap nau i nogat wan-

pela eksen ol atoriti insait long Vanimo i mekim, bikpela tru long karim aut investigesen. Na painim aut sapos ol dispela lain i gat laisens long yusim dispela ol liklik gan long hensem na pretim ol pipel bilong Papua Niugini.

Wanpela hai level gavman opisa insait long Vanimo i tokim Wantok olsem i gat ripot ol i kisim pinis i karamapim dispela hevi. Na ol tu i save husat ol dispela lain ovasis i save karim gan long taim ol i raun mekim wok bilong ol. Tasol bikos ol lain husat i bungim dispela kain birua i no kamap na ripot stret long ol. Dispela nau i mekim wok bilong bihainim na investigetim

dispela kain ripot i hat.

Dispela hai level gavman opisa i tokaut tu olsem ol yet i save long husat i save "saplain ol gan" ya i go long dispela lain ovasis. Tasol em i no tokaut sapos opis we em i save wok long en i mekim pinis o bai i mekim sampela wok bihainim dispela ol ripot.

Las yia Wantok i ripot long wanpela pasin birua i kamap we wanpela ausait lain i yusim gan long pretim ol papagraun long Vanimo na tu narapela i kamap insait long opis. Ripot i tok ol i ripotim dispela ol birua pasin long plis, tasol plis i tokaut olsem i nogat kain ripot olsem i stap long han bilong ol na olsem nogat wanpela samting ol inap mekim.

# MUN MAS TAIA RANAUT

## LONG HANKOOK NA MICHELIN TAIA



**Ela Motors TYRES**

# 20% OFF

LONG RITEL PRAIS



**HANKOOK TYRES**



**MICHELIN**

HARIAP NA NO KEN LUSIM DISPELA SANS...DISPELA MUN TASOL!

PORT MORESBY PH 3229400 LAE 4722322 KOKOPO 9829100 MADANG 8522188 GOROKA 7321844 MT. HAGEN 5421898 WEWAK 8562255 KAVIENG 9542788 KIMBE 9835155 TABULI 5489060 VANIMO 8571254 PORGERA 5479367 BUKA 9739915 LIHIR 9864099 ALOTAU 6410100

EM7088

## Sagalau kisim helti skul taitel

**HELEN REI i raitim**

SAGALAU praimer skul long Madang Provins i kamap olsem wanpela nupela skul long Madang long kisim mak bilong Helt Promoting Skul (HPS).

Ol Helt Minista na Dairekta bilong Pasifik Ailan i bin go raun lukim skul long las wik taim ol i bung long Madang long konfrens bilong ol. Konfrens i bin ron olsem foapela de we ol i toktok long ol bikpela tingting bilong ol ailan i helti.

Hetmasta bilong skul, Beda Katamo i bin soim ol bikman ya raun long skul na soim amamas bilong em long skul i kisim luk-save olsem em i promotim helt.

Em i tok bikpela tingting em i long mekim ples i helti bilong ol studen na ol tisa.

Em i olsem driman bilong olgeta pikinini long Sagalau long ol i mas gat wanpela skul we i helti. Skul i nidim ol gutpela samting bilong ol studen na tisa long lainim ol samting na tis na ol i nidim klasrum na ol haus

bilong ol tisa.

Mista Katamo singautim ol dona ejensi long lukim ol fesiliti long skul na traun long givim sampela fanding.

Ol sumatin i amamasim ol bikman ya wantaim poem bilong ol long drim skul. Helt promoting skul i save givim program bilong promotim helt bilong ol yangpela manmeri long wanem samting ol sumatin i lainim na envaramen bilong skul bilong ol, rilesensip namel long skul na komyuniti na koneksen wantaim ol helt na welfe sevis.

Ol bikpela tingting bilong HPS em:

- Long mekim bai olgeta skul long kantri bai gat klin, sef na naispela envaramen we ol sumatin bai serim wok long lukautim skul bilong ol;

- I mas gat gutpela wara long dring na waswas, klinpela toilet na gutpela skul graun;

- Ol graun o eria bilong skul mas nogat ol drag o marasin nogut, nogat pasin bilong smok na kaikai buai;

- Long kamapim sosel envaramen

bilong skul bai gat amamas na rispek;

- I mas gat ol buk bilong helt we i toktok long ol hevi bilong ol wok long kamap nau na ol helti samting long mekim long kamapim gutpela laip;

- Long promotim ol tisa olsem ol rol model bilong helti pasin;

- Long givim nambawan eid ke sevis long skul na tu orel helt na visen skuring;

- Developim ol mekenisim bilong regula komyunikesen namel long papama, ol komyuniti grup, tisa na ol sumatin; na

- Long kirapim tingting bilong ol papama long kamapim gutpela famili laip we ol pikinini bilong ol i bai kisim gutpela tingting long sait bilong helt na stap helti long skul.

Helt Dipatmen i bin statim HPS long 1995 wantaim Dipatmen bilong Edukesen olsem pat bilong helti ailan tingting.

Wanpela nesenel kodineting komiti i bin kamap long ronim dispela program long olgeta skul long kantri. Olsem 100 skul insait long 14 provins i statim pinis HPS program.

## Trenspot problem pasim ol skul materiel long Vanimo

OL skul materiel bilong ol top-ap skul insait long Nuku distrik bilong Sandaun Provins i kamap pinis long Vanimo.

I luk olsem ol dispela materiel we AusAID i bin donetim bai stap long Vanimo bikos nogat mani long trenspotim ol i go long ol skul.

Seketeri bilong Katolik Edukesen long Daioes bilong Aitape, Linus Keri i tok eduke-

sen opis long Vanimo i askim bod ov menesmen bilong Puang, Wati na Seim top-ap skul long fandim trenspot bilong ol yet.

Provinsel edukesen opis i nogat mani na provinsel gavman i no givim sapat. Em i tok sapos ol i sapatim ol skul, mani i go we.

Mista Keri i tok long askim ol skul i painim hevi long sait bilong mani long fandim trenspot bilong kisim ol

skul materiel i wanpela rabis samting long sait bilong edukesen. Samting i stap nau long han bilong bod ov menesmen bilong tripela top-ap skul long Nuku distrik long kisim ol skul saplai bilong ol.


Mista Keri i tok long las edukesen ripot em i bin toktok long ol hetmasta na ol bod ov menesmen bilong ol tripela skul ya long skul i sot long ol samting

bilong ol sumatin long lainim.

Em i tok ol hetmasta bilong ol tripela top-ap skul wantaim ol stet skul long eria i bin mekim potokopi long ol skul sabjek long yusim long skul.

Ol klas i stat pinis tasol sampela moa tisa i no kamap yet long kisim ol posting bilong ol na Mista Keri i tok em i ting bai ol dispela hevi i stap yet.

## DWU bai statim diploma bilong hospitaliti



• Ol turisim sumatin bilong Divine Word Yunivesiti i givim kaikai long ol helt minista na ol dairekta husat i bin bung long Madang long konfrens bilong ol helt minista insait long Pasifik. DWU i bin singautim ol biklain ya long kaikai haus long yunivesiti long Mande. Foto: HELEN REI.

Teseri Distens Edukesen Senta (TDEC) bilong Diwain Wod Yunivesiti bai statim nambawan diploma kos bilong em long Hospitaliti Menesmen long mun Mei bilong dispela yia.

Kos bai lainim ol studen long ol samting bilong mekim insait long klas na taim ol i stap long wok ples. Kos bai kisim tupela yia long pinisim na ol studen bai go long yunivesiti long skul olsem tupela wik long stat bilong wanwan semesta.

Dispela program i kamap long apim stendet bilong ol hospitaliti sevis insait long kantri na long Madang bai ol studen i mekim ol prektikel wok bilong ol long Madang Risot olsem pat bilong kos bilong ol.

Straksa bilong kos i narapela kain liklik. Studen i ken kisim teseri kwalifikesen na long wanwan taim bai ol i wok ful taim.

TDEC i bin op las yia i wok long givim sampela kos bilong ol pesenel o wokmanmeri bilong hotel na ol narapela hospitaliti bis-

nis. Ol kos ya em diploma ov menesmen, diploma ov yumen risoses menesmen na diploma ov hospitaliti menesmen. Ol i bin developim long lukluk long ol nid bilong hospitaliti indastri na stretim rot bilong ol bisnis long givim ol wokman bilong ol sans long kisim profesenel developmen we bai helpim ol wok ol i save mekim.

Insait long dispela tu wik stadi skul bai ol studen bai stap insait long ol woksop we ol i bai lukluk long ol sabjek bilong narapela semesta. Ol studen bai kisim ol manuel o ol wokbuk we ol i bai yusim long mekim ol wok bilong ol long taim bilong ol yet. Olgeta asainmen bai bes long ol wok ol i mekim long place bilong wok.

Bipo ol studen i save go long narapela kantri o ples na peim bikpela mani long kisim kain save. DWU i givim dispela kos long benefitim ol bisnis sekta na long dispela na dispela kos i kamap olsem mak long PNG long givim ol diploma kos bilong menesmen we kos ya i gat luksave long

intanesenel sait na i gutpela bilong ol profesenel pipel bilong PNG.

Ol i straksarim kos ya long bungim nid bilong ol bik manmeri husat i laik lainim na givim sans long wanwan long kamapim netwok wantaim ol narapela profesenel manmeri husat i mekim ol wanwan wok.

Dispela kos i kostim K9800 we studen i ken baim long wanwan pamen long wanwan semesta long mak bilong K2450.

Ol dispela samting i stap insait long fi:

- Foapela residens stadi skul insait long tupela yia;

- Olgeta modul o toktok i stap long kos em studen yet i ken lainim long taim bilong em yet;

- Olgeta buk samting bilong lainim em ol i makim pinis;

- Ples bilong kaikai na silip taim studen i stap long residensel stadi skul; na

- Ol bai monitarim o putim was long ol studen.

## UPNG laik tisim yumanitarien lo neks yia

FAKALTI bilong Lo long Yunivesiti bilong Papua Niugini i mekim plen pinis long kamapim sampela nupela kos long sait bilong Yumanitarien Lo long neks yia.

Yumanitarien Lo em lo bilong lukluk long olgeta pipel long sait bilong tabel, ol pipel i safe, sapos laip bilong ol pipel i gutpela o nogat na ol narapela samting we i gat ol pipel i stap insait long en.

Nupela Din bilong Fakalti bilong Lo, Eric Kwa i tokim wanpela wan de Infomesen semina long Jiniva Konvensen na ol protokol bilong en olsem PNG i nidim ol lo long lukluk na redim ol disiplin fos olsem ol plis na difens na ol narapela institusen bilong stet long lukluk long ol problem bai kamap bihain.

Mista Kwa i tok PNG i gat lo bilong Intenel Sekuriti Ekt we i tok tok long ol rot bilong abrusim ol problem tasol.

Em i tok PNG i nidim protokol long givim daireksen o soim rot long hau long stretim ol hevi we bai kamap bihain. Introdaksen bilong Intanesenel Yumanitarien Lo long neks yia bai helpim PNG gut long stretim wanem ol hevi bai kam bihain.

Mista Kwa i tok nau yet ol i tisim Yuman Raitis Lo na introdaksen bilong Intanesenel Yumanitarien Lo bai go gut wantaim Yuman Raitis Lo.

Fakalti bilong Lo i stat long tisim Kastomeri Lo long 1992, Provinsel Gavman na Lokol Level Gavman Lo long 1999 na Oltanativ Dispiut Resolusen.

Long wanwan taim Mista Kwa i tok UPNG i wok klostu wantaim Intanesenel Komiti bilong Ret Kros i lukluk long ol kainkain tredisenel lo bilong pait insait long kantri. Lo Fakalti i go pas long dispela.

Atoni Jenerel, Francis Damen i bin opim dispela Infomesen Semina

na tok koneksen namel long Intanesenel Yumanitarien Lo na rispek bilong yuman raitis i mas gat luksave.

Mista Damen i tok Konstitusen o mama lo bilong PNG i gat ol provisen bilong besik na faundamental rait bilong ol man na meri na i gat tokaut bilong stet ov imejensi long taim bilong hevi.

Tasol nogat rot i tok bai ol dispela polisi, lo o institusen i ken prektisim ol dispela yumanitarien tingting we Konstitusen i sapatim.

Em i tok nau em i taim bilong yumi olsem wanpela kantri long lukluk long ol dispela samting na tok tok long en.

Dipatmen bilong Atoni Jenerel i kamapim wanpela miting bilong inta-ejensi bodi long painim ol rot bilong yusim dispela yumanitarien lo.

Man makim Intanesenel Komiti bilong Ret Kros, Alfred Boll na meri makim ICRC long Pasifik, Susan Douglas i bin kondaktim dispela semina.

Ol lain husat i go long dispela semina em Siapesen bilong PNG Ret Kros Sosaiti, Ledi Mina Siaguru, Seketeri Jenerel bilong PNG Ret Kros Sosaiti, Janet Philemon, Pablik Solitsita, Fraser Pitpit, Deputi Sif Mejistret, John Numapo, sampela bikman long Difens Fos, plis, Koreksenel Institut, Dipatmen bilong Sosel Welfe, Foren Afes na Atoni Jenerel.

Atoni Jenerel i tok taim i senis i gat planti ol hevi i kamap insait long wol we ol gan i go pas long stretim ol hevi na PNG em i gat hevi bilong Bogenvil.

Em i tok protokol i mekim rot long hau long stretim ol problem na givim was long ol manmeri long abrusim birua pasin.



## Telepon projek bilong Ling-Stuckey Faundesen kisim taim long bil

WANPELA projek bilong Ling-Stuckey Faundesen long sait bilong ol telepon long ol ruel ples insait long ilektoret bilong Kavieng i no wok long Januari i kam inap nau bikos long ol i no peim ol bil.

Bipo memba bilong Palamen, Ben Micah i bin go pas long dispela projek na Faundesen bilong nau memba bilong Kavieng, lan Ling-Stuckey i menesim dispela projek.

Telikom i tok Ling-Stuckey Faundesen bai peim olgeta bil bikos olgeta pepa soim ol bil i stap aninit long nem bilong Faundesen.

Sampela lain long ples i peim ol bil bilong ol yusim ol mani ol i bin kisim taim ol i sasim ol manmeri husat i bin yusim ol telepon tasol nogat man i save wanem taim bai ol i peim olgeta bil.

Ol viles husat i peim ol bil bilong ol em Umbukul, Pwas, Kone, Vaisavambam, Kulibang, Enang na Piliwa.

I bin gat wanpela luksave olsem Faundesen bai peim olgeta bil long 1998 na bihain bai ol viles i peim ol bil bilong ol yet. Dispela ruel telepon i stap long ilektoret bilong Kavieng tasol ol manmeri i ken mekim ol STD telepon toktok.

Dispela i wankain olsem ring long Umbukul i go long Kavieng na ring long hap i go long Rabaul o ring long Umbukul i go long Tioputuk.

Ol viles we ol i no peim ol bil bilong ol em Lamusmus-K1086.60, Sumuna-K1542.30, Lokono-K723.30, Nonavaul-K194.40, Tugalop-K379.80, UnusaK168.30, Ungalik-K71.10, Tingwon-K2696.40, Meteran-K2241.90, Tioputuk-K1007.40, Lavongai-K110.40, Baungung-K1718 na Kaut-K276.30.



• Ian Ling-Stuckey em menesim dispela projek.

Long wankain taim ol telepon bilong Poliamba Limitet i save wok na stap planti taim maski ol i gat wanpela nupela PABX sistem we ol i bin putim long las yia.

Menesmen bilong Poliamba Limitet i tok ol i bel hat long Telikom i no stretim problem bilong ol hariap na ol i save draiv olsem 50 kilomita i go long taun long yusim ol telepon long hap.

Wanpela wokman long hap i tok dispela problem i bin stat long Januari yet na i gat planti as wai na dispela problem i kamap na wanpela bilong ol em ol stil man i bin stilim ol sola penel na ol narapela em Telikom yet i save.

Wokman ya i tok ol i mekim olgeta samting long autim wari bilong ol long Telikom na Telikom i no mekim wanpela samting yet.

## Taranupi salensim smolholda rais fama long helpim kantri

I GAT salens nau i go long ol smolholda fama o ol liklik bisnis man na meri bilong groim rais long givim kaikai long kantri.


Agrikalsa na Laipstok Minista, Muki Taranupi i givim dispela salens na tok developmen bilong ol rais fam i bikpela long sait bilong ekonomik na tu bai helpim industri bilong rais long kantri.

Mista Taranupi i bin go long Lae long kisim wanpela donesen bilong rais we Gavman bilong Ripablik ov Saina (Taiwan) i bin givim. Donesen bilong 4 ton Taichung Seng 10 rais i bilong distributum i go long ol fama bilong rais. Dispela donesen bai helpim ol fama long groim rais bilong ol yet long kaikai na salim na tu bai ol i gat planti sid bilong rais bilong groim long bihain taim na sapotim ol yet.

Minista i tok bikpela samting long mekim em long givim ol kainkain sid bilong rais, givim skil, trening na save long mekim ol kamap gutpela fama long kamapim kaikai long PNG.

Em i tok rais i bin gro gut tru olsem wanpela smolholda krop long planti hap bilong kantri long planti yia nau na polisi bilong gavman nau em long promotim o helpim rais faming. Gavman i lukim olsem groim rais long smolholda faming i pat bilong Nesenel Fud Sekuriti Program.

Bikpela tingting o lukluk nau i stap long ol liklik skel rais prodaksen we sapos olgeta lain i wok bung wantaim bai ol i ken



• Agrikalsa minista, Muki Taranupi.

kamapim gut prodaksen o mekim bilong rais insait long kantri. Rais em i gutpela bikos ol i ken haitim i stap bilong bihain taim kantri i painim hevi na kaikai i sot.

Rais em i wanpela kaikai we kantri i save westim planti mani stret na dispela i winim ol narapela kaikai bilong arapela ol kantri we i save kam insait long kantri. Nau yet volium bilong rais ol i save kisim i kam insait long kantri i sanap olsem 150,000 i go long 170,000 tan long wanwan yia. Planti ol manmeri long PNG i save kaikai moa rais na dispela i min olsem rais em i gat nem long sait bilong kaikai long kantri.

Mista Taranupi i tok visen o

lukluk bilong gavman em long rausim poveti o pasin bilong nogat kaikai na pipel i dai long hangre long dispela nupela milenum. Long kamapim dispela samting, olgeta pipel i mas mekim bai olgeta pipel bilong dispela kantri i mas gat gutpela kaikai na kaikai i mas planti long mekim ol pipel i helti na laip bilong ol i mas gat amamas.

Gavman i tingting long sotim namba bilong kisim rais na grein i kam insait long kantri long mak bilong 2 pesen long olgeta yia insait long wanpela intigretet faming sistem, kamapim planti rot bilong mekim mani na mekim ol samting long kamapim pasin bilong helpim ol famili long gat gutpela kaikai long sait bilong sekuriti bilong kaikai.

Em i tok polisi bilong nesanel fud sekuriti i holim pas ol lain bilong groim kaikai, ol lain bilong stretim kaikai na ol lain bilong kaikai. Polisi i karamapim planti ol toktok long sait bilong groim o kamapim kaikai, skelim na maketim, stretim, kamapim gut na storim na i go tu long sait bilong populesen na edukesen, employemen na inkam o mani, wok bilong ol meri, ol tingting bilong envaramen o ol samting long bus, nambis na skai, hau-

long menesim gut ol risos na strong bilong baim ol samting long narapela kantri. Gavman i bilip bai agrikalsa i ken stretim ol wari bilong kaikai yumi gat long dispela kantri.

## Pis bilong Brasil kam pinis long Madang

WANPELA akua baiolojis o saintis bilong stadim wara husat i save stap long Madang i laik putim wanpela pis bilong Brasil ol i kolim Paku long olgeta wara bilong PNG.

Saintis ya, lan Middleton i tok em i kisim samting olsem 40 paku i kam pinis long kantri long Brasil na ol dispela pis i stap nau long risets senta bilong em long Dilup

we i stap autsait long Madang taun. I gat tripela tenk we ol paku i stap na bikpela bilong ol i olsem 500 grem olsem hevi bilong em.

Paku i gutpela moa long pis makau bikos em i gat planti mit na i no planti bun tumas.

Saintis ya i tok paku bai no inap bagarapim ol narapela pis bilong solwara. Paku i save kaikaim ol sid olsem galip nat na i no save kaikaim ol liklik pis.

Em i wok wantaim Nesenel Fud Ogenaisesen na Fud na Agrikalsa Ogenaisesen long kisim ol dispela pis i kam insait long kantri.

Mista Middleton i yusim olsem K1.2 milien long bringim ol dispela pis i kam insait long kantri.

Paku em i wanpela pis bilong wara na Mista Middleton i putim sampela bilong ol pis ya long ol wara

sistem bilong Ramu pinis. Em i tok dispela em i olsem bilong traimit tasol na nau yet em i wok long stadim hau paku i wok long raun long wara bilong PNG.

Taim Mista Middleton i painim ol i raun o stap gut long wara bilong PNG bai em i kisim tok orait long ol atoriti long putim paku long narapela hap bilong kantri tu.

## Ramu projek laikim bikpela senis long taun

PLEN i stap pinis long bildim wanpela bikpela bilding bilong Ramu Nikel projek. Maus man bilong Ramu projek, Peter Spear i tokim wanpela developmen simposium o bung long Madang.

Dispela bai mekim Madang taun olsem bikpela senta bilong projek taim projek i stat.

Mista Spear i tok ol lukluk i go insait long hau ol i yusim graun na plen bilong taun i stap nau wantaim Provinsel Pisikel Plening opis long Madang. Taim ol plen ya i kisim tok orait bai Ramu Nikel Projek i bildim wanpela hausung kompleks namel long Aleksisafen na Madang taun.

Kompleks bai gat olsem 109 akomodesen bilong ol yunit bilong haus, dupeks na singel flet.

Mista Spear i tok ol i stretim toktok wantaim ol papagraun na i luk orait olsem na ating bai ol i statim konstraksen klostu. Em i tok ol plen bilong stretim ol rot namel long taunspil bilong Madang na ol eria i go olsem

long not bilong Madang bai kamap wanpela bikpela samting long mekim. Taim bilong konstraksen bai lukim olsem 3000 pipel long wok fos. Planti bilong ol kontrakta bai muv insait na autsait long Madang long taim bilong konstraksen.

Mista Spear i tok i gat nid long Madang i mas stretim gut ples balus bikos planti pipel bai kam insait long provins. Provinsel gavman na nesanel gavman i mas lukluk i go insait long dispela.

Long wankain taim, Madang taun i lukim planti salens long menesim na mentenim ol infrastraksa i stap insait long taun na ol sevis na nogat spes long larim ol dispela infrastraksa i gro.

Mista Spear i tokim ol manmeri long simposium olsem Madang Eben na Lokol Level Gavman i no inap long mekim ol plen na implimenim o karim aut bikos ol i sot long mani, teknikal samting, wokman na nogat gutpela menesmen.

Ol politik bilong menesim na

yusim graun long taun i no soim gutpela ron bilong ol sevis, em i tok.

Ol nids bilong ol infrastraksa na ol sevis na ol kost bilong ol we Madang Eben LLG i makim olsem ol prairiti samting:

-sistem we pekpek na pipia i save ron bai kostim K6 milien.

-ol rot wok na sivil enjineriing bai kostim K15 milien.

-ol wara saplai bai kostim K14 milien.

-hausing estet developmen bai kostim K20 milien.

-konsevesen eria developmen bai kostim K3 milien.

-komyuniti na rekriesenel bai kostim K3 milien.

-helt na edukesen infrastraksa rihebilitesen bai kostim K5 milien -pawa bai kost olsem K5 milien na telekomyunikesen-K5 milien.

Madang Eben LLG i bungim olgeta dispela samting na lukim olsem K76 milien bai ol i nidim long bringim ol dispela infrastraksa na sevis i go long standet we i ken go wantaim gro bilong taun.

# GOBE

## *Lidasip Komiti*

bin gat kain kain ripot na ol pablik toksave i kamap long nius, olsem na Siaman bilong Gobe. Lidasip Komiti na Siaman bilong Petroleum Resources Gobe Limited (PRG), Philip Kende i putim dispela toksave long stretim tok.

Ol papagraun na ol lain i no papa graun husat i wok long kisim ol giaman loya na edvaisa long makim ol o bosim mani na skelim royalti, i mas save olsem i gat lo i bosim dispela wok.

Ol samting ol papagraun i mekim i mas bilong kamapim gutpela bekim bilong OLGETA papagraun na i NO bilong wanpela lain tasol.

Ekwiti na royalti long risos projek em i samting bilong Gavman na ol papagraun i kisim mani na helpim tasol.

Lo i luksave long wanpela grup i makim ol papagraun long ekwiti long dispela projek, em Petroleum Resources Gobe Limited (The Trustee).

Dispela lo i karamapim tu ol narapela papagraun kampani olsem Petroleum Resources Kutubu (PRK), Mineral Resources Lihir Limited (MRL), Mineral Resources Star Mountains Limited (MRSM) na Mineral Resources Enga Limited. (MRE).

Long Gobe, PRG em i wanpela Trustee tasol bilong ekwiti em i holim long nem bilong olgeta papagraun. Disela i stap long Section 168 (4) bilong Oil & Gas Act 1998. Section 176 bilong Oil & Gas Act 1998 i tok klia long nem bilong Trustee

bilong Gobe ekwiti na em i PRG.

Section 176 (c) bilong Oil & Gas Act 1998 i tambu long salim o kisim dinau long dispela intres - ol i mas kisim tok orait bilong Independent State of Papua New Guinea pastaim. Gavman i gat 2 % sia long Kutubu Joint Venture.

Ol narapela samting autsait long dispela lo em i brukim lo.

Sapos yu laik save long papagraun tru na ol siaman bilong ol, orait sekap wantaim PRG na Dipatmen bilong Petroleum na Eneji.

### **AUDITED FINANCIAL STATEMENTS**

Ol odited fainesenel stetmen bilong PRG bilong 1998 na 1999 i stap wantaim Investment Promotion Authority olsem lo bilong Companies Act i tok.

Dispela bai givim sans long olgeta manmeri long lukim wokman bilong kampani.

Ol toktok i sutim tok long fainensel operesen bilong PRG i no gat as bilong en.



**PHILIP KENDE**

**Siaman**

**Petroleum Resources Gobe Limited**

**Gobe Lidasip Komiti**



## MINISTRI BILONG HELT LONG GAVMAN BILONG PAPUA NIUGINI



MADANG, PAPUA NIUGINI, 16 MAS 2001

# OL PASIFIK AILAN HELT MINISTA I KAMAPIM EKSEN PLEN BILONG OL HELTI AILAN (2001 - 2003)

Namba foa miting bilong ol Pasifik Ailan Helt Minista na Dairektas we i bin pinis long Mas 15 long Madang i wanbel long kamapim "Ol Helti Ailan" olsem sanap bilong helt polisi developmen insait long Pasifik long 21st senseri. Helti Ailan em bikpela wok na lukluk bilong en long kamapim fremwok bilong banisim wok bilong helt na strongim na kirapim wok bilong helt insait long Pasifik, we bikpela lukluk i sut long komyuniti eksten, envaromentel menesmen na polisi na infrastraksa developmen.

Dispela miting em Papua Niugini Gavman i go pas long kamapim na Wol Helt Ogenaisesen (WHO) i karimaut na Sekretariat bilong Pasifik Komyuniti (SPC) i bungim wantaim moa long 100 lain bilong wokim helt polisi insait long 15 kantri olgeta we i makim Yunaitet Nesen (UN) na ol intanesenel aid-ejensi, developmen benks, ol NGO na ol helt trening skul.

Miting i bin kamap long tupela hap. Namba wan hap, long 12 - 13 Mas, ol dairekta bilong helt i bung na toktok long ol wok i kampa insait long wanwan teknikel eria olsem ripot bilong wanem kain wok i bin kamap long Papua Eksen Stetmen (ol toktok i bin kamap long Ministeriel bunglong Koror, Palau long 1999), ol toktok bilong wanem kain kontrol ol i kamapim long ol sik we i kolim komunikebel disis aninit long dispela bikpela nem "Helt Ailan" na humen risos developmen.

Namba tu hap bilong miting i kamap long 14 - 15 Mas we ol Helt Minista i glasim ol ripot ol Dairektas bilong Helt i givim ol. Ol Minista i toktok moa long wok we i kamap bihainim ol polisi na wanem progres i kamap long karimaut Palau eksten stetmen. Ol Minista i wanbel wantaim long ol gutpela wok i kamap bihainim ol toktok bilong olpela miting. Tasol ol i luksave e olsem wok bilong karimaut dispela plen o lukluk bilong Helti Ailan i no inap wankain long wanwan ailan kantri. Olsem na wok bilong serim ol eksperiens na netwok namel long ol dispela ailan kantri em i bikpela samting long lukim wok i go het gut aninit long dispela nem "Helti Ailan" insait long olgeta dispela kantri. Ol Minista i luksave na tokaut tu olsem wok bilong dispela nem "Helti Ailan" i mas kisim bikpela luksave long mekim em i ken wok gut.

Ol Minista i luksave long ol gutpela wok i kamap insait long ol dispela kantri na ol eria bilong rausim filiarisis (malaria). Dispela miting i askim ol kantri long wok strong long pinisim dispela sik filiarisis wantaim ol arapela program insait long sab rijinol na nesene level na kamapim wanpela bikpela na strongpela netwok sistem.

Miting i luksave tu long bikpela hevi bilong sik TB insait long Pasifik na strong olsem DOTS (wanpela rot bilong pait egensim sik TB) i mas wok strong olsem rot bilong daunim sik TB insait long ol Pasifik kantri long yia 2001.

Ol Minista i luksave long bikpela hevi bilong sik Daibits na ol i toktok long ol rot bilong kamapim long stapim dispela sik daibits long i noken kamap bikpela insait long Pasifik. Ol Minista i tokaut kia long wok tru bilong intagreting daibits privensen na kontrol olsem bikpela wok bilong mekim insait long dispela lukluk bilong "Helti Ailan" na wantaim ol rot na wok we i stap strong pinis long praimer helt kea (PHC) netwok insait long Pasifik.

Ol Minista i kamapim dispela Helti Ailan Rijinol Eksen Plen bilong yia 2001 - 2003 we i bin stap pinis long woksop we i bin kamap pastaim long Nadi, Fiji. Miting i tokaut long bungim developmen bilong metodolojis (methodologies) bilong skelim na was long ol dispela wok i wok gut. Rijinol Eksen Plen (2001 - 2003) i tokaut long tripela ki eria bilong eksten. (1) Strongim wok bilong karimaut Helti Ailan plen na program. (2) kamapim ol rot na wei bilong go fowet, serim save na wok i go i kam na netwok bilong wok bihainim na (3) setim ap sistem bilong lukim olsem ol projek na program i kamap gut na wok gut.

Long las de bilong bung, ol manmeri igo raun lukluk long wanpela seting bilong "Helti Ailan" projek we i bin long Papua Niugini. Ol hap ol manmeri i go lukim em Madang "helti maket, Sagalau "helti promoting, praimer skul na Siar "helti vires". Ol hap we ol manmeri igo lukim i makim strongpela politikel lidasip na bikpela komyuniti sapot. Ol manmeri i lukim na skelim gut olsem ol ples na ol samting i stap klin tru na gutpela hap wara na pipia i go long en we olgeta i gutpela na sut stret long helti developmen na gutpela kwaliti laip.

Honorebel Viliami Ta'u, Minista bilong Helt long Tonga i tokaut olsem namba 5 miting bilong ol Pasifik Ailan Minista na Dairekta bilong Helt long 2003 bai Gavman bilong em i lukautim long Kingdom ov Tonga.

Bihain long dispela miting ol i kamapim "Madang Eksen Pletfom"- Em ol toktok ol i pasim bihain long miting long kamapim na karimaut."

## (1) COMMUNICABLE DISEASE SURVEILLANCE AND RESPONSE

*Rekomendesen i go long ol kantri:*

*Ol kantri i mas:*

- Strongim nesene kapasiti bilong komunikebel disis sevelens na bihainim wantaim trening na sapotim ol helt woka igo pas long en wantaim ol rot na risos bilong helpim wok bilong ol i go gut.

- Stap insait long moa developmen na pinisim bilong ol draf stretejik plen na tri yia plen bilong eksten we i bin kamap pinis insait long PPHSN Kodineting Bodi.

- Luksave long wok bilong ol staf long sevelens na rispons long mekim ol i stap insait long ol wok bilong PPHSN na ol Kodineting Bodi.

*Rekomendesen i go long ol intanesene komyuniti:*

- Helpim wok kamap bilong PPHSN Stretejik Plen na Plen ov Eksen bilong ol kantri insait long kain helpim bilong elektronik komyunikesen, wanwan miting na sab rijinol miting insait long Pasifik.

- Sapotim wok bilong PPHSN na ol Kodineting Bodi insait long teknikel na wanem eria em i ken wantaim fainens sapot na tu ful wok bilong PACNET, LabNet, na EpiNet, na sapot na yus bilong wanwan teknoloji.

## (2) TRADITIONAL MEDICINE

*Rekomendesen i go long ol kantri;*

*1. Karimaut ol Eksen Plen, olsem:*

- Kamapim wanpela nesene polisi long ol tumbuna marasin

- Strongim pasin bilong toktok na serim wok na ol samting wantaim namel long ol bus dokta na save dokta bilong taun.

- Strongim wok bilong tumbuna marasin namel long ol dispela ailan kantri.

- Strong wok bung wantaim namel long ol Mema Stets long lukim olsem tumbuna marasin i mas wok gut na wok orait.

*Rekomendesen i go long ol intanesene komyuniti*

*1. Sapotim ol kantri long karimaut Apia Eksen Plen.*

*2. Ol wok i mas kamap long kamapim gutpela rot bilong banisim save na ol samting bilong mipela insait long tumbuna stail bilong helt na marasin olsem as bilong ol kantri i ken sanap long kamapim wanpela gutpela na strongpela fremwok.*

## (3) DIABETES

*Ol kantri i mas:*

- Luksave olsem sik daibits em bikpela sik tru long pablik helt olsem na i mas gat bikpela luksave long dispela insait long nesene helt ajenda.

- Bikpela wok bung wantaim i mas kamap wantaim sivel sosaiti na komyuniti grup long pait egensim dispela sik daibits na kisim eksten long helpim na karimaut nesene daibits asosiesen.

*Intanesene komyuniti i mas:*

- Helpim ol kantri long kirapim moa awenes long sik daibits insait long Pasifik.

- Givim sapot long kamapim na kirapim daibits asosiesen.

## (4) STOP TB (TUBERCULOSIS)

*Ol kantri i mas:*

- Strongim ol toktok ol i pasim pinis long karimaut Pasifik Stretejik Plen long Stapim sik TB na long mekim kamap ol dispela taget:

- DOTS i mas kamap strong olsem rot bilong kontrolim sik TB insait long ol Pasifik ailan kantri long yia 2002.

- 100% ol liklik sik we i kamap bihainim sik TB insait long ol Pasifik ailan kantri i mas go aninit long bikpela wok bilong pait egensim sik TB long yia 2005.

- Strongim olgeta wokman na olgeta arapela risos wantaim leboteri sapot bilong kamapim strongpela nesene TB kontrol program.

*Ol intanesene pati i mas:*

- Strongim ol teknikel sapot we ol rijinol ejensi i givim long wok bilong kontrolim sik TB long nesene level.

- Developmen bilong ol plen o streteji i mas i gat olgeta patna i stap insait na skelim olgeta risoses we i stap pinis long sait bilong ol edukesen program na awenes wok.

- WHO i mas go pas long bungim olgeta nesene, rijinol na intanesene patna wantaim long senisim ol tingting na eksperiens wantaim na long kamapim wanpela klia tingting long karimaut open lening igo fowet long gutpela plen we olgeta i kamap wantaim.

## (5) THE HEALTH LEADERSHIP AND MANAGEMENT DEVELOPMENT PROGRAMME

*Rekomendesen igo log ol kantri:*

- Kirapim moa sapot bilong trening na developmen bilong mid level menesa insait long Pasifik Helt Sekta.

- Sapotim developmen bilong ol Helt Lidasip na Menesmen program.

- Skelim na makim wanpela stadi projek bilong bilong ol lain i kisim trening.

- Sapotim wok go het bilong developmen o karimaut bilong SPC Helt Lidasip na Menesmen program.

*Rekomendesen i go long ol intanesene komyuniti*

- Sapotim developmen bilong ol mid level menesa insait long Pasifik helt sekta.

- Sapotim wok go het bilong SPC Helt Lidasip na Menesmen program.

## Xena bai dai long laspela muvi piksa

**Auckland, Nu Silan:**  
Feveret piksa bilong planti pipel long wol em *Xena Warrior Princess* we i save kamap long EM TV olgeta Fraide nait long 7 kilok i bin wokim laspela piksa bilong em long wik long Auckland, Nu Silan, ol ripot i tok.  
Ol ripot i tok dispela piksa siris bai pinis long dispela yia.  
Samting oslem 115 kantri i save lukim dispela tok muvi piksa. Na meri husat i save

ekt olsem Xena em Lucy Lawless bilong Nu Silan.  
Long las yia, Studios USA Dornestik Televisen presiden Steve Rosenberg na Rob Tapert (man bilong Lucy Lawless) i bin tokaut olsem dispela piksa we ol i wokim long Auckland em bai laspela wan.  
Star Times i bin tok long ol ripot, *Xena* em i pinis nau na ol i no save wanem samting bai kamap nau long sait pren bilong em Gabrielle. Na

long laspela piksa ol i wokim long Auckland, ol samurai waria i kilim Xena i dai.  
Mausman bilong Pasifik Rineisens husat i save wokim kamap siris ya i no bin wokim wanpela toktok, tasol wanpela meri husat i save ranim gaid long Xena waria Prinses websait i tok ol lain i save laikim tumas dispela muvi piksa bai krosim ol biruaim stret Tapert sapos em i kilim dai Xena.


## Mista Bean em top fani ekta maniman

**London:**  
Rowan Atkinson em fani ekta long Ingran husat i gat nem olsem top fani ekta risman long Ingran bai kamap moa ris bihainim ol toktok long tupela biknem entateinmen kampani bai bung wantaim na kamapim moa long US\$ 100 milien long wanpela yia, ol ripot i tok.  
Working Title i wok long

holim ol toktok long baim Tiger Aspect piksa kampani we i save wokim Vicar of Dibley, Mr Bean na tu manesa bilong Mista Atkinson.  
Ol ripot i tok Ekta Atkinson olsem em i gat pinis US\$80 milien long dispela ol Mr Bean piksa na em i gat bikipela sea long Tiger Aspek. Gutpela poroman bilong em Peter

benneth Jones i papa long dispela kampani.  
Mista Atkinson yet i wokim ol Mista Bean muvi na ol i salim long 100 pela kantri long wol.  
Bikos man i no toktok long dispela ol muvi piksa, ol i save soim ol Mista Bean piksa long 50 balus kampani long wol taim ol i wokim ol ron bilong ol yet.

## Inca Ruins long Peru i stap long hevi




• Inca Ruins long Macchu Picchu long Peru em i wanpela Wol Heritej eria na planti turis i save go long hap long lukim ples. *Piksa i kam long The Post Courier Mail.*

Ples i stap antap long maunten bilong Andes, bikipela maunten sen long saut Amerika. Tasol nau i gat pret olsem ples bai bagarap sapos maunten ya i bruk, ples bai bagarap tu.

Long rises we wanpela Japan saveman i bin karimaut, ol hap bilong maunten we Inca Ruins i stap long en i wok long go daun long mak bilong wanpela sentimita insait long wanpela mun.

Nesenel Kalsa Institut bilong Peru i tok long noken wari tumas long dispela ripot.



## Lus na nau painim bihain long 34 krismas

• Bluebird em dispela bot we i bin lus 34 krismas i go pinis na papa bilong em husat i bin holim stia long en, Donald Campbell i bin dai long en em ol i painim long solwara long Coniston Wara long Cubria, notwes Ingran. *Piksa i kam long Courier Mail niuspepa.*

**Ingran:**

Taim birua i kamap, ol bin wok long painim bot na papa bilong em tasol i nogat inap nau, 34 krismas bihain taim Bill Smith em wanpela milienia na daiva i painim long las yia. Na long las wik, ol i bin pulim i kamaut long wara.

## Askim long Praim Minista Mori long risain

**Japan:**  
Bihainim ol ripot olsem singaut i kamap long Praim Minista Mori long risain bikos ol kain wok nogut i wok long kamap na ikonomi bilong Japan i wok long pundaun, bikman ya i bin go long Washington, Amerika long bungim bikman bilong Amerika long stap insait long ol samit toktok wantai Presdien George Bush.

Apa Haus ileksen bilong Japan bai kamap long Julai na Oposisen Pati na ol koalisen memba i wok long singaut long Praim Minista Mori long risain, tasol em i no bisi long dispela.



Praim Minista Yoshiro Mori bilong Japan i harim Edukesen Minista Nobutaka Machimura long palamen. *Piksa i kam long The Courier Mail.*

## Ol biknem ka kampani i kisim salens




Ol traipela fektor i traim masel bilong ol long wokim ol stail ka.

Melbon so rum long las wik i bin mekim kirap nogut ol Ford eksekutiv long lukim dispela tupela nupela ka i stap long pablik disple.


Projek long kamapim ol nupela stail ka i bin wanpela bikipela sikret stret tru na planti memba bilong pablik i opim ai taim ol i lukim dispela tupela nupela ka long so rum. Join projek bilong Advens Enjiniaring Komponen bilong Perth na Millard em disain kampani bilong Melben i bin wok wantaim long kamapim falkon na i mekim kirap nogut biknem ka kampani Holden we bai kamap wantaim Monaro, em olsem

• Supaka bilong Ford i stilim Monaro tanda. Nupela Falkon GT ka bai aut long dispela yia na daunbilo em nupela Komodo Monaro i gat tupela dua long en. *Piksa i kam long Weekend Australian niuspepa.*



Komodo na i gat tupela dua. Dispela nupela stail ka bilong Ford, biknem ka kampani bilong Amerika, bai kamaut long dispela yia.





## India: OI YAKA! snek o rop o wanem samting?

Save lukim kain samting olsem tu? Noken ting em wanem, em ol pinga bilong wanpela man India ya we em i larim ol pinga nil i gro insait long 23 kris-mas

Long piksa ya, biknem kriket pilai bilong Australia Shane Warne i bungim dispela man wantaim longpela pinga na em wantaim ol arapela lain i kirap nogut na lukluk i stap long ol longpela nil ya.

Piksa i kam long Weekend Australian niuspepa.

Wellington, Nu Silan:

## Moa saiklon long Pasifik rijen

Saut Pasifik rijen i kisim pinis foapela saiklon long dispela yia tasol ol saientis husat i save moa long dispela samting i tok rijen bai kisim moa saiklon yet long dispela yia.

Nesanel Institut ov Wara na Atmosferik Rises (NIWA) i tok tok-save long dispela samting i go pinis long ol wan wan gavman long Pasifik rijen. Toksave i tok saiklo sisen i leit insait long 30 yias tasol bai moa long dispela yia bai kamap yet.

"Eria we saiklon bai kamap strong moa yet em namel long Fiji na Vanuatu," klaimet saientis Jim Salinger i tok.

Em i tok tu olsem namel long mun Mas na Epril, tropikel saiklon bai bringim ol strongple ren na win long not isten kos bilong Nu Silan.

Dokta Salinger i tok long las yia, Kuk Ailan i bin kisim mak long ren olsem 200 milimita ren insait long siksipela awa ren long wanpela de long taim bikpela ren we tropikel saiklon i bin kamapim. Tasol em i tok ol strongpela tok long ol klaimet woning i min olsem planti fama i mas senisim ol kaikai ol i planim long redi long dispela taim nogut na planim o, dispela we bikpela ren na taitwara na win i no inap long bagarapim ol kwiktaim.

**Midel Is:**  
**Sik bilong kau na pik i wok long kisim ol arapela kantri**  
Ol atoriti long Midel Is i wok hat nau long traim stapim sik long maus na leg we ol kau na pik i kisim bihainim ol i painimaut olsem tupela kau ol i karim i go insait long kantri i gat dispela sik.

Saudi Arabia na Yunaitet Stets i ripotim ol dispela sik long tupela kau iwe ol i bin kisim i kam inait long narapela kantri. Tasol Agrikla minista bilong ol i tok ol i wok long was gut na sik ya i stap aninit long kontrol bilong ol.

Long wankain taim tu, kantri Argentina long Saut Amerika i ripotim tupela keis long dispela sik long kantri.

Long Saudi Arabia, ol i painim olsem tupela bebi kau i gat dispela sik. Na planti ol kantri long Galf i save kisim ol mit bilong ol i kam ausait long ol wan wan kantri.

Long dispela taim, ol kantri long wol i wok long taim hat long stapim dispela sik i go long ol na olsem, ol i tambuim na stapim ol mit na ol siriel samting we ol i save odaim na kisim long Inglan na ol Yuropien Yunien kantri bikos sik we i kisim ol kau na pik na bagarapim mit bisnis i stat long Inglan.

Amerika, Australia, Nu Silan, Kanada na ol arapela kantri moa i stop long baim ol mit na ol arapela kaikai prodak

olsem long Inglan na YUropien Yunien kantri.

Ol kau na pik long Amerika i no kisim dispela kain sik long yia 1929 i kam inap nau.

Briten em as bilong dispela leg na maus (fut na maui) sik we i bagarapim ol laipstok olsem kau, sipsip, pik na ol got.

Sik ya i kisim ol ketel long Frans long las Tunde. Kantri Portugel i bin painim ol binatang nogut long dispela sik long tupela kau we ol i bin kisim i go insait long kantri long Holan o Nedalens.

**Jakarta, Indonesia:**  
**Ol sapota bilong Presiden Wahid i blokim rot**

Planti tausen sapota bilong Presiden Abdurrahman Wahid bilong Indonesia i bin pulapim ol strit long Indonesia na tok egenim ol singaut long Mista Wahid long risain. Long Katapang we i stap long Is Jawa, ol ripot i tok moa long 3,000 Wahid sapota i bin blokim bris na ol pipel na turis we i wok long i go na i kam long turis aila, Bali na Jawa i kisim taim stret. Is Jawa em politikel hetkota na ples bilong milien memba bilong Nahdatul Ulama, bikpela Muslim ogenaiesen we Mista Wahid i bin go pas long en inap ol i makim em olsem presiden long Oktoba 1999.

Plis i tok pastaim ol lain ya i bin bung long taun skwea long autim strong sapot bilong ol

long Mista Wahid. Ol ripot i tok ol sapota ya i bin kukim ol sampela dokemen long Oposisen Golka pati, brukim ol glas windua tasol plis i tok ol dispela i no tru. Ol ripot i tok long Jakarta, samting olsem 1,500 Wahid sapota i bin bung long Monas skwea we i stap klostu long residen-densel Pales bilong presiden.


**Perth, Australia:**  
**Man laik bai ol klonim em**

Wanpela lapun man husat i gat 84 krismas na em i nogat pikinini i laik bai em i gat senis bipo em i dai. Na olsem em i askim long ol dokta na saientis long klonim em. Em i tok dispela nupela teknoloji long ol dokta na saientis long kamapim bebi long nupela rot ol i kolim kloning we ol i save kisim hap skin bilong man i wok long lusim tingting long ol man i nogat pikinini na ol i laikim.

Dokta Frank Hansford-Miller i traim planti ol dokta long wol pinis long laik bilong em tasol nogat wanpela i wanbel yet long en.

Meri bilong em i dai pinis na man tu ya i bin gat operesen long no wokim pikinini. Na olsem em i wok long painim rot long gat pikinini bilong em yet husat bai kisim ples bilong em taim em i dai.

Dokta Hansford-Miller i bilong Inglan tasol em i bin go long Australia long



## Meri tu inap kamap top moto resing ka draiva

Nem bilong yanpela meri Leanne Ferrier i wok long kamap olsem namba wan meri long kamap top na win long ka resis pilai long Australia.

Long piksa em Leanne Ferrier husat i win olsem V8 draiva na boipren Garth Tander husat tu i wanpela sampion moto resing drava husat i bin kamap olsem sampion long Bathurst. Piksa i kam long Weekend Australian niuspepa.

Mis Ferrier husat i gat 20 krismas i go insait long moto resis wantaim bikpela sapot na fainensel helpim long papamama bilong em.

Em bin stat long resis wantai "go karting i go long Fomula Ford na nau em i go insait long Konica V8 Supaka ka siris long go inait long Shel siris.

Ol kain tok i kamap olsem bikos boipren bilong em i stap long dispela pilai na em tu i stap i no tru.

Yanpela ya i gat bikpela laik na tingting long stap long resis ya na

mekim nem bilong em. Papamama i tromoim pinis Aus\$ 100,000 long tripela yia em i stap long dispela motoka resis.

Gutpela samting em Ferrier i kamap olsem namba wan meri long winim wanpela raun bilong Fomula Ford sampion resis long Philip Ailan las yiana long las mun, em bin kamap namba tu long Konica resis long Golben, Nu Aaut Wels. Long dispela, em i kamap olaswm namba wan meri long Australia long win long podium V8 resis.

Manesa bilong em Peter Rogers i amamas long Ferrier na em i tok ol i luksave olsem dispela em wanpela yanpela meri husat i laik go insait long ka resis na long wankain taim tu, long resis na win.

Bikpela tingting bilong em nau em long win na wokim gut long Konica siris resis na go inait long Shell resis bipo long lukluk na tingting long narapela samting.


1980 na nau em i stap olgeta long hap.

Em i raitim wanpela pas i go tu long Praim Minista bilong Australia John Howard long autim wari na askim bilong em long dispela samting na sapos em i ken tok oraitim tasol opis bilong bikman i no givim wanpela ansa yet long em.

Man ya em i wanpela saveman na matematisen na em i tok 40 akademik teks buk we em bin redim na raitim em ol i yusim insait long ol bikpela skul na yuni-vesiti long wol. na em i tok maski em i lapun na em i man i no inap long stapim em long gat pikinini nau moa yet taim

kloning rot i stap na op pinis.

Em i tok em i kam long wanpela famili we i no save dai hariap na em i wanpela saveman na pikinini we inap kamap long kloning bai gat ol gutpela samting. Na em bai i stap laip yet long lukim bebi bilong em i groap.



# WANTOK

## ASKIM

**1. Hamas yia nau yu save ritim Wantok?**

- 1 yia  3 yia  Moa long 5 yia

**2. Em isi o hatwok long painim na baim Wantok?**

Isi bikos .....  
Hatwok bikos .....

**3. Yu ting wanem long pe bilong Wantok?**

Dia tumas .....  
I orait .....

**4. Yu save baim Wantok long wanem hap?**

- Stua  
 Strit  
 Maket  
 Narapela man baim na mi ritim

**5. Taim yu ritim Wantok pinis, hamas moa manmeri save ritim?**

Namba .....

**6. Yu save baim Wantok long wanem de?**

- Fonde  
 Fraide  
 Sarere  
 Sande  
 Mande

**7. Taim yu baim Wantok, yu save ritim wanem stori pastaim?**

Bekim .....

**8. Yu amamas long ritim wanem ol stori long Wantok? Makim 5-pela tasol.**

- |  |  |
|--|--|
| <input type="checkbox"/> Pes 1 Nius        | <input type="checkbox"/> Plis Ripot    |
| <input type="checkbox"/> Bogenvil Nius     | <input type="checkbox"/> Biabia        |
| <input type="checkbox"/> Tu Minit Tingting | <input type="checkbox"/> Provins Nius  |
| <input type="checkbox"/> Sios Nius         | <input type="checkbox"/> Wol Nius      |
| <input type="checkbox"/> Laipstail         | <input type="checkbox"/> Kanage        |
| <input type="checkbox"/> Musik Stori       | <input type="checkbox"/> Top 20        |
| <input type="checkbox"/> Penpren           | <input type="checkbox"/> Stori Tumbuna |
| <input type="checkbox"/> Ol Pas            | <input type="checkbox"/> Laiplain      |
| <input type="checkbox"/> Tambu Toro        | <input type="checkbox"/> Spot Poto     |
| <input type="checkbox"/> Spot Dro          | <input type="checkbox"/> Spot Nius     |

**9. Putim nem bilong tripela stori yu save les long ritim?**

- a) .....  
b) .....  
c) .....

**10. Yu laik lukim wanem kain ol resis long Wantok?**

- |               |                              |                                |
|---------------|------------------------------|--------------------------------|
| Kaunim mani   | <input type="checkbox"/> yes | <input type="checkbox"/> nogat |
| Painim Bal    | <input type="checkbox"/> yes | <input type="checkbox"/> nogat |
| Kanage/Mutrus | <input type="checkbox"/> yes | <input type="checkbox"/> nogat |
| Makim pes     | <input type="checkbox"/> yes | <input type="checkbox"/> nogat |

Ol narapela resis .....

**11. Yu save go insait long ol arapela resis olsem bilong Maggie Noodles, Coca Cola, Milo na Trukai o nogat?**

- Yes  Nogat

**12. Yu laik lukim ol kain resis olsem long Wantok?**

- Yes  Nogat

**13. Yu save laikim ol Wantok Spesel Saplimen tu o nogat?**

- Yes  No

**14. Yu laik lukim wanem kain ol edvetismen o toksave long Wantok?**

- Ol kaikai, sop, marasin  
 Ol nupela ka, bot, masin  
 Spesel bilong hadwea stua masin  
 Betde gritings na painim wantok timba bilong wokim haus  
 Ol tenk wara, kapa, nil  
 Painim wok  
 Ol nupela prodak  
 Masin bilong katim diwai  
 Toksave bilong gavman  
 Ol spesel bilong bakstua  
 Ol spesel bilong supamakot  
 Ol seken hen ka, klos, masin

**15. Yu bin baim sampela samting long ol edvetismen yu lukim long Wantok?**

- Yes  Nogat

Yu baim wanem samting: .....

**16. Yu laik lukim wanem ol arapela nupela samting long Wantok?**

Bekim: .....

**17. Yu laik lukim moa poto o stori o edvetismen long Wantok?**

- Moa poto  Moa stori  Moa edvetismen

**18. Yu laikim mipela prinim Wantok hamas de long wik?**

- Olgeta de  Tupela de  Wanpela de tasol

**19. Yu ting wanem long Tok Pisin bilong Wantok?**

- I orait  I krangi liklik

**20. Yu save yusim Wantok long skul bilong rit na rait?**

- Yes  Nogat

Sapos yes, tokaut: .....

**21. Yu save kisim nius olsem wanem?**

- Long Wantok  
 Long ol Inglis niuspepa  
 Long radio  
 Long televisen  
 Long komputa

**22. Yu save baim ol dispela niuspepa tu o nogat?**

- The Independent  
 Post Courier  
 The National  
 Southern Post  
 New Guinea Island Post  
 Highlands Post  
 Mamose Post  
 Ol ovasis pepa

**23. Yu save harim radio o nogat?**

- Yes  Nogat

**24. Yu save harim wanem radio stesin?**

- |   |                                     |
|---|-------------------------------------|
| <input type="checkbox"/> Provinsal radio stesin | <input type="checkbox"/> Karai      |
| <input type="checkbox"/> FM 100                 | <input type="checkbox"/> Yumi FM    |
| <input type="checkbox"/> Nau FM                 | <input type="checkbox"/> FM Central |
| <input type="checkbox"/> FM Morobe              |                                     |

**25. Yu save lukim TV o nogat?**

- Yes  Nogat

**26. TV bilong yu inap long kisim wanem ol stesin?**

- EM TV  ABC  
 7 Central  HBO

- |                                     |   |
|-------------------------------------|---|
| <input type="checkbox"/> SBS        | <input type="checkbox"/> CNN                |
| <input type="checkbox"/> Discovery  | <input type="checkbox"/> Video Channel      |
| <input type="checkbox"/> FM Central | <input type="checkbox"/> ESPN               |
| <input type="checkbox"/> BBC        | <input type="checkbox"/> AUSTV              |
| <input type="checkbox"/> DW         | <input type="checkbox"/> NHK                |
| <input type="checkbox"/>            | <input type="checkbox"/> Indonesian Channel |

**27. Yu save yusim komputa o nogat?**

- Yes  Nogat

**28. Yu save yusim komputa long haus o long opis?**

- Haus  Opis  Tupela wantaim

**29. Yu laik ritim Wantok long komputa bilong yu?**

- Yes  Nogat

**30. Yu wokman o wokmeri?**

- Yes  Nogat

**31. Yu mekim wanem kain wok nau?**

Bekim .....

**32. Yu pinisim skul long wanem gret?**

Bekim .....

**33. Krismas bilong yu .....**

**34. Yu man o meri?**

- Man  Meri

**35. Yu gat ka o nogat?**

- Yes  Nogat

**36. Yu stap long ples o long taun?**

- Ples  Taun

**37. Long 12-pela mun i go pinis, yu baim ol dispela samting? Makim tasol long bokis.**

- |   |  |                                    |
|---|--|------------------------------------|
| <input type="checkbox"/> Ka                         | <input type="checkbox"/> Sia na tebol                | <input type="checkbox"/> Komputa   |
| <input type="checkbox"/> Televisen                  | <input type="checkbox"/> Samting bilong sanapim haus |                                    |
| <input type="checkbox"/> Haus                       | <input type="checkbox"/> Vidio                       | <input type="checkbox"/> Tenk wara |
| <input type="checkbox"/> Ol samting bilong haus kuk | <input type="checkbox"/> Aut bod moto                |                                    |
| <input type="checkbox"/> Sen so                     | <input type="checkbox"/> Redio                       |                                    |

**38. Yu plen long baim ol dispela samting long dispela yia? Makim tasol long bokis.**

- |   |  |
|---|--|
| <input type="checkbox"/> Ka               | <input type="checkbox"/> Sia na tebol                |
| <input type="checkbox"/> Televisen        | <input type="checkbox"/> Komyuta                     |
| <input type="checkbox"/> Haus             | <input type="checkbox"/> Samting bilong sanapim haus |
| <input type="checkbox"/> Haus kuk samting | <input type="checkbox"/> Vidio                       |
| <input type="checkbox"/> Ol tenk wara     | <input type="checkbox"/> Aut bod moto                |
| <input type="checkbox"/> Jen so           | <input type="checkbox"/> Vidio                       |

**39. Yu stap long ples o taun?**

- Ples  Taun

**40. Nem bilong yu (sapos yu laik) : .....**

**41. Pos opis dres bilong yu : .....**

Telipon namba .....  
Fax namba .....  
Komyuta adres .....

Postim long dispela adres: Wantok Askim  
PO Box 1982, BOROKO, National Capital District

Yu ken salim bekim bilong yu i ken yu long fax namba:  
(675) 3252500 o long komyuta adres : word@global.net.pg



# LAIPSTAIL

## Lukaut long pikinini i wari na kros

MASTA WAI i raitim

OL pikinini i save pilim wari na bel bilong ol i save bruk tru tasol yumi ol papamama i no save skelim na luksave gut tru long dispela wari na bel pen bilong ol.

Ol pikinini taim ol i liklik yet long krismas mak olsem 4 na 5, dispela taim tingting bilong ol i klia gut long wanem samting ol i laikim long kaikai o holim long han bilong ol. Ol bai aigris na mangal tru long sampela samting we i nais na gutpela tru long ai bilong ol na ol bai mekim kain kain nois long ia bilong yumi ol papamama long harim na putim tingting bilong yumi i go long dispela laikim bilong ol.

Wanpela samting em ol liklik pikinini i save laikim ol liklik samting olsem doli, baisikol, ol gumi we i save krai o mekim nois taim yu pilai long en na arapela samting moa we i gat ol naispela naispela kala long ol. Na taim ol i laik pilai long ol dispela samting ol i no laik long stop inap papamama yet i tokim ol long lusim na go waswas o kam kaikai na i go slip.

Yumi ken lukim olsem wanem samting ol dispela liklik pikinini i laikim yumi ol papamama i save hariap o wanbel long kisim na givim ol pikinini.

Na taim ol i kisim dispela samting ol i laikim, orait ol tu i save amamas long bel na tingting bilong ol tasol ol i no inap tokim yumi ol papamama olsem tenkyu o ol i amamas. Yu bai skelim tasol long pes bilong em olsem em i amamas na em i tok tenkyu long harim tok bilong em.

Ating long dispela level tu, ol pikinini i stap aninit yet long bikpela kontrol bilong ol papamama na olsem yumi i oltaim redim na givim ol pikinini wanem samting ol i laikim. Bel na lewa bilong yum i pas strong yet wantaim ol bikos ol yet ino inap long sanap strong na lukautim ol yet inap ol i bikpela man meri bihain.

Taim pikinini i go long skul long gret 1 bai yumi ol papamama i save go wantaim ol long skul olgeta moning bikos yumi laik lukim olsem ol i mas sindaun strong na save gut long tisa na pasin bilong skul pastaim. Taim ol i strong nau orait yumi lusim ol yet igo long skul na tisa bilong ol i lukautim ol long moning i go inap belo na salim ol i kam bek long haus wantaim yumi ol papamama.

Tasol yumi save putim bikpela was tru bikos bikos ol i liklik yet na yumi mas redim gut kaikai bilong ol long kaikai na karim i go long skul. Yumi mas wasim gut yunifom bilong ol long werim i go long skul.

Yumi save mekim dispela wok bilong was na lukaut gut long pikinini bilong yumi i go inap long ol i pinisim gret 6.

Taim ol i go long hai skul nau, yumi stat long lusim han long sampela samting yumi save mekim long ol taim ol i gret 1 i go inap long gret 6.

Papamama i stop long wasim kolos o yunifom bilong ol bikos ol i bikpela boi na gel pinis. Olsem na yumi save tokim ol yet long wasim gut yunifom na redi gut ol samting bilong ol long karim i go long skul long tumoro moning.

Sapos yumi skelim gut dispela senis bai yumi lukim olsem papamama i stat long lusim han long pikinini isi isi long dispela taim pikinini i kamap 12-pela krismas na igo antap. Bipes em i save krai long yumi kisim dispela samting na givim ol bai i no gat moa bikos em i bikpela pinis.

Tingting bilong papamama long dispela taim we pikinini i go long hai skul bai i senis na wei bilong papamama long was o kontrolim dispela bikpela pikinini bai i narakain long bipo. Taim pikinini i kamap bikpela we

krismas bilong em i olsem 15 na i go antap, papamama bai save olsem dispela pikinini bilong tupela em bikpela boi o bikpela gel nau na ol lainim, harim na lukim planti samting we ol i no bin luksave long en long taim ol i manki.

Olsem na papamama i save putim sampela kain was long skelim pasin bilong pikinini long toktok, bilas na eksen bilong em long wokabaut i go long skul na kam long haus.

Orait dispela taim, papamama i save tokim pikinini long sampela rul o lo bilong bihainim bai tingting bilong em i stap stret na wokabaut bilong em i ken gutpela na eksen bilong em i ken gutpela bai em i ken pinisim gut ol bikos em i samting we i kam aut long bel na tingting bilong ol wankain olsem taim ol i liklik pikinini yet na ol i save lukim na aigris long ol naispela doli o samting bilong pilai wantaim.

Dispela em i hatpela taim bilong ol papamama long brukim het na tingting nau long kontrolim ol pikinini long bikpela wei na ino olsem liklik wei ol i save lukautim pikinini taim ol i liklik yet long bipo.

Long dispela taim we pikinini i gat krismas namel long 15 na i go antap long 20 na 21 i go, wanem samting ol i laikim na wanem samting ol i laik mekim em i bikpela samting long ol bikos em i samting we i kam aut long bel na tingting bilong ol wankain olsem taim ol i liklik pikinini yet na ol i save lukim na aigris long ol naispela doli o samting bilong pilai wantaim.

Tasol long dispela level, ol i laik pilai spot olsem na ol i mas gat yunifom bilong pilai spot, ol i laik pilai musik olsem na ol i mas gat radio kaset o gita bilong pilai, ol i laik

werim naispela kolos olsem na ol i laikim papamama i baim dispela naispela kolos bilong ol, ol i laik sindaun stori wantaim ol wan skul o ol lain poroman bilong ol olsem na ol i mas gat sampela taim long mekim dispela. Dispela em sampela bikpela samting ol dispela bikpela pikinini i laikim na ol i mas kisim. Tasol olgeta disisen bai i kam yet long papamama.

Taim papamama i tok nogat long baim dispela samting o ol i no ken sindaun pulim stori wantaim o poroman bilong ol, orait pikinini i bel bruk na wari wantaim na i kam go slip na ino inap kaikai gut. Sapos papamama yet i kam bek na tok sori na tok, orait tumoro bai yu ken baim wanpela radio kaset tasol yu mas baim liklik na yu mas pilaim long wiken tasol na ino long taim bilong skul. Orait yu ken baim su o dispela kolos tasol yu mas baim narapela we prais i kam daun bikos yumi sot long mani. Em i orait yu ken sindaun stori wantaim ol wan skul bilong yu o ol poroman bilong yu tasol stori liklik taim na tasol kam hariap long haus bikos nogut ples i tudak na yu inap bungim trabel na birua.

Ol bikpela pikinini olsem i mas kisim sampela kain tok orait o wanbel bilong papamama tasol dispela toktok orait i mas go wantaim toktok stia na tokaut long ol trabel o birua inap kamap sapos ol i no bihainim stret dispela tok orait yu givim ol.

Tokim ol stret olsem sapos ol i sakim o i no bihainim dispela tok orait papamama i givim, orait ol i no inap kisim dispela tok orait moa long bihain inap ol i promis

bihain olsem ol bai bihainim na mekim samting stret.

Dispela liklik hap stori mi raitim bikos long sampela hevi we i kamap pinis long kantri bilong yumi Papua Niugini we sampela yangpela pikinini long hai skul na ol koles o trening skul o sampela yangpela long ples i bin kilim ol yet pikinini bikos ol i wari na bel i bruk na tingting i paul long wanem ol i nogat amamas long laip bilong ol.

Papamama i lokim ol inap long strongpela banis we ol i noga sans long baim wanpela gutpela bilas, ol i nogat sans long pilai spot, ol i nogat sans long toktok o stori wantaim ol arapela poroman o wanskul bilong ol na arapela hatpela samting moa.

Olgeta taim toktok bilong mamapapa i hat moa long ol na i blokim gutpela yangpela tingting bilong ol. I

nsait long dispela kain hatpela laip tu, sampela yangpela pikinini meri i save ronawe lusim mamapapa na igo long laik bilong ol long painim man na maritim.

Ol ino bin sindaun gut na skelim gut man na maritim, nogat. Ol i pusim ol yet tasol long marit bikos ol i ronawe long kalabus.

Ol yangpela pikinini man i no kamap gutpela strongpela man wantaim gutpela tingting bikos papamama yet i no bin harim toktok bilong em taim em i askim long samting em i laik kisim o mekim.

Papamama ino stiarim em long wanem as na ol ino laik kisim dispela samting bilong em, o wanem as na ol i stopim em. Olsem na taim pikinini i kros na go aut, em inap kamap trabel man.



# Hatwok bilong wanpela mama

PEKU PILIMBO i raitim

"Mama bilong mi bin mekim bikipela wok tru na nau mi wok mani na raun i stap.

"Tasol mi no save tingim em long olgeta ol dispela kain hatwok em bin mekim long mi ken kam i stap gut tete. Planti taim mi stap tude, bel bilong mi save hevi taim mi tingim mama bilong mi na wanem hatwok em bin mekim long peim skul fi bilong mi wantaim ol bikipela na liklik bratasusa bilong mi. Nau planti bilong mipela i wok mani," Nicky Bernard i tok.

Nicky i stap i go na em save tingim hatwok mama bilong em i mekim. Insait long famili bilong Nicky, i bin gat 8-pela pikinini olgeta tasol wanpeal i bin dai. Mama bilong em i bin maritim tupela man tasol em bin lusim tupela wantaim na em yet i hatwok stret long lukautim ol pikinini bilong em.

Mama bilong Nicky i bin maritim wanpela man Niu Ailan na i bin gat foapela pikinini bipo long em i lusim man ya na kisim ol pikinini i go stap wantaim narapela man Sepik. Nicky i bin gimbawan pikinini bilong man Sepik. Nem bilong man ya em Bernard. Em i bin lusim mama bilong Nicky long 1975 taim Bernard yet i bin gat faipwela krismas tasol.


Mama bilong Nicky i bin lusim asples bilong em long Manus ailan taim em bungim Bernard na olgeta pikinini wantaim i bin muv i kam na stap long Rabaul. Ol bikipela brata na susa bilong Bernard i bin go skul long Rabaul.

Nicky yet i fifth bon long famili. Taim em i stap liklik manki yet na Bernard i lusim ol tu. Bernard i bin givim sampela liklik mani bilong helpim long peim skul fi bilong foapela bikipela bratasusa bilong Nicky. Nicky yet i liklik yet long go skul taim Bernard lusim ol i go.

Bikipela brata bilong Nicky (Peter) i pinisim hai skul bilong em long Rabaul. Peter bin wok wantaim Westpec Benk inap sampela yia bipo long em i lusim na nau i stap wantaim Telikom long Manus. Em i bosim sampela hap seksen bilong Manus brens. Mama i bin painim hat tru long peim skul fi bilong ol pikinini taim olgeta i stap long skul. Em wanpela tasol na i no mekim wanpela bikipela wok tu. Namba tu susa (Anna) bilong Nicky i bin i go stap long hai skul, em i stap long gret 8 na mama bilong em i rausim em long skul. Mama i painim hat tru long peim skul fi bilong em na em laik bai pikinini meri i ken kam aut long skul na helpim em long lukautim ol narapela liklik bratasusa bilong em. Dispela i mekim na namba tu susa bilong Nicky i no go moa long skul. Mani i hat tru. Anna nau i stap lukautim mama long ples. Em i marit na i gat tripela pikinini na taim olgeta arapela pikinini i raun nabuat long wok bilong ol long kantri, Anna i save lukautim lapun mama bilong em i stap.

Na bihain long Anna, i gat narapela man, Tony. Em bin pinisim gret sevan long Rabaul na bihain taim em laik go long gret 8, olgeta famili i muv i go bek gen long Manus. Em nau i wok olsem wanpela plisman long plis hetkwata long Konedobu. Em wok wantaim ol CID o ol lain husat i save wok hat long painim ol raskal na man husat i brukim lo bilong kantri.

Nicky i tok olsem mama bilong em i bin gat planti pikinini tasol olgeta i no save tingim mama bilong ol olsem Paul i save mekim. Paul i bin lukautim mama bilong



em gut tru taim em i wok.

"Insait long famili, mi ting olsem Paul i bekim olgeta hatwok mama i bin mekim long bringim mipela i kamap bikipela," Nicky i tok.

Em i tok olsem Paul i save helpim mama gut tru, bihain long em marit taim tu. Nicky i tok ol narapela pikinini i marit na tingting long famili bilong ol tumas na wanwan taim ol save tingim mama bilong ol tasol i no Paul. Paul save helpim mama gut tru tasol nau em i painim bikipela sik na i hat long em i lukautim mama bikos em i no wok moa. Taim mama i harim olsem pikinini bilong em i sik, em tingting long lusim Manus na i kam lukautim Paul tasol em i painim hat liklik long mani bilong balus tiket na stap yet long ples.

Namba foa pikinini meri i bin pinisim gret 10 long hai skul tasol em i no painim wanpela wok. Em i stap nating i go na bihain maritim wanpela ami opisa long Lombrum Navel bes na nau i stap long Manus.

Bihain long Nicky em wanpela pikinini man i stap, dispela man i pinisim skul na i go joinim ami tasol bihain em lusim ami na kam aut na i go long Port Moresby Technical Koles. Bihain long em pinis long hap, em i go bek long ples, Manus. Nau em i save mekim wok kontrak wantaim ol man long wokim haus na narapela samting.

Las bon tru em wanpela liklik meri i stap long ples wantaim bikipela susa bilong em Anna na mama bilong em long Manus. Narapela sekan las bon pikinini i dai olsem na nau i gat sevnapela pikinini tasol i stap long famili.

Nicky i save tingim bek ol dei bilong em i bin stap long Rabaul na em i save tingim dispela hatwok mama bilong em i save mekim long wanwan dei long lukautim olgeta pikinini. Tude Nicky i save stap na tingim bek ol dispela hat taim insait long laip bilong em. Mama bilong ol i no save mekim wanpela bikipela wok long lukautim ol pikinini bilong em. Mama i save mekim ol skon na save salim long maket long helpim em long kisim sampela mani.

"Mama bilong mi save lukautim mani gut tru. Em bai baset na long wanwan yia i laik stat. Em save gut tru long hamas mani bai i go long baim skul fi bilong wanwan pikinini. Antap long dispela, tingim prais bilong kaikai. Ol i mas baim kaikai long maket. Na tingim

namba bilong ol pikinini, em 8-pela olgeta na olgeta ol dispela pikinini i lukluk long han bilong wanpela mama tasol long olgeta samting.

Olgeta pikinini i ting mama bai baim kaikai, klos, su-,pen pensil na wanpela narapela samting ol yangpela i save laikim long em. Man, mama i save hatwok stret long kisim olgeta ol dispela samting na antap long olegta dispela samting, em mas tingim wanem samting ol skul pikinini bai kaikai long wanwan dei na go long skul. Sapos ol tisa i askim long karim sampela mani o wanem samting long skul, olgeta pikinini bai go we? Olgeta i save kam na krai long mama tasol. Mama bilong Nicky i wanpela strongpela meri tru na em i save lukautim ol wantaim wanem liklik mani em kisim long en.

Planti taim Nicky i save stap i go na taim em tingim mama bilong em na wanem ol hatwok mama bilong em i mekim, em i luksave nau olsem long wanem kain hatwok tru mama bilong em i mekim long lukautim olgeta 8-pela pikinini.

Sapos yu wanpela papamama, traim tingim. Nau yupela gat wanpela ol tupela pikinini. Na yu wantaim man o meri bilong yu i ken amamas olsem yutupela wantaim i ken hatwok long lukautim dispela tupela ol tripela pikinini tasol mi tok long 8-pela pikinini olgeta. Yu ting yu wan inap long lukautim ol dispela olgeta. Planti papamama i save painim hat taim stret long lukautim ol pikinini nau. I no planti tasol ol i save painim hat. Mama bilong Nicky i bin mekim dispela wok na nau taim Nicky i stap wantaim meri na tupela pikinini bilong em long wokples, em save tingim mama bilong em na ting: "Wanem taim bai mi bekim olgeta hatwok bilong mama bilong mi? Mi kam marit na sindaun gut i stap. Bai mi givim em wanem samting long bekim dispela hatwok bilong em bipo long em i dai," em i save ting.

Planti papamama i no inap mekim dispela hatwok mama bilong Nicky i bin mekim long en. Em wanpela tasol em putim olgeta pikinini bilong em long skul. Nau, planti bilong ol i mekim wok mani i stap insait long PNG.

Nicky yet i bin nogat sans long go moa long skul taim em pinisim skul bikos mama bilong em i sot tru long mani na i hat tru long em i putim Nicky i go moa long skul. Em i stap na nau i save wok wantaim Wod Publishing kampani long Pot

Mosbi. Em i save helpim long mekim dispela Wantok Niuspepa. Nicky save wok long dakrum. Dispela em ples we ol man bilong wokim niuspepa i save putim ol pepa na kamapim kopi bilong putim long bikipela masin na masin i save pasim dispela kopi i go antap long pepa na dispela i save kamapim niuspepa we yu i ritim nau i stap long en.

Planti taim mama bin painim hat tru long peim skul fi bilong olgeta pikinini. Nau Nicky yet i save stap i go na em i save tingim bek olgeta dispela. I wankain stret tude. Gavman i hapim pei bilong skul fi i go antap tru. Wanwan papamama husat i wok i ken kisim mani hariap tru inap long peim ol dispela bikipela fi tasol planti papamama i painim hat taim na i no save hau ol bai peim dispela kain fi. Tasol ating ol i wankain olsem mama bilong Nicky Maria, em ol manmeri tru. Sapos yu wanpela skul pikinini yu ritim dispela, yu mas tingim mama bilong yu bihain. Yu i no klia yet long wanem kain hatwok ol i wok long mekim nau long traim na putim yu long skul. Mani na taim i hat tasol planti papamama i gat bikipela laik tru long lukim pikinini bilong ol i go long aksul na kisim save. I no olsem ol i sindaun tasol na mani na kaikai iu pundaun i kam long ol kaikai na sindaun tasol.

Nicky yet i ken tingim bek olsem skul fi bilong praimer skul loing 1980 nabaut i no bin bikipela, olsem K20 nabaut. Em i orait tasol hai skul i bin hat liklik. Ol pikinini i save kamap long hatwok bilong tupela papamama tasol taim bilong lukautim, mama i save ksim hatwok. Hatwok i save stat taim bebi i liklik tru. Bebi i liklik tru, em bai pispis na pekpek nabaut, biknait tru em bai bikmaus na krai. Nepi bilong em bai doti olgeta taim. Sampela taim ol pikinini bai putim pispis pekpek long olgeta hap long fran na sait bilong haus. Ol mani save lukim tgasol ol i no inap tingim long rausim samting, em ol bai tok em wok bilong mama. Mama i save mekim ol dispela hatwok long bebi i kam inap long man i sanap wantaim tupela lekmbilong ol na go skul, woklabaut raun na mekikm nabaut. Taim pikinini bikipela, em bai kisim trabel olsem patikim na rapela poikinini ol stilim samting, olgeta hatwok bilong stretim ol dispela hevi save poundaun antagp long mama tasol.

Dispela kain pasin bin kamap

long mama bilong Nicky. Nogat wanpela mani bin stgap raun longpela taikm long helpim na sapotim em long lukatuim ol pikinini. Long kainkain man olsem Nicky, mama i bin olsem mama bna papa i stgap insait long wanpela. Ncky i no bin sav e klika gut long papa bilong em bikos papoa i lusim em wantaim ol b rata susa bilong em taim em liklik manki yet olsem faipwela kris-mas nabaut.

"Mama bilong mi i no save askim mi long mani tasol planti taim mi stap na mi save tingim olgeta hatwok mama bilong mi i bin wokim," Nicky i tok.

"Nau mi save go lukim mama bilong mi taim mi kisim lip tasol wok bilong mi.

"Dispela i bikos mani mi kisim long fotnait em i inap tasol long lukautim meri na tupela pikinini bilong mi.

"Mi save kisim lip mani bilong mi na save go givim long mama bilong mi b ihain long olgeta tu yias," Nicky i tok.

Long sait bilong tumbuna pikinini, mama bilong Nicky nau i gat planti tru. Nicky gat tupela, brata Peter nau i gat tupela pikinini, bikipela susa i gat tripela, Tony i gat tripela pikinini, susa marit long ami opisa nau i gat tripela, na kapenta manki i gat wanpela. Olgeta bung wantaim i kamap long 14 olgeta. Dispela em olgeta tumbuna pikinini bilong mama.

Planti ol tumbuna pikinini bilong mama bilong Nicky nau i stap long skul. Pikinini bilong bikipela susa, Anna i stap nau long gret 8. Dispela tumbuna pikinini em nau i stap long luakaut bilong tumbuna mama bilong em. Taim ol pikinini bilong em i givim mani o wanem samting, em save helpim dispela tumbuna pikinini long go long skul.


Mama nau i save amamas long lukim pikinini bilong em o go na painim wok mani na marit i stap. Em i save mekim olgeta hatwok i kam na nau taim em lukim ol pikinini, em i save amamas olsem olgeta hatwok bilong em i karim kaikai na planti bilong ol pikinini i marit, sindaun gut na kaikai na slip gut. Planti manmeri long Manus bai inap save long stori bilong Maria. Dispela em nem bilong mama bilong Nicky. Long wanem kain meri em i stap bikos em i gat bikipela lain famili i stap long Manus. Ol lain bilong em i stap long Not Kos, Wes Kos na saut Kos wantaim inap save long dispela meri. Wanpela meri husat i dabolim wok bilong man na meri wantaim long helpoim olgeta pikinini bilong ol painim gutpela sindaun tude.

Nau planti pikinini bilong em i painim wok mani na stap klostu wantaim em long Manus. Nicky wantaim brata bilong em Paul tasol i stap long Mosbi.

Ating planti hap bilong PNG nau i gat sampela mama o poapa husat i save painim hat taim stret long peim skul fi. Tasol olgeta papamama i mas luksave olsem ol dispela pikinini i no inap stap liklik mangi yet. Sampela yia kam i go pinis bai yu lukim ol kamap olsem gutpela manmeri.

Noken lus tingting long helpim ol long wanem samting ol i mekim bikos planti pikinini, wankain olsem Nicky bai tingim yu wanem manmeri husat i hatwok taim yu stap lapun na laik dai klostu. Wanem samting yu mekim long kamap dispela yangpela manm o meri i bikipela samting long laip bilong ol. Noken givap anting na ting olsem ol dispela pikinini bai lus tingting tagim ol kamap bikipela





## Laik bilong man long tewel meri lus nating

**B**ipo bipo tru insait long Walume, Sauten Hailans provins i gat wanpela man i stap nem bilong en, Olaiye Guni.

Wanpela taim em i laik go katim paia wut long bus ol i kolim Dikire. Dispela bus em i stap klostu tru long maunten lalibu. Orait em i go kamap long bus pinis na em i katim paia wut i stap.

Na em i lukim wanpela meri olsem igel i sanap i stap longwe liklik. Em i go klostu tru na lukim meri ya i sindaun antap long tupela diwai bipo i bin sting na pundaun i stap.

Em i go na sikanim em na tok-tok wantaim em i stap. Long apinun meri ya i go pinis na man em i wari stret na em i kisim paiawut bilong en na i go bek long haus.

Taim em i go bek long haus em i no tokim ol lain bilong em long dispela samting i bin kamap long bus.

Em yet i laik save, olsem na em i slip na long moning em i kirap go kwiktai long dispela bus na em i lukim meri ya i kamap pinis long dispela hap. Em i amamas nogut tru na i ting olsem em bai kisim meri ya i go long haus.

Olsem na em i go klostu na toktok wantaim em i stap. Long apinun em i laik kisim i go tasol meri ya i go pinis. Na em i wari stret na i go bek long haus. Long



nait em i no slip, em wok long wari tumas long meri ya stap i go inap tulait i bruk.

Long bik moning stret em i kirap na i go hariap long bus. Em i ting meri bai kamap stap tasol meri ya i no stap. Olsem na em wok long wet i stap tasol em i no kam. Em wari stret na i go bek long haus na em i ting olsem long neks de em bai i kam.

Olsem na em i slip na long moning taim stret em i kirap na i go kamap long bus. Em i ting meri ya bai kamap stap. Tasol meri i no stap, olsem na em wok long wet i stap i go inap apinun na ples i laik tudak olsem na em i

ting meri ya bai i no kam bek moa olsem na em i wari tru na krai.

Na em i kisim tamiok bilong en na putim narapela han bilong en antap long diwai we meri ya bin sindaun antap long en na katim han bilong em na em i krai nogut tru na i go bek long haus.

Sampela de behain em i tokim ol lain bilong en na ol i harim. Na nau dispela man em lapun pinis na stap yet long ples Walume Kisenepoi viles.

**Rosella Kaima  
Walume, SHP**



**Nem:** Korki Kombong

**Krismas:** 19 (man)

**Adres:** Moruma SDA Mission, P O Box 187, Kundiawa, Simbu Province

**Save laikim:** Go lotu, harim gospel musik, raun long nambis, waswas long solwara na tokpilai.

**Nem:** Dembi Wa

**Krismas:** 19 (man)

**Adres:** Moruma SDA Mission, P O Box 187, Kundiawa, Simbu Province

**Save laikim:** Go lotu, harim gospel musik, tok stori na raun long ol ples.

**Nem:** Saki Willie Kaugla

**Krismas:** 15 (man)

**Adres:** Mai Tarangu Service, P O Box 505, Kundiawa, Simbu Province

**Save laikim:** Go raun wantaim ol pren, pilai soka, harim musik na kaikai rais wantaim besta.

**Nem:** Martin Levi

**Krismas:** 21 (man)

**Adres:** Adventist, P O Box 76, Wau, Morobe Province

**Save laikim:** Go lotu, Yut faithfinder kem, wok gaden, kukim kaikai, stori wantaim ol pren.

**Nem:** Judith Asare Addo

**Krismas:** 24 (meri)

**Adres:** Chapel Square Road, 0006# First Land Hall Clarue, P O Box EL 393, Elmina, Ghana, WA

**Save laikim:** Raun lukim ol narapela ples na musik.

**Nem:** Daniel Timba

**Krismas:** 19 (man)

**Adres:** Aambatweng Village, Refugees, P O Box 42, Kiunga, Western Province

**Save laikim:** Vulliball, soka, mitim ol pren, stori, go long skul, helpim ol lain, ritim baibel na go daiving wantaim ol pren.

**Nem:** Francis Steven

**Krismas:** 21 (man)

**Adres:** Nipa St Fidelis Catholic Mission, P O Box 69, Mendi, SHP

**Save laikim:** Wok wantaim ol yut na mama group, go insait long sios aktiviti.

**Nem:** Martin Arhim

**Krismas:** 18 (man)

**Adres:** P O Box 36, Awutu Bawjase C/R, Ghana, WA

**Save laikim:** Futball na lukim ol vidio gem.

**Nem:** Greg P Afulip

**Krismas:** 18

**Adres:** Tumolbil SDA Mission, P O Box 48, Telefomin, SP

**Save laikim:** Go lotu, pilai basket-ball, soka, ragbi tas na wokim pren.

**Nem:** Judith Aba Sam

**Adres:** P O Box CC 1283, Oguuah Village, Ghana, West Africa

**Krismas:** 26 (meri)

**Save laikim:** Swim, kuk, musik na raun lukim ol arapela ples.

**Nem:** Elijah Nasnas

**Krismas:** 16 (man)

**Adres:** St Johns Kaikirui Island, P O Box 107, Wewak, East Sepik Province

**Save laikim:** Harim pop na lokol musik, go lotu, pilai soka, ragbi tas, volibal, lukim TV na raitim pas.

**Nem:** Rhonda Anny

**Krismas:** 18 (meri)

**Adres:** Josephstaa Primary School, C/- Catholic Mission, P O Box 750

**Save laikim:** Harim PNG musik, go danis, senisim presen wantaim ol narapela provins o kantri, harim tumbuna stori, go raun long bus na mekim pen pren.

**Nem:** Maya Livambo

**Krismas:** 18 (man)

**Adres:** Hornbrook NGI, Malaita St, Lae, P O Box 1812, Lae, Morobe Province

**Save laikim:** Go lotu, tokpilai, wokim gaden na waswas long nambis.

**Nem:** Mathias Maix

**Krismas:** 17 (man)

**Adres:** Hornbrook NGI, Malaita St, P O Box 1812, Lae, Morobe Province

**Save laikim:** Go lotu, tokpilai, wok gaden na waswas long wara.

**Nem:** Idintie Enos

**Krismas:** 19 (man)

**Adres:** P O Box 195, Lae, Morobe Province

**Save laikim:** Pilai ragbi tas na soka

**Nem:** Bonny Enos

**Krismas:** 18 (man)

**Adres:** P O Box 195, Lae, Morobe Province

**Save laikim:** Harim gospel musik na ritim baibel.

**Nem:** Aldrin Sam

**Krismas:** 20 (man)

**Adres:** College of Allied Health Science, P O Box 2033, Yomba, Madang Province.

**Save laikim:** Go lotu, mekim poren wantaim ol pikinini husat i nogat papamama, wok gaden na pilai ol kankain spot.

**Nem:** Janet Supa

**Krismas:** 16 (meri)

**Adres:** St Mary's Tech School, P O Box 71, Mingende, Simbu province.

**Nem:** Prisila Laki

**Krismas:** 19 (meri)

**Adres:** St Mary's Tech School, P O Box 71, Mingende, Simbu province.

**Nem:** Dinah Fynn Walker

**Krismas:** 22 (meri)

**Adres:** P O Box AD 93, Oguuah State, Central Region, Ghana, W/A.

**Save laikim:** Raun lukim narapela ples, kukim kaikai, ritim buk, singsing, stap long ples i gat bel isi. Tingting long painim wanpela, gutpela man long prenim na sapos isi bai traun lokng maritim em.

**Nem:** Johnson Jimmy

**Krismas:** 16 (man)

**Adres:** Aitape Vocational Training Institute, P O Box 34, Aitape, Sanfdaun Provinkns.

**Save laikim:** Ron long baiskol, lukimpiksa na ritim buk.

**Nem:** J. Annan

**Krismas:** 22 (meri)

**Adres:** School of Hygiene, P O Box 88, Tamale, Ghana.

**Save laikim:** Painim wanpela man biong marit stret. Stap wan na les pinis. Husat man laik rait, rait long English.



### Dia Laiplain,

MI stap longpela taim tru long siti. Tasol mi save abrusim ol manmeri mi no save long ol. Mi save painim hat tru long toktok na raun wantaim ol lain mi no save long ol. Mi save les long ol manmeri mekim kankain toktok long mi.

Mi save pret long yusim pablik transpot sistem mi yet. Bikos mi pret long ol raskol man bai mekim nabaut long mi. Na tu long lusim ol samting bilong mi.

Watpo na mi save gat dispela kain wari?

### RESTRICTED

### Dia Pren,

I luk olsem bikipela hevi bilong yu em long i gat strong na bilip long yu yet. Long wanem rot bai yu mekim dispela samting? Namba wan samting i olsem sapos wanpela man i laik kisim wanem samting em i gat bikipela

## Pasin bilong stap "mi yet" kamapim hevi long mi

laik long en, dispela i stap long wanem kain tingting, save na ol arapela samting i gat. Tasol sapos em i no wok hat o i nogat bilip long em yet, em bai no inap kisim wanem samting em i gat laik long kisim o winim.

Long kisim o winim samting, wanpela man o meri mas putim wanpela stretpela tingting tasol. Maski em bai kisim longpela taim na bikipela hatwok. Dispela samting bai no inap kamap sapos wanpela man o meri gat tupela tingting.

Sapos wanpela man i hatwok na kisim samting em i wok na kisim samting em i laikim, olgeta taim em bai mekim olsem. Bikos kaikai bilong hatwok bilong em i givim em strong na bilip long mekim dispela samting.

Bikipela astingting i olsem wanpela man i mas bikipela bilip long em yet.

Dispela i no save kamap long wanpela de o nait tasol. Nogat. Yu mas wokhat moa yet long i gat bilip long yu yet.

Arapela samting i olsem sapos wanpela man i gat moa save na ol arapela risoses, dispela bai helpim em long kisim o winim wanem samting i gat laik long kisim long laip bilong em.

Yu mas luksave olsem i no yu tasol husat bai o i ken bungim

hevi long pasim nogut bilong ol raskol man. Planti manmeri long tude i save pilim wankain samting olsem yu wok long pilim.

Wanpela man/meri mas lukau-tim ol samting olsem mani bilong em yet long abrusim hevi. Eksampel noken rausim o holim bikipela mak bilong mani ausait long pablik ples.

Bikipela samting olsem traun na abrusim ol ples na eria we yu ting i ken kamapim hevi long yu. Tasol yu ken go long dispela ol ples sapos i gat ol arapela manmeri go wantaim yu. I moa gutpela long wokabaut raun long grup na i no yu tasol.

Mipela i ting olsem wanpela man/meri mas i gat o kisim spirituel helpim long kisim strong long rausim dispela pret em i gat long ol arapela manmeri. Ol Kristen i save kisim eksperiens long bilip dispela em long kamapim wanpela rilesensip wantaim God.

Wanwan man/meri save luksave olsem God i stap long helpim na sapotim mipela. Sapos mipela i kamapim gutpela rilesensip wantaim em, dispela strong na pawa bilong em i ken helpim mipela long abrusim ol hevi.

LAIPLAIN

# KANAGE



Henry Kumai  
Banz

Kanage em wanpela mangi Sandaun. Wanpela taim em i go raun long lukim Beautiful, Madang. I no long taim em hangamap long wanpela stail meri bilong beautiful Madang. Wanpela taim Kanage krosim meri bilong em na tok, "Yu maski, nogat stail bilong yu na bun nating stret." Misis Kanage kirap na i tok, "Man yangpela bilong mi stail tru na beautiful olsem Madang na wokim pipia mangi Sandaun hangamap olsem pisin bilong nait long diwai bilong Madang." Kanage i tok, "Lewa olgeta hap long PNG ol i save lukim san i kam antap na i go daun tasol ol i no save san em wanem samting. Mi yet san i save i go daun arere long haus bilong mi na mi save holim pasim i stap tasol ol meri long hapsait i save krai na mi save tromoi i go daun long hapsait."

Willie Kayford  
Sandaun

Taim bilong Niu Yia long 1997 Kanage go long taun na baim wanpela katen bia na karim go long haus. Long nait em i stat long dring na tu em i lukluk long hanwas bilong em. Taim ol ami sut long gan long 12 klok nait long rausim olpela yia, em tu kirap holim redio na hap kapa bilong em na stat ron long haus bilong em na go olsem long bikrot. Em i ron go daun long liklik maunten na bamim lek bilong em na pundaun nogut tru. Em i tromoi redio wantaim hap kapa na singaut, "Oh - o yei mama!" Sem taim tupela pikinini meri bilong em kam na askim em: "Papa, yu mekim wanem?" Em kirap na tokim tupela. "Noken toktok. Mi pundaun ya." Tupela lap nogut tru long em. Em givim redio wantaim hap kapa long tupela na ol i wokabaut isi go long haus.

Jack Wou  
Vanimo

Kanage i bilong Erave long Sauten Hailens provins. Wanpela taim tambu meri bilong em i laik baim nupela anda-wea long stua. Tarangu meri yah! Klostu long tupela i kamap long stua, meri ya i singautim Kanage na i tok: "Kanage! Wanem nem tru

bilang klos ya? Samting bilong pasim sem? Wanem nem long tok Inglis?" Na Kanage tok: "Wea anda." Meri kirap tokim stua kipa: "Mi laik baim wea anda. Stua kipa askim em: "We aninit long we?" Na meri poinim na tok: "Samting yu save pasim sem." Stua kipa go kisim na tokim: "Dispela nem bilong em i anda we." Meri sem wantaim baim na go ausait.

Kanage Pren

Kanage i bilong las ples Komo, Westen provins. Wanpela taim em wantaim tambu bilong em i laik go long taun na tupela i go wetim ka long rot. Tasol tambu i lukim ol man pilai kas na wan pilai i sot na em i go sindaun nau. Tambu i pilai kas go nau em i lus isi tasol em kirap tokim Kanage, "Nogat sans long i go long taun ya, mi tupela i go bek long haus." Em nau tupela taitim rot, taim tupela wokabaut yet, Kanage tokim tambu. "Mitupela i laik go long sampela hap na kam ya. Tasol yu lusim mani pinis long kas." Nau tambu bilong em kirap na tok never mind. "Man long dispela hap em i no save toktok, em belhat nogut tru." Mitupela i go long haus na kam ya, tasol yu lusim mani pinis long kas, tasol yu tromoi hap tok long mi ya mi laik win bel ya. Harim yu tu yu never mind."

Kanage Pren

Wanpela taim Ekting yang Kanage i lusim meri, pikinini long Karkar Ailan na kisim spit bot go raun long Madang taun. Em i go stap wantaim tambu bilong em long Kalibobo. Long Fraide moning em waswas pinis, werim long jins, putim stokman na wanpela kauboi kep. Em stailim stret na wokabaut i go long taun. Long rot em i singim singsing bilong Wali Hits ol i kolim (Ekting yang na lusim pikinini karai i stap). Em singsing i kam stret na bungim wanpela meri bilong hailans. Em i laik go long Lindaun maket. ekting yang Kanage i wisel long em na tok: "Meri... yu laik go lindaun long Lindaun maket?" "Na meri ya i bekim," Yu askim long wanem? Mind your own business." Tarangu ekting yang Kanage lusim skul longpela taim tasol em i bekim na tok: "I got no business. I'm only a street boy. And what kind of business you got? You got business of mak-

ing profit or business of salim to a street boy laik me and olgeta around PNG?" Meri bekim na tok: "Yu bai mekim wanem?" Ekting yang Kanage bekim gen na tok. "Em i hap wok mani bilong yu o? Olgeta Fraide bai yu bihainim rot. Traim na malolo liklik." Taim meri skelim ol dispela toktok em i no wanbel. Ekting yang Kanage tingting planti na sanap i stap. Meri tanim na lukim em sanap na tok: "Yu sanap tingting planti long wanem? Mi laik givim yu sans tasol tang bilong yu i olsem ples bilong yu save mekim kainkain toktok long mekim man i wari. Nau bai san i draim yu na sutim graun." meri hailans i tok pinis na em lus long Lindaun Maket long baim banana na pis. Ekting yang mangi sanapim ldng san na tingim ol toktok bilong dispela kol pispis bilong hailans.

Marcus Oneh  
Sandaun

Wanpela taim Kanage go long Mosbi na spendim tu wiks wantaim pikinini bilong em. Em stap i go na yu save Mosbi em ples bilong hat ya. Olsem na em tokim pikinini em i laik go bek long Simbu. Pikinini kisim em go na lusim papa Kanage long Air Niugini na em flai i go bek long Simbu. Papa Kanage i stap insait long balus na balus i tainim na em i laik go len. Pilot go na tanim balus long haus bilong papa Kanage stret. Papa Kanage lukim haus bilong em man, lewa bilong em i pam strong tru. Balus kam daun liklik na papa Kanage i lukim wanpela brata bilong em raun long gaden i stap na Kanage singaut nogut tru insait long balus na tok, "Holim long hia na bai mi go." Ol i lap nogut tru long papa Kanage. Seken gen Kanage kirap na tok: "Pilot oh! Inap yu holim long hia na mi go daun?" Man, pilot harim olsem na em belhat nogut tru na tok: "Yu sting long kela. Em i no ka na bai mi stop." Kanage i harim na em kirap tokim pilot: "Sapos yu les long stop orait putim rives gia na yumi go bek long wanem hap yumi kam long em." Sem taim Kanage singautim brata bilong em na tok: "Brata oh yu raun i stap. Pilot les long lusim olsem na mi go long Kundiawa na kisim motobai na kam."

Mary Judykas  
Kundiawa

Mana Moliwane  
Vanimo

Kanage i bilong Banz. Wanpela de em wokabaut i go long Vokesenel Senta. Em i go insait long skul. Em lukim planti ol skul neri, na em kisim sampela tingting pinis. Na em wok long raunraun na lukluk long skul i stap. "Bos, mi wanpela tisa bilong Kuk egrikalsa rises stesin. Vokosenol Senta i no jat egrikalsa tisa. Bos i tokim Kanage, inap yu tisim egrikalsa. Kanage kisim filings pinis na bel bilong em amamas tru. "Nau tasol mi kamap tisa." Na bos askim Kanage. "Yu aun long sampela hap tu? Kanage em cekim, "Yes mi raun long Niugini ailans na ni kam bek ya."





# Noken sapatim sin

**Dia Edita,**

Oi Kristen na Sios lida no ken sapatim sin long 2002 jenerol ileksen.

Yu wanpela kristen o lida long sios o yu wanpela kristen yut i save olsem yu bilong Jisas Krai. Blut bilong em i bin baim yu pinis na klinim yu. Na long bel na long tingting bilong yu klia long go long ples heven. Plis yu noken sapatim sin long 2002 jenerol ileksen.

Mi save lukim planti ol strongpela kristen man na meri i save pundaun long sin long taim bilong ileksen. Plis yu wanpela kristen o lida long sios yu noken sapatim wanpela kendideit long hap eria bilong yu.

Sapos dispela kendideit i gat nem nogut long ples, komyuniti na long provins, yu noken sapa-

tim em na apim nem bilong em na tu yu noken kisim ol braiberi samting bilong ol. Yu save tru long tok bilong God na nau yu mekim dispela pasin em yu save olsem yu i sapatim sin. Na tu yu pundaun pinis long sin.

Oi kristen na sios lida na ol kristen yut noken sapatim na givim vot long man i gat tupela o tripela meri. Taim em i win na go long haus palamen, em bai maritim planti arapela meri moa. Em bai i no inap tingim yu. Olsem na em yu save olsem yu promotim em long mekim dispela pasin i go yet. So em yu save, yu sapatim sin. Yu prea gut na makim wanpela man we em bai pret long God long em yu mas sapat na makim long taim bilong vot.

Oi kristen na sios lida noken guria long kala bilong mani o hap kakaruk plet o botol kola na guria

na lusim Jisas Krai na yu sapatim sin. Em nogat. Plis yu mas holim Jisas Krai wantaim tupela han bilong yu na noken sapatim sin.

Yu noken i litimapim nem bilong tupela man long sem maus. Em nogat. Samting em bilong God. Em bilong God tasol, yu bilong God, orait stap olsem tasol. Na yu noken kamap tupela man. Yu wanpela, em yu tasol.

Ofa yu save givim i go long basket bilong God, em yumi i no save kisim bek. Yumi tromoi em yumi tromoi pisin long ofring plet bilong God em i pinis olgeta. Wankain olsem yu bihainim, orait yu noken sapatim sin long neks yia 2002 jenerol ileksen.

**PS Joseph Puru  
Port Moresby, NCD**

# Promis i no karim kaikai

**Dia Edita,**

Mi wanpela ples man stret. Tasol nau yet em mi i stap long Mt Hagen siti. Yes mi ken tok olsem long sapatim pas bilong brata ya Mista Dange Soko em bin rait na salim pas em mi lukim stret long Januari 4, 2001.

Mi no inap mekim planti toktok tumas. Yes long bihainim dispela mauswara toktok bilong memba bilong Finschhafen Mista Alfred Pogo, turangu mi laik autim belhevi. Mi yet bilong ples P3 Kande Finsch.

Taim bilong nesene 1992 ileksen dispela taim em mi bin i stap long ples, orait olgeta 28 kendideit man bin resis long sia bilong Finsch Open.

Insait long 27 kendideit em wanpela Hailans man Mista Alfred Pogo bin winim dispela sia. So wari bilong mi, em mi ken tokim olgeta Finschhafen pipel olsem. Ating yupela olgeta manmeri ia bilong yupela i op olsem dok, tasol olgeta ai bilong yupela i pas tru olsem hol bilong graun insait em tudak tru.

So dispela em wari na bel hevi bilong mi, em mi givim aut o tok klia long yupela olgeta pipel bilong Kande, Finschhafen.

So (comments) bilong memba, na Minista bilong Woks Mista Alfred Pogo long nesene 1992 ileksen em olgeta mainpoin em putim i go insait long posta pepa.

- Stretim ol olupela samting.  
- SStretim nupela haus sik fi.  
Ol bikpela toktok bin kamap long Finschhafen ileksen dispela em nau yet em i nogat kaikai bilong em, olgeta bikpela toktok i gat plen bilong em, i go paia nating.

So nesene 1992 Minista bilong Woks, Mista Alfred Pogo, em mi ken tokim yu stret olsem. Tru tumas bun bilong mit em yu save tromoi long Finschhafen, tasol gutpela mit stret em yu save pulumapim tu.

**Jembea Masa  
Mt Hagen**

# Givim spes long Tari Okosi

**Dia Edita,**

Mi wanpela man bilong SHP tasol nau yet mi i stap long Tabubil. Wari bilong mi i go long Wantok niuspepa na olgeta manmeri long Westen provins bai lukim.

Mi save sori long ol lain Okosi na Tari. Ol save slip long bus na ol i nogat sampela kona o setelmen nabaut long Tabubil.

Ol lain papa bilong Ok Tedi asples tu ol i no save sori long ol. Ol papa bilong gol ol save les tru long ol lain Tari Okosi olgeta taim. Olsem na mi laik askim wanpela wari bilong mi long ol plisman long Tabubil olsem.

Bilong wanem na yupela save kukim bus haus bilong ol? Ol i no

save mekim wanpela asua na kilim man ol stiiim wanpela samting? Ol man tu ya na yu i gat het tu noken ting yu moa yet na patim nating nating ol man Tari Okosi.

Olsem na yupela ol lain Wangibin mas givim spes long tarangu ol Okosa na Tari. Ol i ken sindaun gut long wanpela hap kona na ol i no ken mekim bikhet pasin na yupela yet mas lukautim ol.

Noken tingting long nau tasol long kaikai tasol. Yu mas tingting long ol pikinini bilong yu long bihaintaim ol bai i stap olsem wanem?

**Tony Agiwa Tai  
Tabubil, WP**

# Taim bilong ol yangpela nau

**Dia Edita,**

Mi wanpela mangi long Pinz insait long Mendi SHP, ilektoret.

Planti man long Imbogue ilektoret mi lukim olsem 20 man samting yupela laik sanap long memba. Tasol wanpela samting yupela i no save lukluk long ol manmeri bagarap long ples nabaut.

Bilong wanem na yupela i no save lukim taim bilong kisim vot yupela hariap tru long pinisim olgeta kon bek long Mendi taun

na sipim raun long ples i go ples.

Dispela pasin yupela ting em i gutpela. Nogat. Dispela em i no gutpela pasin. Long ai bilong God yu giamanim olgeta pipel tu na God wantaim.

Samting yu tok long wokim wanem samting yu mas wokim noken giaman na tok mi olsem mi i stap long ovasis o gavman i nogat mani long wokim dispela wok.

Sapos yu wanpela man insait long Imbonggu ilektoret yu ting-

ing long kisim vot insait long Pinz, Hulup na Una kos orait. Wokim dispela rot bilong mipela long 2001 i stret na bai yu kisim vot. Sapos yu no wokim dispela rot bai yu no inap kisim wanpela vot.

Taim bilong hetman i pinis, nau dispela taim em taim bilong ol yangpela man na meri. Dispela hetman i no lukautim ol.

**Charles Napin  
Pinz, SHP.**

# PNG Kina i no strong moa

**Dia Edita,**

Mi bin harim long radio na lukim long TV tu na mi lukim long niuspepa tu olsem gavman i wok long kisim planti dinau mani i kam insait long kantri olsem long wol benk, IMF, Japan na arapela tu.

Nau olgeta dispela mani i go long nesene baset long wok developmen bilong kantri na arapela wok.

Tasol gavman i no lukluk long strong bilong mani em i pundaun i stap. Olsem wanem? Husat i bin stap long palamen na wokim disisen long 1975 na strong bilong mani (kina) i kam antap tru?

Mi ting, man husat i strongim strong bilong mani em i mas i dai pinis olsem na strong bilong mani i pundaun i stap.

Plis, gavman bilong tude, yu mas opim ai bilong yu na lukluk long strong bilong mani na wokim eksen liklik long dispela.

Mipela ol manmeri bilong dispela kantri PNG i kisim taim nau.

**Peter Bakly  
Mt Hagen**

# Traim stretim rot bilong mipela tu

**Dia Edita,**

Taim mi liklik manki yet mi lukim Pinz Hulup na Combo Topa rot bipo tru waitman i bin wokim long en i stap yet. Nogat wanpela senis liklik.

Plis Peter Peipul na Michael Nali yutupela save tingim dispela ples tu o nogat. Mi lukim olgeta hap pik, dok na manmeri olgeta kisim sevis bilong gavman na i stap. Tasol mi no save lukim

wanpela taim gavman sevis i

kam long dispela hap Munu Laipaly na Imbogue Waralai. Wanem taim tru bai yutupela givim gavman sevis. Yutupela save ting nogat man save i stap long dispela hap.

Plis nau long dispela 2001 yutupela traime na lukluk long dispela hap pastaim. Noken lus tingting long dispela. Traime na helpim pasin mas i stap long

yutupela.

Het man na lida man ol i save long yutupela. Tasol mi wanpela grasrut manki dos nogat kago mi grasrut tromoi tok tasol long yutupela. Traime na helpim grasrut. Sampela taim bai yu tingim grasrut manmeri.

**Charles n. Emil.  
Pinz, Mendi.**

# Nogat taim long wokim skol

**Dia Edita,**

Mi wanpela manki Kabwum i stap long Lae siti na mi harim planti taim Gavana bilong Morobe Songang Luther Wenge em save i go planti taim long Kabwum distrik na em save raun wanwan taim long arapela distrik insait long provins.

Mi amamas long Gavana i go planti long Kabwum na mekim planti tok promis long mekim wok tasol mi wari olsem planti ol dispela tok promis i no karim kaikai na wanpela yia tasol i stap na bai yumi go long ileksen

long 2002.

Olsem na mi laik askim Gavana long noken raun na promis moa bilong wanem i nogat mani na taim bilong mekim tru tru wok.

Wanpela promis bilong yu kamapim Kabwum haikul long yia 1997 bihainim tasol long winim ileksen, tasol i kam inap nau tripela yia i go pinis na yu go na givim K300,000 long dispela yia. Long wokim ful haikul tru orait yu inap long givim 2 or 3 milien kina long provins baset na bai piksa

bilong haikul bai kamap. Tasol em leit olsem na ol pipel bilong Kabwum i no inap bai i gat haikul long dispela taim.

Narapela yia 2002 em ileksen yia na nogat taim moa bilong wok.

Sori Songang traime tasol na bai yu kisim namba gen long Kabwum or hogat, em samting bilong ol pipel nau.

**Gala Kapiok  
Lae**

# Maski salensim Wenge

**Dia Edita,**

Mi wanpela mangi Nebak tasol nau mi stap long Mt Hagen.

Mi laik bekim pas bilong brata Joel Elok bilong Wasu long Wantok niuspepa bilong Januari 11, 2001. Yes brata long pas bilong yu, yu komplem long Gavana em i tru.

Tasol dispela em i tingting o aidia bilong

wanpela man tasol. Sapos yu gat gutpela tingting yu ken go stret long kaunsel bilong yu na tokim em long hevi bilong yu.

Na tu yu tok long noken givim vot long em long 2002 nesene ileksen.

Brata dispela kain tok yu bagarapim nem na wok bilong em.

Brata yu rong tru

olsem na yu no sem liklik long bagarapim lida bilong yumi.

Brata i gutpela sapos yu yet yu salensim em long Gavana sia long 2002 na sapos nogat yu inap tru long wasim soks bilong em.

**Steven Gengio  
Mt Hagen**

# Nuku pipel i wet yet

**Dia Edita,**

Mi wanpela mangi Nuku nau i stap long Aitape. Mi laik bekim pas bilong brata ya Nevao Avari i bin kamap long Wantok niuspepa long Februari 15, 2001.

Brata ya i bin tok olsem, deputi edministreta bilong Sandaun, Joe Sungi i blokim rot bilong kandre bilong em Christopher Sambre i lus long 1997 nesene ileksen.

Brata Nevao Avari inap yu kam aut klia na tokaut long wanem ol projek o sevis Mista Joe Sungi i blokim o stopim?

Noken hait olsem ol mama na rait i go long media na putim ol giaman toktok long strongim sait bilong yu long 2002 nesene ileksen.

Brata yu bin tok tu olsem Mista Andrew Kumbakor em rait man bilong developim Nuku i moa gutpela.

Yu na Minista Andrew Kumbakor i kam aut long Nuku na tokim ol pipel bilong Nuku o soim ol wanem han mak bilong yu na Minista Kumbakor.

Mipela pipel bilong Nuku i wetim yet elektronik benking sistem, 24 awa pawa saplai na ol narapela moa projek we yu na Minista Andrew Kumbakor i bin promisim

pipel bilong Nuku long en.

Dispela nem Nevoa Auari na yu bilong Aitape yu bilong Nuku. Ating yu mas wanpela pret man na yu raitim giaman nem.

Ating yu mas karim brief case bilong Andrew Kumbakor long helpim yu long wanpela wan toea bilong helpim meri na pikinini bilong yu.

Sapos yu man tru, yu mas kam aut na tok stret long pipel bilong Nuku long wanem projek o developmen yu wantaim Minista Andrew Kumbakor i mekim pinis.

Sapos nogat maski, yu westim taim bilong yu bikos 2002 nesene ileksen i kam klostu pinis. Ating yu bai stil gat sans long karim brifkes na kisim wanpela wan toea tu o bai yumi lukim.

So brata inap yu kam aut klia tokaut stret yu wanem dispela man Nevao Auari na nemim ol wanem projek yu na Mista Andrew Kumbakor i putim kamap pinis long dispela foapela yia. Mipela i stil wetim yu yet.

**Daniel K. Sambu  
Aitape**

Sapos yu laik salim ol pas bilong yu i kam long dispela niuspepa. Salim i kam long dispela adres:

THE EDITOR  
WANTOK NEWSPAPER  
PO BOX 1982, BOROKE, NCD.

Raitim nem na adres bilong yu tu na salim wantaim i kam. Sapos nogat nem na adres bai mipela i no inap prinim long niuspepa

## Rot bilong Okapa i bagarap

**Dia Edita,**  
Mi wanpela mangi Okapa tu i stap long Madang i laik sapotim tupela brata i bin tok pinis long Wantok niuspapa Januari 4, 2001 long hevi na wari bilong Okapa distrik.

Yumi lukluk long rot condition bilong Kuru i go long Okapa stesen na raunim Kainantu dis-

trik, mipela tru kana-ka bilong Okapa. Casten Maibawa, yu sem long yu yet nau na yu noken opim maus long haus palamen na tok mi makim maus o laik bilong pipel bilong Okapa.

Yu mas makim yu yet tasol. Bilong wanem na Okapa distrik gavman haus i stap emti haus

bilong pitpit bus? Yu Casten i noken resis long EHP rejinol o Okapa open sia.

Sapota bilong Casten o husat bilong em, yu kisim sem tu sapos yu wokabout long Kuru maunten i go long wanem ples bilong yu.

**Concern Okapians Goroka, EHP**

## Kalakai maket i bagarapim Hagen siti

**Dia Edita,**  
Mi laik autim belhevi bilong mi i go long Hagen Taun Atoriti olsem. Plis, inap yupela surukim dispela Kalakai maket i go long narapela sait? Yupela mas surukim i go longwe liklik long Hagen taun.

Dispela Kalakai maket tasol i save bagarapim Hagen siti. Bikos Hagen em i nambai tri siti bilong kantri, na namba wan siti bilong Hailans. Mi save lukim ol taun bas i no save givim spes

long ol narapela ka i save kam long haiwe.

Ol draiva bilong bas ol i save tanim stret long haiwe. Na ol narapela ka taim ol i ron long rot klostu i save bam.

Sampela taim Praim Minista bilong yumi bai kam. Na long narapela taim ol bikman bilong narapela kantri bai kam tu. Taim balus i lusim ol long airport, em bai ol i draiv i go insait long taun. Na taim ol i laik kamap long Kalakai maket em dispela hevi

bai kamap. Long dispela taim, ol bai rabisim nem bilong Hagen siti. Olsem na plis taun atoriti i mas surukim Kalakai maket i go long narapela sait bilong taun na larim nesanel haiwe mas stap fri na ol ka i ken ron long laik bilong ol.

**John Karpus Blue Mounten Kaip, WHP**

# Rausim fi long Mosbi ples balus

**Dia Edita,**

Mi laik autim wanpela hevi i go long ol pablik na tu i go long DCA o Airport Atoriti. Jackson intenesenel airport, em wanpela bikipela airport bilong Papua Niugini. (The International Airport).

Na nau luk olsem olgeta trolis i luk olsem samting bilong rent. Na ol woklain bilong airport atoriti i sanap long geit na holim tiket na salim long K2 na sampela meri na man i lukautim ol trolis na kisim mani tu.

Long ai bilong planti ol waitman mi lukim ol woklain ya i mekim olsem na mi sem nogut tru long lukim dispela pasin ol i mekim i stap long bikipela ples balus bilong Papua Niugini.

Taim planti ol waitman i lukim dispela pasin ol airport atoriti o DCA i mekim long pablik ples ol i lukim na lap long yumi ol Papua Niugini stret.

Bikos dispela kain pasin ol i no save lukim long ples bilong ol

long ovasis.

Sapos yu wanpela Papua Niugini yu go long ples bilong ol waitman ba yu no inap lukim ol waitman na meri i holim tiket long geit i stap o lukautim ol trolis na kisim mani i stap.

Em nogat. Em ol i save ting em pipia samting tru long ai bilong ol. Olsem na mi lukim dispela samting ol lain long airport i mekim na plis mi i no pilim amamas liklik.

Dispela samting ol i mekim i stap long bikipela ples balus bilong PNG.

Inap yupela i ken stopim dispela pasin o nogat? Mi lukim olsem, long ai bilong planti ol waitman yumi PNG i dring susu i stap yet. Olsem na nau yumi makim mani long ol pipia samting.

Nogat sem bilong mipela ol PNG, i mekim ol dispela pasin bilong developim kantri bilong yumi o rabisim kantri bilong

yumi? Planti ol memba na ol arapela lain i save go long ples bilong ol waitman.

Olsem Australia, Japan, USA, China, Singapore na long ol arapela kantri tu.

Yupela i save lukim ol waitman na meri i save holim ol tiket na salim long geit i stap na nau yupela i lukim na mekim long hia Jackson airport?

Bilong wanem ol lain long airport atoriti i mekim i stap hia long Mosbi. Plis lusim dispela pasin. Em i no wanpela sevis yupela providim long ol kastomas. Yupela i mekim mani long ples bilong pakim ka na long ol trolis tu.

Sapos yu laik mekim mani orait sasim ol balus kampani long givim moa long olgeta o DCA. Dispela em i liklik belhevi bilong mi.

**PS Joseph Puru Kaupena Port Moresby, NCD**

## Painim toktok long tok

**Dia Edita,**

Mi laik sapotim pas bilong Carol Lee i bin kamap long Wantok Niuspepa long 23, 2000.

Yes mi wanpela mangi Sepik tasol nau mi stap long Naverai Pam Oil Plantesen long Talasia stret na mi ritim dispela pas bilong yu Pilip. Wantok, yu nogat sem long autim dispela tingting bilong yu long

niuspepa.

Mi ken tokim yu stret olsem ol manmeri bilong Talasia na Arawe ol i stap long ples graun bilong ol na provins bilong ol na Kimbe em taun bilong ol na em samting bilong.

Ol i planim buai long graun bilong ol na ol i salim long maket stret na i no long ai bilong stua o kona bilong rot o long as bilong mango

nabaut olsem sampela i save wokim.

Sapos yu laik, orait yu go long ples bilong yu na lukautim taun bilong yu stret.

Sapos yu mekim dispela toktok long Wewak taun, bai ol mangi Sepik i kaikaim yu stret. Noken mekim ol giaman toktok gen.

**Patrick Sipo Talasia, Kimbe**

## Sevis no go long Chuave

**Dia Edita,**

Mi wanpela man bilong ples mi laik autim wari bilong mi. Long 1980 i go inap nau yia 2001 mi i no lukim gavman sevis i kam insait long Yandime eria. Long dispela eria nau i gat 5,000 manmeri.

Yandime em i stap long boda bilong Simbu na Isten Hailans. Mi wantaim ol pipel bilong mi save givim vot long yupela ol dispela memba nau yupela i gat biknem i stap long palamen.

Yupela save tingim ol pipel tu o nogat? Sapos yupela ol distrik memba na provinsel memba tingim ol dispela 5,000 pipel bilong Yandime, ating em bai yupela ol memba bai

tingim ol narapela lain tu.

Ol dispela pipel makim yupela na yupela i gat biknem long palamen.

Mi laikim yu Chuave MP, Yauwe, Riyong na Simbu MP Lui Ambane yutupela mas tingim ol dispela 5,000 pipel long Yandime.

1. I nogat Aid post.
2. Rot em bagarap.
3. I nogat bris.

Dispela em sampela tasol i gat planti moa sevis mipela ol pipel i no lukim yet na wanem taim bai mipela lukim ol dispela senis.

**Samuel K Yomba Goroka, EHP**

## Noken kalap kalap na paulim yu yet

**Dia Edita,**

Dia ol brata na susa bilong Jisas Kraus.

Bel bilong mi i kirap nogut long dispela pasin nau yupela i mekim. God i singautim yumi long marimari bilong Kraus. Tasol kwiktam tumas yupela i lukim em, na yupela i bihainim narapela gutnius. Tasol i nogat narapela gutnius. Nogat tru. Sampela man ol i wok long paulim tingting bilong yumi na ol i laik senisim nabaut gutnius bilong Kraus. Tasol sapos ol aposel yet i autim wanpela gutnius long yumi, o sapos wanpela ensel bilong heven i autim, na sapos dispela gutnius i no wankain olsem dispela gutnius bipo yumi kisim, orait dispela man bai i lus long hel. Galesia 1:6-8.

Yes, long olgeta pas bilong paul em i save tok long ol dispela samting. Sampela tok i stap long ol dispela pas i no klia tumas, na yumi i gat hatwok long save gut long as bilong tok. Olsem na nogut yumi bihainim maus bilong

man i go go na bihain yumi bagarap. 2 Pita 3:16.

Ol bratasusa, mi laik mekim wanpela tok piksa. I gat tupela kain animal i stap. Wanpela em bataplai, narapela em bi. Lukim gut. Bataplai i gat gutpela kala tru. Em i save kalap kalap long plaua i go long plaua. Em i no inap sindaun gut long wanpela plaua na kaikaim gut pouda bilong plaua, nogat tru. Olsem na em i no karim wanpela kaikai. Kaikai bilong em i no stap.

Tasol lukim ol bi. Bi i nogat kala bilong em. Tasol taim em i sindaun antap long wanpela flawa, em i save sindaun gut na kaikaim gut pouda bilong flawa, na bihain em i go long narapela flawa. Olsem na em i save karim planti kaikai. Na kaikai bilong em i stap. Hani, swit nogut tru na yumi save kaikai long em.

Ol bratasusa, askim yu yet, na skelim gut dispela tok piksa. Noken kamap olsem bataplai. Maski long gutpela kala. Maski

long kalap kalap nabaut. Maski long bihainim switpela tok bilong man. Pren, mi tokim yu. Nogut yu wok long mekim olsem na yu no inap long karim wanpela kaikai. Kaikai bilong yu i no inap i stap.

Ol bratasusa, askim yu yet, na skelim gut, na sanap strong. Kaikaim gut tok i stap long buk bilong God, buk baibel.

Na bai yu karim kaikai, na kaikai bilong yu bai i stap. Kamap olsem bi. Maski paulim tok bilong. God na senisim nabaut. Tenkyu tru.

Ol bratasusa, Jisas i save autim tok long tok piksa tasol.

Olsem mi laik kliaim tingting bilong yupela na mi wokim long tok piksa. Sapos yu no klia long sampela toktok mi mekim olsem senisim nabaut, o lusim em o arapela samting tu, yu ken salim pas i kam long mi.

**Melkior Billy Sting Kundiawa, Chimbu**

## Ol Drekkir i no lukim pes bilong Akessim

**Dia Edita,**

Mi wanpela mangi Drekkir na nau mi stap long Kimbe. Mi sapotim pas bilong brata Lucas Apinur, i bin kamap long niuspapa long Julai 20, 2000.

Brata mi tu mi laik askim dispela question Memba bilong Ambunti Drekkir i stap we?

Mipela long Drekkir i no bin lukim pes bilong em o lukim wan-

pela han mak bilong em liklik, nogat na nogat olgeta. Rot long Bonohoi i go olgeta long Wes Sepik em i bagarap olgeta na Bolmita i go long Aresili tu em i bagarap tru.

Juda Akessim yu stap we? Yu stap long Mosbi i go inap taim bilong kempein nau, bai yu kam na inapim olgeta hap long Ambunti, Drekkir nau, bai ol i

lukim pes bilong yu. Sem ya.

Plis pipel bilong Drekkir Ambunti, lus tingting long kain memba olsem, tingting gut na makim nupela man.

So em tasol liklik tingting long sapotim pas bilong brata Lucas Apinur.

**Patrick Sipox Kimbe, WNPB**

## Plis stretim rot long Stop N Shop hariap

**Dia Edita,**

INAP Hebou Construction company o husat i stretim dispela rot long Round About klostu long Stop N Shop Waigani hariap liklik na pinisim dispela rot. I luk olsem longpela taim olsem wan mun nabaut i laik kam i go na dispela hap rot i blok yet.

I no long taim bai wanpela ka i bam o sampela manmeri bai kisim bagarapim long dispela hap. Ol ka i bisi na plantiot aim tu ol bas i save stopm krankli stretna i hat tru long givwe long tanel rot. Dispela kain bai mekim na i no long taim ba wanpela manmeri i pikinini i kisim bagarap long ka eksiden o ka bai bam nabaut. Stretim rot hariap. Mani bilong dispela hap rot i stap we?

Na tu husat enjimia i bin makim dispela hap

round about. Em i no laik stretim long dispela taim yet. Nau yumi bai lusim narapela mani gen long stretim dispela mistek bilong man ya.

Dispela hap ple si risky tru. Inap long planti ka i bam na bagarap pinis long dispela hap sapos yumi i stap long narapela kantri. Ol manmeri i save bikhet tagsol ol PNG draicva i save luksave long dispela kain birua na draiv gut olsem na yumi no lukim POM Jeneral Haus sik i no pulap long ol manmeri i kisim eksiden long dispela rot.

Em tasol liklik wari.

**Joe Kople Rainbow Village, Gerehu.**

## Plis traim stretim renbo rot bagarap

**Dia Edita,**

PLIS traim na stretim ol rot bilong Renbo. Mi no save husat memba bilong mipela. Taim bilong ileksen yupela save kamap. Dispela em insait long Mosbi yet. I no long wanpela ovasis kantri o bus ples we ol memba i no luksave long em.

Man, taim bilong ren nau na planti repela grbaun i save pas

long set trgausis bipo long yu kamap long ples bilong wok.

Ol manmeri i gat ka i kisim taim yu bikos ol i save kalapim planti hul. Wara iu karam apim ol dispela hul na planti ka i givim siksti i go planim long dispela kain hap na ol pipel i painim hat tru long stretim na fiksik ka bilong ol. Taim nogut na ating ol memba i les pinis na tingting

long meri pikinini bilong ol yet.


Em i orait, taim bilong ileksen bai yupela kainkain man i kamap long kempen na giamanim mipela wantaim maus wara bilong yupela. Em orait, yumi lukim long 2002.

**John Pereko Renbo**






• Wampela yut grup long Mosbi i putim kamap ol danis na singsing long PNGIPA long bikpela de bilong Katolik yut insait long Mosbi siti long las yia.



• Embeseda bilong Saina i sikan wantaim Seketeri bilong Sosel Welfea na Dvelopmen Joseph Sukwianomb long makim wampela helpim bilong Saina long PNG Spots Komisin.



• Ol bikman bilong Gavman, Luteran Sios na Mema bilong Kabwum Ginson Saonu i sanap long wampela ples long Kabwum



• Tupela ples man bilong Marawaka, bik-bus bilong Isten Hailans provins i soim ol bunara na ol mat bilong ples we ol yet i save wokim long han. Marawaka em wampela longwe na bus ples bilong Isten Hailans provins. Nogat rot na ol i save ron tasol long balus. Poto: YAMES KEI.



• Ol sampela yangpela bilong lalibu i wok-about long rot bilong ples. Ol i soim olsem rot bilong ol i wetim Gavman long kam stretim gut rot bilong ol. Poto: JOE KANEKANE.

# SWIPE & WIN COMPETITION

Competition starts on the 5th of March and ends on the 4th April 2001

*Simply swipe your SaveCard and you could be a lucky winner.*

Commencing 14th March 2001, 20 of PNGBC's branches nationwide will each be drawing three (3) EFTPOS receipts every week for three weeks. That's 60 lucky SaveCard holders per week.

**Major Draws**

● **20 Weekly Prizes :**

- 1st Prize **K200**
- 2nd Prize **K150**
- 3rd Prize **K100**

**On the 4th April 2001,**

**20 lucky winners will receive**

**K500 each**

**HOW TO ENTER:**

1. It is very simple. When you use your SaveCard at a merchant to pay for your purchase, bills or to get cash, do not throw away your EFTPOS receipt.
2. Write your name, address and contact number on the back of your EFTPOS receipt and place it in an entry box provided at your local PNGBC branch or enclose it in an envelope and post it to your nearest PNGBC branch. Selected stores will also have entry boxes.
3. Receipts should be lodged by 12 noon every Wednesday for each week's draw.
4. Each week 20 of PNGBC's branches will draw three (3) lucky winners.
5. Each week, the names of the sixty (60) lucky winners will be published on Fridays in the daily newspapers.
6. Prizes for the competition will be automatically credited to the account shown on the winning EFTPOS receipts.
7. The competition is open for EFTPOS receipts obtained from the 5th of March up to and including the 4th April, 2001.
8. EFTPOS receipts for the Grand Draw should be lodged no later than 12pm on Wednesday 4th April, 2001.
9. Competition closes on the 4th April, 2001.
10. All PNGBC staff and their immediate families are not eligible to enter this competition.
11. The promoter's decision in relation to any aspect of the competition is final and binding on each person who enters. No correspondence will be entered into.
12. Participating merchants in Port Moresby include: Brian Bell; Plaza, Gordons, Lae, Kokopo, Madang, Goroka, Mt. Hagen, Nambawan Trophy, Boroko Stop n' Shop, Gerehu, TST Group; Malaoro, Hohola, Waigani, Tan Trading, Chin H Mear, Boroko, Boroko Centre, Town, Gerehu, Lae, Kokopo, Duty Free Shop.
13. Participating merchants in other centres include: Mt Hagen; Bromley & Martons Store, City Pharmacy, Sun Rise Restaurant Mesda PL, Gold Star Stores, MAF Air Port, Kabuka Trading, Mitre Hardware, Minj Barz Stores, Lae; Best Buy, Papindo, Kokopo, Tropicana Pty Ltd, Papindo Pty Ltd, Tabubil, Tabubil Superstore, Tabubil Traders, Wabult Stores, Alotau; Alotau Supermarket

PAPUA NEW GUINEA  
**BANKING CORPORATION**  
WE'RE YOUR BANK

ALOTAU PO Box 260, Alotau	KAMANTU PO Box 255, Kainantu	LAE MARKET PO Box 1263, Lae Market	PORT MORESBY PO Box 76, POM
BOROKO PO Box 1635, Boroko	KIMBE PO Box 203, Kimbe	LORENGAU PO Box 147, Lorengau	POPONDETTA PO Box 83, Popondetta
BULOLO PO Box 85, Bulolo	KOKOPO PO Box 56, Kokopo	MADANG PO Box 446, Madang	TABUBUL PO Box 13, Tabubil
GOROKA PO Box 84, Goroka	KUNDIANA PO Box 6, Kundiana	MENI PO Box 88, Meni	WEWAK PO Box 71, Wewak
KAVIENG PO Box 45, Kavieng	LAE PO Box 104, Lae	MT HAGEN PO Box 77, Mt Hagen	WAIGANI PO Box 169, Waigani

# Wantok painim Wantok

dispela pes em bilong yupela ol  
man na meri husat i laik salim  
tok save i go long ol:-

**BUBU KANDERE BRATA SUSU  
MISIS PREN PIKININI NA HUSAT  
MOA YU GAT LAIK LONG SALIM  
TOK HAMAMAS TOK SORI O TOK PILAI.**

Toktok nating i go long lewa. Wanpela samting tasol toktok i kam long dispela Wantok painim Wantok em i mas sotpela ino inap longpela olsem tel bilong kapul dispela toktok nogat pei long en tasol sapos

igo antap long tripela lain olsem →

Brata plis kam long Port  
Moresby long dispela wik  
wantaim tambu lewa bilong yu

en nau bai i gat pei olsem foapela Kina (K4.00)

long wanpela hap olsem →

Brata plis kam long Port  
Moresby long dispela wik  
wantaim tambu lewa bilong  
yu na pikinini wantaim dog.

Salim dispela toktok i kam long mipela long Wantok Nius na hamamasim husat yu laik long hamamasim. Tingim dispela ino Kanage stori. Makim skin pas olsem -

**Wantok Painim Wantok,  
PO Box 1982,  
Boroko, NCD**





RAGBI LIG  
RIPOT

# Muruks bai kisim ol asples pilaia

**MENDI** Muruks bai kisim ol asples pilaia long train strongim tim bilong ol long 2001 SP Kap resis.

Siaman bilong Mendi Muruks na tu Provinsal Woks menesa bilong Sauten Hailens Daniel Muturam i tokaut long dispela taim em autim plen bilong Muruks long dispela yia.

Muturam em bilong Bogia long Madang tasol i stap Woks menesa long tripela hailens provins bipo i go stap nau long Mendi. Em i lukautim Enga na Mt Hagen Woks bipo na kisim ples bilong Australian Difens Fos long Mendi.

Em i tok olsem Sauten Hailens i gat planti ol gutpela pilaia. Na wanpela plen bilong dispela yia em long kisim ol ragbi lig insait long Sauten Hailens we ol selekta i ken lukluk long en.

Ol selekta bilong Mendi Muruks Nande Yer, Anton Mal na kosa Mark Yangen bai lukautim na makim ol pilaia bilong tim. Skwat ya bai gat 40 pilaia na 17 fainel bai makim Mendi Muruks. Tasol ol pilaia i no winim spes bai stap olsem stendbai pilaia sapos bagarap i bungim ol arapela tim.

Muturam i tokaut olsem Bot bilong Muruks bai painim sponsasip taim ol i stretim tim bilong ol.

Sauten Hailens Provinsal Gavman tasol i bin sponsarim Mendi Muruks bihain long ol i no painim wanpela opisel sponsa.

Em i tok tim ya bai stap yet olsem wanpela "giant killer" insait long 2001 ragbi lig sisen.

Insait long arapela stori, Mt Hagen Eagles tu i makim pinis Bot bilong em long mekim wok long dispela sisen. Ol opisel em Raphael Kerowa (siaman), Peter Kuk (vais siaman), Paul Ray (sekretary) na Alois Wabiniak (tresera).

Wabiniak em wanpela olupela intanesenel soka pilai husat i makim kantri long Melanesia Soka Kap long Fiji. Em i gat eksperiens olsem wanpela gutpela menesa na tu ken lukautim mani.

Em i wok olsem loans opisa wantaim PNGBC long Mt Hagen.

Kerowa i tokaut olsem namba wan wok bilong Bot bilong em long painim afiliesen fi na sponsasip bilong tim. Mt Hagen Eagles i nogat sponsa las yia. De bilong baim afiliesen fi em Mas 25.

Siaman i tokaut olsem tingting bilong planti man olsem Mt Hagen Eagles bai i no inap pilai bikos long fil, Mt Hagen Ragbi Lig i stretim pinis long painim Kagamuga So graun. Dispela graun bai holim ragbi lig gem bilong Mt Hagen na tu holim SP Kap gem taim ol i bungim ol arapela SP Kap tim.

## PNGFA i mas karim sem: Mogi

### YAKAM KELO i raitim

PAPUA Niugini Futbol Asosiesen (PNGFA) i mas karim olgeta hevi long lus na sem i kama long Cook Ailan taim ol anda 17 i go kik long Osenia soka resis las mun, Mosbi skul bois soka kodine-ta, John Mogi i tokaut.

Mogi i askim long wanem as tru na PNGFA i makim ol dispela opisel o eksekutyutiv long karim ol anda 17 manki ya i go long dispela soka resis taim ol dispela lain i nogat wanpela save na eksperiens long wok wantaim ol yangpela skul pikinini husat i stap aninit long 20 krismas. Nogat wanpela bilong ol dispela eksekutyutiv i save long trenim na skulim ol yangpela na i no save tu long menesim ol yangpela manki olsem long bipo.

Mogi i tok olgeta dispela tim opisel i kam long Lae na rekot bilong ol i soim kia olsem ol ino save menesim ol skul pikinini o yut soka long bipo i kam. Olsem na long dispela as, ol i mekim bikpela sem na lus long Cook Ailan las mun.

Mogi i tok ol dispela manki long anda 17 em ol gutpela gutpela pilaia tru na ol i bin redi gut tru i kam long dispela Osenia soka resis. Tasol olsem wanem tru na ol i lus nogut taim kosa o tim eksekutyutiv i no bin stap wantaim ol long redim tim lain ap bilong ol, em i askim.

Mogi i tok ol yangpela ya i pilim nogut tru olsem ol i nogat bos i sanap klostu long ol na ol i wari wantaim na pilai we ol inap pilai gut moa tasol ol i wari na pilai wantaim, em i tok.

Em i tok ol pilaia bilong Mosbi i bin trenim na redi gut tru long las yia yet i kam na stended bilong ol i gutpela tru tasol taim

ol bikman i mekim ol i tingting planti na wari nabaut, pilai bilong ol tu i go nogut olgeta.

Mogi i tok sampela bilong ol dispela pilaia em ol boi bilong em long skul soka tim ol i kolim skul ov ekseleens tim na em i save gut long ol.


Mogi i kolim ol dispela lain eksekutyutiv na opisel bilong PNG anda 17 tim olsem ol i nogat lewa tru long dispela skwat bilong ol manki. Ol i laik go tasol long raun, lukim ples na amamasim ol yet.

Mogi i askim Hailans rijinol soka eksekutyutiv tu long noken mekim kainkain toktok salens nabaut bikos em i no ting yut tim bilong hailans sait bai winim Mosbi long pilai na stended. Em i askim sapos Hailans i gat skul soka kompetisen olsem long Mosbi. Sapos ol i nogat skul soka, orait ol i noken toktok nabaut long tok beksait nating tasol.

• Wanpela strongpela pilaia bilong Pot Mosbi Vipers Chris Lome i skel strong long opisen long nupela tim bilong em. Lome i save pilai wantaim Paga Panthers na ol i nogat gutpela menesimen na stap nau long Fes divisien.

Foto: Henry Morabang.






• Tobias bilong IPIR Taurama i kalap hetim bal egensim BPNG long Pablik Sevan soka long Sande. IPIR i win.



• Tas gem namel long Victims na EMTV i kamap long Sir John Guise Stadium long Sande. Ol poto: HENRY MORABANG.



• Netbal eksen namel long Coca Cola na Brian Bell long Praelvet Companies netbal kompetisen. Coca Cola i win.



• I luk olsem ol i nogat sapota ya. Ol pilaia bilong Elcom i sindaun holim waia banis na givim sapot long wanpilaia bilong ol long gem egensim NGL. Elcom i win 9-4 long eliminesen raun bilong Pot Mosbi mens sofbal resis. Aninit: Pilaia bilong Post Puma i takolim pilaia bilong Tigers long Bowls fainel long Mosbi pri-sisen ragbi lig.



**IKEN WOKIM GUTPELA SAMTING LONG YU**



## Kimbe makim skwat

### RAGBI LIG RIPOT

**KIMBE** Ragbi Lig i makim pinis wanpela skwat long stap insait long 2001 Cambridge Nesenel Jon sempionsip we bai kamap long Rabaul.

Tim ya i gat planti ol pilaia bilong Kimbe Bulls we i save stap insait long SP Kap ragbi lig resis. Dispela yia, Kimbe Bulls i aut long resis na laik soim strong bilong ol long jon sempionsip.

Nem bilong ol pilaia em Luke Anton, Max Meia, Kevin Balu, Francis Paul, Graham

Amute, Albert Gorea, Joe Asing, John Gauma, Steven Tule, Rodney Hancock, Emanuel Nuli, John Asina, Albert Levi, John Mauwe na Stanley Kodi.

Kosa em Darius Haili na manager em George Vava.

Sekretari bilong Kimbe Ragbi Lig tripela nupela pes long tim em Kevin Balu, Rodney Hancock na olpela pilaia bilong University Cowboys long Rabaul Alfred Talingapua.

# NCD kisim 4-yia saspensen

### TAS RIPOT

**PAPUA** Niugini Tas Federesen (PNGTF) i saspensim wanpela strongpela tas asosiesen insait long kantri, NCD, long 4-pela yia olgeta.

Dispela disisen long saspensim NCD Tas Asosiesen i bin kamap insait long wanpela eksekutiv miting long Islander Travelodge long Pot Mosbi i no longtaim i go pinis.

PNGTF i givim dispela

mekim save bikos ol nupela eksekutiv bilong NCDTA em ol i rausim las yia. Tasol insait long jenerel miting bilong NCDTA, ol i makim gen ol dispela opisel.

Ol dispela opisel ol i makim gen em Seseve Lae (presiden), Augustine Mundrau (vais presiden), Joe Yore (sekretari) na Francis Aihhi (tresera).

PNGTF i strong yet ol dispela nupela eksekuty-

tiv i bagarapim sans bilong NCDTA long kamap olsem wanpela asosiesen.

Pas bilong saspensen i kamap olsem "Dispela ol eksekutiv yupela i makim, em PNGTF i no luksave long ol, olsem na dispela ileksen i no gutpela, olsem na PNGTF i no luksave long afiliesen bilong yupela."

"Narapela risen long saspensen em, asosiesen i brukim long

PNGFT sekese 25 long sinsabordinesen long kamap memba bilong Noten Teritori, wanpela rebel grup i bruk lusim Australia Tas Asosiesen (ATA) na tu i no bekim pas bilong PNGFT insait long 7-pela de."

Narapela samting em Intanesenel Tas Federesen (ITF) i tokaut olsem wanem asosiesen i join NTRA bai no inap kamap memba bilong em o

kisim luksave bilong em olsem tas asosiesen.

Tasol PNGTF i tok i gat spes long senisim tingting sapos ol dispela eksekutiv i lusim opis na nupela lain i kisim ples bilong ol. Sapos nogat senis long eksekutiv, PNGTF i askim ol pilaia long joinim narapela asosiesen olsem Central Tas Asosiesen long pilai.

Wantok i no inap kisim bekim bilong Pot Mosbi Tas Asosiesen.

## 8-pela tim joinim Madang volibal resis

### VOLIBAL RIPOT

#### PAULUS TALI i raitim

**FOAPELA** nupela tim i joinim Madang Volibal Asosiesen (MVA) na stap insait long resis bilong pri-sisen we patron na Memba bilong Madang Jacob Wama i bin opim.

Presiden bilong MVA Willie Bagore i tok pri-sisen i pulim 12-pela tim 4-pela nupela na 8-pela olpela. Ol nupela tim em Tsunami 2, CIS, Sea Sharks, Raukele, Malabor, Telikom, Panu Sharks na Riwo 2 na ol olpela tim em Wantoks, Tsunami 1, Kalibobo na Riwo 1.

Insait long divisen bilong ol meri, 4-pela nupela tim i joinim kompetisen. Ol tim ya em Sea Sharks, CSI, Telikom na Raukele. Na ol olpela tim em Wantoks, Tsunami, Kalibobo na Panu Sharks.

Mista Bagore i singaut olsem afiliesen fi bilong dispela yia i sanap long K50 na ol i no tokaut long rejistresen.

Em i tokim Wantok tu olsem bai i gat wanpela kompetisen i kamap long Ista wiken. Na dispela kompetisen em Wama Ista Kap. Mista Bagore i askim wanem ol tim i laik resis long dispela salens long Ista wiken i mas baim K30 long wanwan tim, na ol pilaia i mas tromoi K1.

Em i tok wanpela ples tim Gamoi-Apiaps i putim nem pinis long stap insait long dispela resis.

Presiden i bilip olsem dispela kompetisen bai kamap gut long wanem ol nupela tim bai traim long soim strong bilong ol. Bipo i nogat gutpela salens tumas olsem na nau em i amamas tru long lukim namba bilong ol tim i surik i go long wanpela ten tu (12).

Madang Volibal Asosiesen i bin soim pes namba wan taim bihain long sempionsip las yia long Pot Mosbi. Na ol i kamapim sampela gutpela gem we sampela bilong ol pilaia i bin kisim luksave bilong ol selekta.

Tasol politikis bilong volibal i mekim na ol i no makim kantri long Arafura Gems. Na PNG Volibal Federesen nau i givim tok orait long NCD Pablik Sevans Volibal Asosiesen long makim kantri ya.

#### SAPE METTA i raitim

**SOFBAL** long Goroka i kamapim pinis wanpela nupela tonamen em ol i kolim Meya's kap tonamen.

Dispela tonamen i lukim gren fainel bilong em long Sande wik i go pinis.

Pilai bilong dispela tonamen i bin stat long Sarere, Mas 10, we olgeta tim bilong man na meri i bin salens insait long Raun Robin Kompetisen.

Long Sande, Mas 11, tupela top tim bilong ol meri em Malangan na Brown Eagles na tupela top tim bilong ol man, Karanas na Brown Eagles i bin kamap na kirapim das long gren fainel.

Long divisen bilong ol meri, Malangan i kirapim planti paia woks na rausim sket bilong Brown Eagles 5-4 na winim dispela Meya's kap tonamen taitel na sil bilong ol meri.

Na long divisen bilong ol man, Karanas i mekim strongpela kam bek long bihain na rausim trausis bilong Brown Eagles 7-6 na ol tu i winim meya's kap tonamen taitel na sil bilong ol man em Goroka taun meya, Michael Gotaha i bin putim ap long dispela nupela tonamen.

Long taim bilong presentesen bihain long gren fainel, Meya Gotaha husat i bin kamap long presentesen sere- moni i tok em i gat bikpela hamamas long sapatim ol kainkain spot insait long Goroka. Na softbal em i wanpela long ol dispela spot.


Em i tok dispela Maya's kap tonamen bai kamap long olgeta yia, na sapos em i stap yet olsem Meya, em bai givim moa sapat long softbal na ol arapela spot tu.

Meya Gotaha i surikim toktok i go moa na i tok long opis bilong en aninit long Goroka Eben Lokel Levon Gavman (GULLG), em i bin kamapim K10,000 - long kaunsil baset bilong en na putim i go long sait long sapatim 10-pela spot insait long Goroka taun olsem, softbal, basketbal, volibal, ragbi lig, ragbi yunien, ragbi tas, boksing, soka na kriket.



• Antap: Kepten bilong Goroka Malangan tim bilong meri, Jenny Keleli (raithan) i kisim sil em Goroka taun meya, Michael Gotaha i presenim bihain long ol i daunim Yunaited 5-4 na kamap sempion bilong Meya's Kap tonamen long Goroka long wik igo pinis.

Daunbilo: Kepten bilong Karanas Samson Singin (wantaim sil) na biknem pitsa, Isimel Marnapal (namel) i selebret bihain long ol i daunim Brown Eagles 7-6 long Meya's Kap tonamen. Ol Foto: SAPE METTA.



Em i tok wanwan long dispela spot kod em i kamapim K500 long baset bilong ol tasol em yet i antapim narapela K500 long poket bilong em yet na kamapim K1000 we em bai lukluk long yusim long sapatim dispela 10-pela spot.

Mista Gotaha i tok em i no inap long givim aut kas mani. Em bai yusim dispela mani long baim ol bal, net, tropi, sil na medol we bai em i ken givim i go long ol spot we i stap insait long dispela baset.

Em i tok ol softbal lain i kisim

sia bilong ol we ol i bin kisim tupela sil na 6-pela medol na kamapim dispela meya's kap tonamen.

Mista Gotaha i tok husat ol spot i no kisim sia bilong ol i ken kamap long opis bilong en na lukim em.



# IKEN WOKIM GUTPELA SAMTING LONG YU



# Pukpuk i stap long Wol Kap dro

## RAGBI UNION RIPOT

PAPUA Niugini Pukpuks bai stap insait long pul bilong Melanesian na salensim Solomon Ailan na Vanuatu insait long Wol Kap kwalifai long dispela yia.

Sekretari Jenerel bilong Osenia Ragbi Yunion Bill Wallace i tokaut olsem Pukpuks bai soim pes namba tu taim long Wol Kap kwalifai gem. Wallace em mausman bilong Osenia long Intanesenel Ragbi Boar (IRB).

Namba wan taim Pukpuk i stap long dispela resis bilong Wol Kap kwalifai em 1996-97 we ol bin salensim Cook Ailan na Tahiti. Ol i lus long Cook Ailan 22-19 na bihain ol i wiwilim stret Tahiti 92-6 long Pot Mosbi.

Wallace i bin mekim lukluk raun insait long Osenia rijen long save gut long ol opisel bilong ol 12-pela kantri insait long rijen.

"Kwalifaing tonamen bilong dispela yia i senis we Solomon Ailan, Vanuatu na Niue. Tasol na PNG i kisim ples na Niue bai bungim Cook Ailans na Tahiti."

\* "Ol gem bai pilai long asples

na tu pilai long arapela kantri. PNG bai holim gem egensim Solomon Ailan o Vanuatu."

"Dispela em gutpela long wanem wina bai salensim namba tri tim bilong Tri-Series bilong Pasifik we Fiji, Tonga na Samoa i save resis long en."

Presiden bilong PNGRFU Graham Osborne i tok "Mipela igat tupela intanesenel gem long dispela yia

"Sapos mipela win, mipela bai kisim narapela tupela gem gen long salensim wina bilong arapela pul na tu salensim wanem tim i pinis namba tri long Pasifik Tri-series ragbi salens.

"Sapos mipela i abrusim ol dispela birua, PNG bai gat sans long bungim ol kantri husat i save pilai Tes futbal.

"Bikpela sans bilong mipela em long kisim o winim 15's ragbi yunion insait long rijen."

Mista Osborne i tokaut olsem wokabaut bilong Wallace long PNG bai helpim tru ragbi lig long narapela tupela yia. Em i tok olsem wokabaut bilong em long lukim opis bilong PNGRFU na ripot i go bek long IRB hetkwata long Ireland long sampela helpim long traim developim ragbi yunion long kantri.

# Standed bilong basketbal i pundaun



## BASKETBAL RIPOT

BASKETBAL developmen opisa bilong Osenia rijen, Stuart Manwaring i bin holim tupela wik trening kos bilong ol kosa na trena bilong basketbal insait long kantri long Nesenel Spots Institut long Goroka.

Mista Manwaring i tokaut olsem stendad bilong basketbal i go

daun tru taim PNG i no pilai gut long ol intanesenel tonamen olsem Saut Pasifik Gems na Oceania Basketbal sempionsip.

Long 1991 SP Gems, PNG winim gold medal (meri) tasol long 1999 SP Gems ol i lus. Na wankain tu long basketbal bilong ol man. Na dispela i no gutpela

tumas long spot insait long kantri.

Mista Manwaring i bilip olsem bihain long dispela tupela wik kos, bai i gat senis long basketbal. Dispela kos ya i bin go het gtu na i gat bilip olsem bai i gat senis long stendad bilong gem.

Poto na stori: SAPE METTA

# PAINIM BAL RESIS NAMBA 2

JAKPOT K200 TRAIM NA WINIM



## RUL BILONG PILAI:

1. Makim X long boks long poto yu ting bal i stap
2. Makim X long pen tasol
3. Katim poto long sisos na salim long: *PAINIM BAL RESIS NAMBA 2, Wantok Niuspepa, P.O. Box 1982, Boroko, NCD.*
4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide Mas 30, 2001. Nem bilong wina long mun Mas bai kamaut long Wantok bilong Epril 5, 2001.
6. Long Wantok bilong Epril 5, 2001 bai gat nupela K100 prais mani resis bilong Mun Epril. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Raitim nem na adres bilong yu: **Nem**.....**Address**.....  
.....**Krismas**.....
10. Yu ken salim moa long wanpela entri, tasol no ken yusim poto kopi.
11. Ol famili o pikinini bilong ol wokman meri bilong Wantok i no inap stap insait long dispela resis.

## Mosbi makim skwat bilong nesenel sempionsip

### SOFBAL RIPOT

POT Mosbi Wimens Sofbal Asosiesen (POMWSA) i makim tupela skwat long stap insait long Nesenel Sofbal sempionsip we bai kamap long Pot Mosbi long mun Epril 13-16.

Presiden Rei Melepia i tokaut olsem dispela ol pilaia na opisel bai statim trening bilong ol kwiktaim tru.

Tupela skwat wantaim i gat ol gutpela pilaia, na sempion klab, AB Bears i gat 8-pela pilaia olgeta. Bikpela samting nau ol pilaia i mas kamap long trening long wanem sempionsip i no longwe.

Melepia i tokaut olsem ol i gat riserv pilaia i stap long stendad sapos ol pilai i no kamap long trening, ol lain ya bai kisim ples bilong ol.

Nem bilong ol pilaia em: Tim Wan - Margaret Joseph, Joyce Inguba,

Antonia Tatai, Dianne Gideon, Helen Tata, Wendy Katusela, Wendy Sogai (AB Bears), Paulin Warkit, Selina Karai, Alice Kalas (Mazda), Roberta Kaul, Mechtill Raymond, Pala Manet (Norths), Jenny Pilak (Gazelle), Sandra Sawaraba (Wantoks), Mayville Keket (Chebu). Ol opisel em Delin Bais (kosa), Emma Kalas (asisten kosa) na Sheila Gogot (tim menesa)

Tim Tu em; Kurai Tovia, Mathilad Moe, Aida Roberts, Paraide Manau (Wantoks), Julia Ria Miyuke Kamie, Veronica Ulavai (Norths), Nancy Palan, Tamara Kekedo, Lua Mavara, Florence Meri (All Stars), Helen Singiat, Shirley Tiriman (Mazda), Rachel Yoke (Bears), Melinda Diapong (Chebu), Gloria Mattes (Admiralty) Mathilda Pondriket (Gazelle). Ol tim opisel em Ron Rolly (kosa), Camilla Haii (namba tu kosa) na Seko (tim menesa)

# Koiari holim spot miting

KOIARI Lokel-Level Gavman (KLLG) bai holim wanpela miting wantaim olgeta spot insait long Koiari eria. KLLG i go pas long miting long traim givim sampela helpim long ol spot.

Miting ya em long toktok long ol spot na

insait long dispela miting, KLLG bai putim wanpela aidia we long traim kamapim wanpela spoting bodi long

lukautim spot insait long eria. Dispela aidia (proposal) em long bihain astingting bilong nupela rifom sistem bilong gavman. KLLG i laik ol yangpela na komyuniti i mas stap insait long program. Na ol i no laikim ol yut o komyuniti i raun raun nating na mekim trabel.

insait long dispela miting, KLLG bai putim wanpela aidia we long traim kamapim wanpela spoting bodi long



# IKEN WOKIM GUTPELA SAMTING LONG YU



# Ol Spot Dro

## NCD PUBLIC SERVANTS OFF-SEASON SOCCER

### TOP FIVE

#### Pool 1

Men		Women	
1.	NSO	Education	
2.	NPF	Cellnet	
3.	Cellnet	Health	
4.	Education	A/General	
5.	Harbours	NPF	

#### Pool 2

Men		Women	
1.	1PIR - Taurama	Telikom	
2.	Teachers	1PIR - Taurama	
3.	Telikom	BPNG	
4.	UPNG	Nat. Parliament	
5.	NCDC	UPNG	

### ELIMINATION FINAL

Saturday 24th March, 2001

#### BISINI TWO (2)

08:00	M2	NCDC vs UPNG
09:15	W2	UPNG vs Nat. Parliament
10:30	M1	Harbours vs Education
11:45	W1	NPF vs Health

#### Minor Premier Play-Off

13:00	W	Telikom vs Education
14:15	M	1PIR vs NSO

### QUARTER FINAL

Sunday 25th March, 2001

#### BISINI ONE (1)

08:00	M	NCDC/UPNG vs NPF
10:00	W	Nat. Parliament/UPNG vs Cellnet
12:00	W	BPNG vs Education
14:00	M	Telikom vs NSO

#### BISINI TWO (2)

08:00	M	1PIR vs Cellnet
10:00	W	Telikom vs Health
12:00	W	A/General/NPF vs 1PIR
14:00	M	Harbours/Education vs Teachers

### POINTS LADDER

#### Pool 1 - Mens

TEAM	P	W	D	L	F	A	PTS
NSO	14	11	1	2	35	15	34
NPF	14	10	4	0	26	10	34
Cellnet	14	9	2	3	29	15	29
Education	14	8	1	5	23	12	25
Harbours	14	7	3	4	21	16	24
A/General	15	7	2	5	19	13	23
Transport	14	6	3	5	19	13	21
NAQIA	14	5	3	6	17	15	18
Health (+1)	13	5	1	7	13	21	16
IRC (+1)	13	4	3	6	20	27	15
Fisheries (+5)	9	2	1	6	3	14	7
NBC (+4)	10	2	1	7	5	18	7
Elcom (+4)	10	1	2	7	4	17	5
Commerce (+4)	10	1	1	8	5	19	4
Police (+5)	9	0	2	7	0	14	2

#### Pool 1 - Womens

Education	14	10	1	3	23	6	31
Cellnet	14	10	0	4	25	8	30
Helath (+1)	13	9	3	1	18	5	30
A/General	14	9	2	3	27	5	29
NPF (+1)	13	7	2	4	19	8	23
NSO	14	7	1	6	13	23	22
Harbours (+2)	12	6	1	5	11	10	19
Transport	14	6	0	8	11	21	18
IRC (+1)	13	5	2	6	12	12	17
NAQIA (+2)	12	5	0	7	9	17	15
Police (+7)	7	3	0	4	11	8	9
NBC (+5)	9	2	0	7	3	15	6
Elcom (+4)	10	2	0	8	4	18	6
Fisheries (+5)	9	1	0	8	2	16	3
Commerce (+5)	9	0	0	9	0	18	0

#### Pool 2 - Mens

1PIR-Taurama	14	12	2	0	30	4	38
Teachers	14	9	4	1	23	4	31
Telikom	14	8	3	3	25	14	27
UPNG (+1)	13	7	4	2	15	14	25
NCDC	14	6	5	3	22	13	23
Post PNG (+1)	13	7	2	4	24	17	23
BPNG	14	6	2	6	15	15	20
N/Parliament (+2)	12	5	1	6	15	22	16
WORKS (+4)	10	3	2	5	9	17	11
Air Niugini (+5)	9	2	2	5	11	13	8
POSF (+5)	9	2	1	6	8	14	7
DCA (+4)	10	2	1	7	4	11	7
Pangtel (+5)	9	2	0	7	6	17	6
PNGBC (+5)	9	0	1	8	1	17	1
Defence (+6)	8	0	0	8	2	18	0

#### Pool 2 - Womens

Telikom	14	13	0	1	55	4	39
1PIR-Taurama	14	12	0	2	29	3	36
BPNG	14	10	2	2	26	8	32
N/Parliament (+2)	12	9	0	3	18	4	27
UPNG (+1)	13	8	3	2	20	8	27
NCDC (+2)	12	6	0	6	12	18	18
Works (+3)	10	4	2	4	8	8	14
Air Niugini (+5)	9	3	1	5	8	12	10
DCA (+5)	9	3	1	5	10	25	10
Post PNG (+5)	9	3	1	5	8	12	6
PNGBC (+7)	7	1	0	6	2	18	3
Pangtel (+7)	7	0	1	6	1	15	1
POSF (+8)	6	0	0	6	0	12	0
Defence (+7)	7	0	0	7	1	17	0
Teachers (+6)	8	0	0	8	0	16	0

## PORT MORESBY MEN'S SOFTBALL ASSOCIATION

### Second Finals

Sunday 25th March, 2001

#### Diamond 1

09:00	B	B/Eagles v Malangan
11:15	A	Manolos vs B/Eagles
13:30	A	Gazelle vs Elcom

#### Diamond 2

09:00	C	Manolos vs NGI
11:15	C	K/Kopex vs Samurai
13:30	B	Manolos vs K/Kopex

## PORT MORESBY WOMENS SOFTBALL ASSOCIATION DRAW FOR SEMI FINALS

Saturday, March 24, 2001.

### Diamond 3

09:00	AB Bears vs SP	B
10:30	Wantoks vs Dolphins	B
12:00	AB Bears vs Norths	A
01:30	Mazda vs Wantoks	A

### Diamond 2

09:00	Mazda Carps vs Manolos	C
10:30	NGI vs Tarangau	C

## FLAME PRIVATE COMPANIES NETBALL

Sunday 25 March, 2001

Sir John Guise Stadium

### Division 1

1:00	SPH vs CCA
1:45	Fairdeal vs Brian Bell
2:25	Post vs STC 1
3:10	EFM vs BSP 1

### Division 2

1:00	STC 2 vs Yellow. Pages
1:45	Courts vs Park Royal 1
Bye: Daltron and National	

### Division 3

1:00	Arnotts vs Pacom
1:45	APNG 1 vs BAT
2:25	Park Royal 2
Bye: Paterson	

### Division 4

1:00	APNG 2 vs Eda 1
1:45	Mobil vs Pryde
2:25	PNG Stationery vs Trukai
Bye: Islander	

### Division 5

1:00	Air Niugini vs Lamana
1:45	Bishop vs ANZ 1
2:25	GF 1 vs Avis
Bye: Eda Ranu 2	

### Division 6

1:00	OSI vs Datec 1
1:45	DHL vs Curtain
2:25	Shell vs Ericsson
3:10	AHC vs BHP

### Division 7

1:00	Boroko Motors vs Henao
1:45	Datec 2 vs BDW
2:25	CC vs Renos
3:10	Kina vs MJD

### Division 8

1:00	PWC vs STC 3
1:45	Bank Hawaii vs Gordon IEA
2:25	Hasting vs Fletcher
3:10	Carter vs IBS

### Division 9

1:00	Carpenters vs BSP 2
1:45	Graville vs Kolta KPK
Bye: OBB and ANZ 2	

### Division 10

1:00	STC 4 vs Nesa
1:45	Lae Builders vs CI
Bye: Meddent	

## Toksava

Salim ol dro, risalts na poin lada i kam long Wantok

Niuspepa long Tunde olgeta wik. Salim long Spots Edita:

Fax: 325 2579 o ringim em long telepon no: 325 2500



# WANTOK SPOT



## Anda 19 wimens tim we?

WOK redi bilong Anda 19 wimens tim long pilai long Tonga neks mun i no kamap yet bikos Papua Niugini Futbal Asosiesen (PNGFA) i no makim ol pilai na tu tim opisel bilong en.

Dispela em wanpela bikpela wari tru nau i stap we planti ol yangpela meri i taitim bun long trening tasol ol i no save sapos PNGFA bai salim tim yet o nogat.

Sekretari bilong PNGFA Ivan Ngahan i tokim *Wantok* olsem ol i bin makim pinis Robert Popat na Francis Moiyap long lukautim dispela yut tim bilong ol meri.

Nau yet PNGFA i nogat wanpela skwat tasol *Wantok* i bilip olsem ol bai yusim planti ol pilai bilong Orogen Developmen skwat we i save resis long Pot Mosbi Soka

Asosiesen kik resis.

Dispela developmen skwat em wanpela program bilong Pot Mosbi Skul Soka Asosiesen long traim strongim ol yangpela long pilai soka yet.

Sampela ol pilai bai kam long Lae Skul Soka Asosiesen we resis bilong ol yangpela meri i strong tru.

Popat i tokim *Wantok* long dispela wik olsem em i lusim wok kosa longpela taim pinis. Em i no save long wanem samting i kamap long dispela Anda 19 wimens tim bilong Tonga.

Tasol em i tok sapos PNGFA i laikim em yet, em i redi tasol long givim sevis olsem kosa bilong tim.

"Mi bai wetim toktok bilong PNGFA tasol," Popat i tok.

• Insait long arapela

stori, PNGFA i singaut long olgeta soka asosiesen long baim fi bilong ol bipo ol i ken soim pes long anuel jenerel miting (AGM) long Lae.

Nau yet Manus, Kimbe, Pot Mosbi, Nu Briten Palm Oil Limited (NBPOL) na Kaiapit tasol i memba. Ol sampela asosiesen i no memba yet.

Mista Ngahan i askim ol arapela senta olsem Lahi, LFA, Higaturu, Hekari, Wabag na Buka long kamap memba long mekim kompetisen bilong PNGFA i strong tru.

Ol asosiesen husat i laik memba i mas baim hap fi bilong K700. Sapos yu wanem asosiesen i no baim dispela fi, yu bai nogat rait long mekim vot o toktok insait long dispela jenerel miting.



• Roberto Cortez (lephan) bilong ANZ Yunivesiti i putim was long golkipa bilong Boroko Food World PS United insait long Posman, Kua & Asi soka pri-sisen gren fainel long Mosbi. Yuni win 1-0 na kisim K1,000 na PKA Kap. Foto: HENRY MORABANG.

### Kimbe Lig i lukluk long 2002

HENRY MORABANG i raitim

WANPELA strongpela ragbi lig senta long Niugini Ailan rijen, Kimbe Ragbi Lig i tingting nau long traim painim we o rot i kambek long joinim SP Kap resis long 2002.

Insait long wanpela eksekutiv miting long Kimbe long Tunde, presiden bilong Kimbe Ragbi Lig Egon Vava i tokaut long dispela tingting.

Mista Vava i tokim *Wantok* olsem long lukim dispela toktok i karim kaikai em bai makim ol yangpela tim long makim Wes Nu Briten long stap insait long Nesanel Zone sempionsip long Rabaul.

Em i tok dispela ol yangpela bai karim nem na kisim ekperiens long hai level kompetisen, na taim ol i stap long Kimbe Bulls skwat long neks yia, ol i ken pilai isi tru.

Vava i tokim ol klab deliget

olsem em i no amamas tru long skwat bilong Kimbe i kamap long niuspepa. Em i tok dispela skwat i no kisim blesing bilong em na ol eksekutiv bilong Kimbe.

Presiden i tokaut olsem ol bai makim nupela skwat long Mande na tokaut long ol pilai long Tunde neks wik.

Insait long dispela miting tu, Kimbe Lig i makim wanpela biknem kosa John Robin olsem pablisiti opisa bilong lig. Robin em papa bilong Ngatia Brothers husat i winim planti ol taitel bilong Kimbe Ragbi Lig.

Robin i bin go pas long kosim wanpela biknem bilong Wes, Darius Halli, husat i kamap namba wan golden bol bilong Wes Nu Briten long ragbi lig.

Robin i tokim *Wantok* olsem em i amamas long kisim dispela wok na bai traim olgeta strong bilong em long mekim gut wok. Namba wan wok em long givim moa stori bilong Kimbe i go long ol redi na niuspepa.

# Gutpela Pis tru bilong PNG... Em DIANA!

PROUDLY



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.